

# 1 Salātīn

## *Adūniyāh kī Sāzish*

<sup>1</sup> Dāūd Bādshāh bahut būrḥā ho chukā thā. Use hameshā sardī lagtī thī, aur us par mazīd bīstar dālne se koī fāyḍā na hotā thā.

<sup>2</sup> Yih dekh kar mulāzimoñ ne bādshāh se kahā, “Agar ijāzat ho to ham bādshāh ke lie ek naujawān kuñwārī ḍhūṇḍ leñ jo āp kī ḳhidmat meñ hāzir rahe aur āp kī dekh-bhāl kare. Laṛkī āp ke sāth leṭ kar āp ko garm rakhe.”

<sup>3</sup> Chunānche wuh pūre mulk meñ kisi ḳhūbsūrat laṛkī kī talāsh karne lage. Ḍhūṇḍte ḍhūṇḍte Abīshāg Shūnīmī ko chun kar bādshāh ke pās lāyā gayā.

<sup>4</sup> Ab se wuh us kī ḳhidmat meñ hāzir hoti aur us kī dekh-bhāl kartī rahī. Laṛkī nihāyat ḳhūbsūrat thī, lekin bādshāh ne kabhī us se sohbat na kī.

<sup>5-6</sup> Un dinon meñ Adūniyāh bādshāh banane kī sāzish karne lagā. Wuh Dāūd kī bīwī Hajjīt kā beṭā thā. Yoñ wuh Abīsalūm kā sautelā bhāi aur us ke marne par Dāūd kā sab se baṛā beṭā thā. Shakl-o-sūrat ke lihāz se log us kī baṛī tārif kiyā karte the, aur bachpan se us ke bāp ne use kabhī nahīn ḍāntā thā ki tū kyā kar rahā hai. Ab Adūniyāh apne āp ko logoñ ke sāmne pesh karke elān karne lagā, “Maiñ hī bādshāh banūṅgā.” Is maqsad ke taht us ne apne lie rath aur ghoṛe ḳharīd kar 50 ādmiyon ko rakh liyā tāki wuh jahān bhī jāe us ke āge āge chalte raheñ.

<sup>7</sup> Us ne Yoāb bin Zarūyāh aur Abiyātar Imām se bāt kī to wuh us ke sāthī ban kar us kī himāyat karne ke lie taiyār hue.

<sup>8</sup> Lekin Sadoq Imām, Bināyāh bin Yahoyadā aur Nātan Nabī us ke sāth nahīn the, na Simāi, Re'i yā Dāūd ke muhāfiz.

<sup>9</sup> Ek din Adūniyāh ne Ain-rājil Chashme ke qarīb kī chaṭṭān Zuhlat ke pās ziyāfat kī. Kāfi bheṛ-bakriyān, gāy-bail aur moṭe-tāze bachhṛe zabah kie gae. Adūniyāh ne bādshāh ke tamām beṭoñ aur Yahūdāh ke tamām shāhī afsaron ko dāwat dī thī.

<sup>10</sup> Kuchh logon ko jān-būjh kar is meñ shāmil nahīn kiyā gayā thā. Un meñ us kā bhāi Sulemān, Nātan Nabī, Bināyāh aur Dāūd ke muhāfiz shāmil the.

### *Dāūd Sulemān ko Bādshāh Qarār Detā Hai*

<sup>11</sup> Tab Nātan Sulemān kī māñ Bat-sabā se milā aur bolā, “Kyā yih khabar āp tak nahīn pahuñchī ki Hajjīt ke beṭe Adūniyāh ne apne āp ko bādshāh banā liyā hai? Aur hamāre āqā Dāūd ko is kā ilm tak nahīn!

<sup>12</sup> Āp kī aur āp ke beṭe Sulemān kī zindagī bare khatre meñ hai. Is lie lāzim hai ki āp mere mashware par fauran amal karen.

<sup>13</sup> Dāūd Bādshāh ke pās jā kar use batā denā, ‘Ai mere āqā aur bādshāh, kyā āp ne qasam khā kar mujh se wādā nahīn kiyā thā ki terā beṭā Sulemān mere bād takhtnashīn hogā? To phir Adūniyāh kyon bādshāh ban gayā hai?’

<sup>14</sup> Āp kī bādshāh se guftgū abhī khatm nahīn hogī ki maiñ dākḥil ho kar āp kī bāt kī tasdiq karūnga.”

15 Bat-sabā fauran bādshāh ke pās gaī jo sone ke kamre meñ leṭā huā thā. Us waqt to wuh bahut umrrasīdā ho chukā thā, aur Abīshāg us kī dekh-bhāl kar rahī thī.

16 Bat-sabā kamre meñ dākḥil ho kar bādshāh ke sāmne muñh ke bal jhuk gaī. Dāūd ne pūchhā, “Kyā bāt hai?”

17 Bat-sabā ne kahā, “Mere āqā, āp ne to Rab apne Ḳhudā kī qasam khā kar mujh se wādā kiyā thā ki terā beṭā Sulemān mere bād taḳhtnashīn hogā.

18 Lekin ab Adūniyāh bādshāh ban baiṭhā hai aur mere āqā aur bādshāh ko is kā ilm tak nahīn.

19 Us ne ziyāfat ke lie bahut-se gāy-bail, moṭe-tāze bachḥre aur bheṛ-bakriyāñ zabah karke tamām shahzādoñ ko dāwat dī hai. Abiyātar Imām aur fauj kā kamānḍar Yoāb bhī in meñ shāmīl haiñ, lekin āp ke ḳhādīm Sulemān ko dāwat nahīn milī.

20 Ai bādshāh mere āqā, is waqt tamām Isrāīl kī ānkheñ āp par lagī haiñ. Sab āp se yih jānane ke lie tarapte haiñ ki āp ke bād kaun taḳhtnashīn hogā.

21 Agar āp ne jald hī qadam na uṭhāyā to āp ke kūch kar jāne ke fauran bād main aur merā beṭā Adūniyāh kā nishānā ban kar mujrim ṭhahreñge.”

22-23 Bat-sabā abhī bādshāh se bāt kar hī rahī thī ki Dāūd ko ittalā dī gaī ki Nātan Nabī āp se milne āyā hai. Nabī kamre meñ dākḥil ho kar bādshāh ke sāmne aundhe muñh jhuk gayā.

24 Phir us ne kahā, “Mere āqā, lagtā hai ki āp is haq meñ haiñ ki Adūniyāh āp ke bād

taḵhtnashīn ho.

<sup>25</sup> Kyonki āj us ne Ain-rājil jā kar bahut-se gāy-bail, moṭe-tāze bachhre aur bher-bakriyon ko zabah kiyā hai. Ziyāfat ke lie us ne tamām shahzādoñ, tamām faujī afsaron aur Abiyātar Imām ko dāwat dī hai. Is waqt wuh us ke sāth khānā khā khā kar aur mai pī pī kar nārā lagā rahe haiñ, ‘Adūniyāh Bādshāh zindābād!’

<sup>26</sup> Kuchh logoñ ko jān-būjh kar dāwat nahīn dī. Un meñ maiñ āp kā ḵhādīm, Sadoq Imām, Bināyāh bin Yahoyadā aur āp kā ḵhādīm Sulemān bhī shāmil haiñ.

<sup>27</sup> Mere āqā, kyā āp ne wāqaī is kā hukm diyā hai? Kyā āp ne apne ḵhādimoñ ko ittalā die baḡhair faislā kiyā hai ki yih shaḡhs bādshāh banegā?”

<sup>28</sup> Jawāb meñ Dāūd ne kahā, “Bat-sabā ko bulāeñ!” Wuh wāpas āī aur bādshāh ke sāmne kharī ho gāī.

<sup>29</sup> Bādshāh bolā, “Rab kī hayāt kī qasam jis ne fidyā de kar mujhe har musibat se bachāyā hai,

<sup>30</sup> āp kā beṭā Sulemān mere bād bādshāh hogā balki āj hī mere taḡht par baiṭh jāegā. Hāñ, āj hī maiñ wuh wādā pūrā karūnga jo maiñ ne Rab Isrāīl ke Ḳhudā kī qasam khā kar āp se kiyā thā.”

<sup>31</sup> Yih sun kar Bat-sabā aundhe muñh jhuk gāī aur kahā, “Merā mālik Dāūd Bādshāh zindābād!”

<sup>32</sup> Phir Dāūd ne hukm diyā, “Sadoq Imām, Nātan Nabī aur Bināyāh bin Yahoyadā ko bulā lāeñ.” Tīnoñ āe

<sup>33</sup> to bādshāh un se muḡhātib huā, “Mere beṭe Sulemān ko mere ḵhachchar par biṭhāeñ. Phir

mere afsaroñ ko sāth le kar use Jaihūn Chashme tak pahuñchā deñ.

<sup>34</sup> Wahāñ Sadoq aur Nātan use masah karke Isrāil kā bādshāh banā deñ. Narsinge ko bajā bajā kar nārā lagānā, ‘Sulemān Bādshāh zindābād!’

<sup>35</sup> Is ke bād mere beṭe ke sāth yahāñ wāpas ā jānā. Wuh mahal meñ dākḥil ho kar mere taḥt par baiṭh jāe aur merī jagah hukūmat kare, kyonki main ne use Isrāil aur Yahūdāh kā hukmrān muqarrar kiyā hai.”

<sup>36</sup> Bināyāh bin Yahoyadā ne jawāb diyā, “Āmīn, aisā hī ho! Rab mere āqā kā Ḳhudā is faisle par apnī barkat de.

<sup>37</sup> Aur jis tarah Rab āp ke sāth rahā usī tarah wuh Sulemān ke sāth bhī ho, balki wuh us ke taḥt ko āp ke taḥt se kahīñ zyādā sarbuland kare!”

<sup>38</sup> Phir Sadoq Imām, Nātan Nabī, Bināyāh bin Yahoyadā aur bādshāh ke muhāfiz Karetioñ aur Faletioñ ne Sulemān ko bādshāh ke ḳhachchar par biṭhā kar use Jaihūn Chashme tak pahuñchā diyā.

<sup>39</sup> Sadoq ke pās tel se bharā menḍhe kā wuh sīng thā jo muqaddas ḳhaimē meñ paṛā rahtā thā. Ab us ne yih tel le kar Sulemān ko masah kiyā. Phir narsingā bajāyā gayā aur log mil kar nārā lagāne lage, “Sulemān Bādshāh zindābād! Sulemān Bādshāh zindābād!”

<sup>40</sup> Tamām log bānsrī bajāte aur ḳhushī manāte hue Sulemān ke pīchhe chalne lage. Jab wuh dubārā Yarūshalam meñ dākḥil huā to itnā shor thā ki zamīn laraz uṭhī.

*Adūniyāh kī Shikast*

<sup>41</sup> Logoñ kī yih āwāzeñ Adūniyāh aur us ke mehmānoñ tak bhī pahuñch gaiñ. Thoṛī der pahle wuh khāne se fāriḡh hue the. Narsinge kī āwāz sun kar Yoāb chaunk uṭhā aur pūchhā, “Yih kyā hai? Shahr se itnā shor kyoñ sunāi de rahā hai?”

<sup>42</sup> Wuh abhī yih bāt kar hī rahā thā ki Abiyātar kā beṭā Yūnatan pahuñch gayā. Yoāb bolā, “Hamāre pās aēñ. Āp jaise lāyq admī achchhī khabar le kar ā rahe hoṅge.”

<sup>43</sup> Yūnatan ne jawāb diyā, “Afsos, aisā nahīn hai. Hamāre āqā Dāūd Bādshāh ne Sulemān ko bādshāh banā diyā hai.

<sup>44</sup> Us ne use Sadoq Imām, Nātan Nabī, Bināyāh bin Yahoyadā aur bādshāh ke muhāfiz Karetiyoñ aur Faletiyon ke sāth Jaihūn Chashme ke pās bhej diyā hai. Sulemān Bādshāh ke khabchar par sawār thā.

<sup>45</sup> Jaihūn Chashme ke pās Sadoq Imām aur Nātan Nabī ne use masah karke bādshāh banā diyā. Phir wuh khushī manāte hue shahr meñ wāpas chale gae. Pūre shahr meñ halchal mach gai. Yihī wuh shor hai jo āp ko sunāi de rahā hai.

<sup>46</sup> Ab Sulemān taḡht par baiṭh chukā hai,

<sup>47</sup> aur darbārī hamāre āqā Dāūd Bādshāh ko mubārakbād dene ke lie us ke pās pahuñch gae haiñ. Wuh kah rahe haiñ, ‘Āp kā Kḡudā kare ki Sulemān kā nām āp ke nām se bhī zyādā mashhūr ho jāe. Us kā taḡht āp ke taḡht se kahīn zyādā sarbuland ho.’ Bādshāh ne apne bistar par jhuk kar Allāh kī parastish kī

<sup>48</sup> aur kahā, ‘Rab Isrāīl ke Kḡudā kī tamjīd ho jis ne mere beṭon meñ se ek ko merī jagah taḡht

par biṭhā diyā hai. Us kā shukr hai ki main apnī ānkhoñ se yih dekh sakā.’ ”

<sup>49</sup> Yūnatan ke muñh se yih khabar sun kar Adūniyāh ke tamām mehmān ghabrā gae. Sab uṭh kar chāroñ taraf muntashir ho gae.

<sup>50</sup> Adūniyāh Sulemān se khauf khā kar muqaddas khaime ke pās gayā aur qurbāngāh ke sīngoñ se lipaṭ gayā.

<sup>51</sup> Kisī ne Sulemān ke pās jā kar use ittalā dī, “Adūniyāh ko Sulemān Bādshāh se khauf hai, is lie wuh qurbāngāh ke sīngoñ se lipṭe hue kah rahā hai, ‘Sulemān Bādshāh pahle qasam khāe ki wuh mujhe maut ke ghāṭ nahīn utāregā.’ ”

<sup>52</sup> Sulemān ne wādā kiyā, “Agar wuh lāyq sābit ho to us kā ek bāl bhī bikā nahīn hogā. Lekin jab bhī us meñ badī pāi jāe wuh zarūr maregā.”

<sup>53</sup> Sulemān ne apne logoñ ko Adūniyāh ke pās bhej diyā tāki wuh use bādshāh ke pās pahuñchāeñ. Adūniyāh āyā aur Sulemān ke sāmne aundhe muñh jhuk gayā. Sulemān bolā, “Apne ghar chale jāo!”

## 2

### *Dāūd kī Ākhirī Hidāyat*

<sup>1</sup> Jab Dāūd ko mahsūs huā ki kūch kar jāne kā waqt qarīb hai to us ne apne beṭe Sulemān ko hidāyat kī,

<sup>2</sup> “Ab main wahān jā rahā hūñ jahāñ duniyā ke har shaḡs ko jānā hotā hai. Chunāñche mazbūt hoñ aur mardānagī dikhāeñ.

<sup>3</sup> Jo kuchh Rab āp kā Khudā āp se chāhtā hai wuh karen aur us kī rāhoñ par chalte raheñ.

Allāh kī sharīat meñ darj har hukm aur hidāyat par pūre taur par amal karen. Phir jo kuchh bhī karenge aur jahān bhī jāenge āp ko kāmyābī nasīb hogī.

<sup>4</sup> Phir Rab mere sāth apnā wādā pūrā karegā. Kyonki us ne farmāyā hai, ‘Agar terī aulād apne chāl-chalan par dhyān de kar pūre dil-o-jān se merī wafādār rahe to Isrāil par us kī hukūmat hameshā tak qāym rahegī.’

<sup>5</sup> Do ek aur bāteñ bhī haiñ. Āp ko khūb mālūm hai ki Yoāb bin Zarūyāh ne mere sāth kaisā sulūk kiyā hai. Isrāil ke do kamāñdaron Abinair bin Nair aur Amāsā bin Yatar ko us ne qatl kiyā. Jab jang nahīn thī us ne jang kā khūn bahā kar apnī peṭī aur jūton ko bequsūr khūn se ālūdā kar liyā hai.

<sup>6</sup> Us ke sāth wuh kuchh karen jo āp ko munāsib lage. Yoāb būrḥā to hai, lekin dhyān deñ ki wuh tabaī maut na mare.

<sup>7</sup> Tāham Barzillī Jiliyādī ke beṭon par mehrbānī karen. Wuh āp kī mez ke mustaqil mehmān raheñ, kyonki unhoñ ne mere sāth bhī aisā hī sulūk kiyā jab maiñ ne āp ke bhāi Abīsalūm kī wajah se Yarūshalam se hijrat kī.

<sup>8</sup> Bahūrīm ke Binyamīnī Simaī bin Jīrā par bhī dhyān deñ. Jis din maiñ hijrat karte hue Mahanāym se guzar rahā thā to us ne mujh par lānateñ bhejīñ. Lekin merī wāpasī par wuh Dariyā-e-Yardan par mujh se milne āyā aur maiñ ne Rab kī qasam khā kar us se wādā kiyā ki use maut ke ghāṭ nahīn utārūnga.

<sup>9</sup> Lekin āp us kā jurm nazarandāz na karen balki us kī munāsib sazā deñ. Āp dānishmand



haiñ, is lie āp zarūr sazā dene kā koī na koī tarīqā ḍhūnd̄ nikāleñge. Wuh būrhā to hai, lekin dhyān deñ ki wuh tabaī maut na mare.”

<sup>10</sup> Phir Dāūd mar kar apne bāpdādā se jā milā. Use Yarūshalam ke us hisse meñ dafn kiyā gayā jo ‘Dāūd kā Shahr’ kahlātā hai.

<sup>11</sup> Wuh kul 40 sāl tak Isrāīl kā bādshāh rahā, sāt sāl Habrūn meñ aur 33 sāl Yarūshalam meñ.

<sup>12</sup> Sulemān apne bāp Dāūd ke bād taḳhtnashīn huā. Us kī hukūmat mazbūtī se qāym huī.

### *Adūniyāh kī Maut*

<sup>13</sup> Ek din Dāūd kī bīwī Hajjīt kā beṭā Adūniyāh Sulemān kī mān Bat-sabā ke pās āyā. Bat-sabā ne pūchhā, “Kyā āp amnpasand irādā rakh kar āe haiñ?” Adūniyāh bolā, “Jī,

<sup>14</sup> balki merī āp se guzārish hai.”

Bat-sabā ne jawāb diyā, “To phir batāeñ!”

<sup>15</sup> Adūniyāh ne kahā, “Āp to jāntī haiñ ki asal meñ bādshāh banane kā haq merā thā. Aur yih tamām Isrāīl kī tawaqqo bhī thī. Lekin ab to hālāt badal gae haiñ. Merā bhāī bādshāh ban gayā hai, kyonki yihī Rab kī marzī thī.

<sup>16</sup> Ab merī āp se darḳhāst hai. Is se inkār na kareñ.” Bat-sabā bolī, “Batāeñ.”

<sup>17</sup> Adūniyāh ne kahā, “Maiñ Abīshāg Shūnīmī se shādī karnā chāhtā hūñ. Barāh-e-karm Sulemān Bādshāh ke sāmne merī sifārish kareñ tāki bāt ban jāe. Agar āp bāt kareñ to wuh inkār nahīn karegā.”

<sup>18</sup> Bat-sabā rāzī huī, “Chaleñ, ṭhīk hai. Maiñ āp kā yih muāmālā bādshāh ko pesh karūngī.”

<sup>19</sup> Chunāñche Bat-sabā Sulemān Bādshāh ke pās gāī tāki use Adūniyāh kā muāmālā pesh

kare. Jab darbār mein pahuñchī to bādshāh uṭh kar us se milne āyā aur us ke sāmne jhuk gayā. Phir wuh dubārā taḡht par baiṭh gayā aur hukm diyā ki māñ ke lie bhī taḡht rakhā jāe. Bādshāh ke dahne hāth baiṭh kar

<sup>20</sup> us ne apnā muāmalā pesh kiyā, “Merī āp se ek chhoṭī-sī guzārish hai. Is se inkār na karen.” Bādshāh ne jawāb diyā, “Ammī, batāen apnī bāt, main inkār nahīn karūnga.”

<sup>21</sup> Bat-sabā bolī, “Apne bhāī Adūniyāh ko Abīshāg Shūnīmī se shādī karne den.”

<sup>22</sup> Yih sun kar Sulemān bharak uṭhā, “Adūniyāh kī Abīshāg se shādī!! Yih kaisī bāt hai jo āp pesh kar rahī haiñ? Agar āp yih chāhtī haiñ to kyon na barāh-e-rāst taqāzā karen ki Adūniyāh merī jagah taḡht par baiṭh jāe. Ākhir wuh merā barā bhāī hai, aur Abiyātar Imām aur Yoāb bin Zarūyāh bhī us kā sāth de rahe haiñ.”

<sup>23</sup> Phir Sulemān Bādshāh ne Rab kī qasam khā kar kahā, “Is darḡhāst se Adūniyāh ne apnī maut par muhr lagāī hai. Allāh mujhe saḡht sazā de agar main use maut ke ghāṭ na utārūñ.

<sup>24</sup> Rab kī qasam jis ne merī tasdīq karke mujhe mere bāp Dāūd ke taḡht par biṭhā diyā aur apne wāde ke mutābiq mere lie ghar tāmīr kiyā hai, Adūniyāh ko āj hī marnā hai!”

<sup>25</sup> Phir Sulemān Bādshāh ne Bināyāh bin Yahoyadā ko hukm diyā ki wuh Adūniyāh ko maut ke ghāṭ utār de. Chunāñche wuh niklā aur use mār ḡalā.

*Yoāb aur Abiyātar kī Sazā*

<sup>26</sup> Abiyātar Imām se bādshāh ne kahā, “Ab yahān se chale jāēn. Anatot meñ apne ghar meñ raheñ aur wahān apnī zamīneñ sañbhāleñ. Go āp sazā-e-maut ke lāyq haiñ to bhī main is waqt āp ko nahīn mār dūngā, kyonki āp mere bāp Dāūd ke sāmne Rab Qādir-e-mutlaq ke ahd kā sandūq uṭhāe har jagah un ke sāth gae. Āp mere bāp ke tamām taklīfdeh aur mushkiltarīn lamhāt meñ sharīk rahe haiñ.”

<sup>27</sup> Yih kah kar Sulemān ne Abiyātar kā Rab ke huzūr imām kī k̄hidmat saranjām dene kā haq mansūkh kar diyā. Yoñ Rab kī wuh peshgoī pūrī huī jo us ne Sailā meñ Elī ke gharāne ke bāre meñ kī thī.

<sup>28</sup> Yoāb ko jald hī patā chalā ki Adūniyāh aur Abiyātar se kyā kuchh huā hai. Wuh Abīsalūm kī sāzishoñ meñ to sharīk nahīn huā thā lekin bād meñ Adūniyāh kā sāthī ban gayā thā. Is lie ab wuh bhāg kar Rab ke muqaddas k̄haime meñ dākhil huā aur qurbāngāh ke sīngoñ ko pakar liyā.

<sup>29</sup> Sulemān Bādshāh ko ittalā dī gaī, “Yoāb bhāg kar Rab ke muqaddas k̄haime meñ gayā hai. Ab wuh wahān qurbāngāh ke pās kharā hai.” Yih sun kar Sulemān ne Bināyāh bin Yahoyadā ko hukm diyā, “Jāo, Yoāb ko mār do!”

<sup>30</sup> Bināyāh Rab ke k̄haime meñ jā kar Yoāb se mukhātib huā, “Bādshāh farmātā hai ki k̄haime se nikal āo!” Lekin Yoāb ne jawāb diyā, “Nahīn, agar marnā hai to yihīn marūnga.” Bināyāh bādshāh ke pās wāpas āyā aur use Yoāb kā jawāb sunāyā.

<sup>31</sup> Tab bādshāh ne hukm diyā, “Chalo, us kī

marzī! Use wahīn mār kar dafn kar do tāki maiñ aur mere bāp kā gharānā un qatloñ ke jawābdeh na ṭhahreñ jo us ne bilāwajah kie haiñ.

<sup>32</sup> Rab use un do ādmiyoñ ke qatl kī sazā de jo us se kahīn zyādā sharīf aur achche the yānī Isrāīlī fauj kā kamānḍar Abinair bin Nair aur Yahūdāh kī fauj kā kamānḍar Amāsā bin Yatar. Yoāb ne donoñ ko talwār se mār ḍālā, hālāñki mere bāp ko is kā ilm nahīn thā.

<sup>33</sup> Yoāb aur us kī aulād hameshā tak in qatloñ ke qusūrwar ṭhahreñ. Lekin Rab Dāūd, us kī aulād, gharāne aur taḡht ko hameshā tak salāmatī atā kare.”

<sup>34</sup> Tab Bināyāh ne muḡaddas ḡhaimē meñ jā kar Yoāb ko mār diyā. Use Yahūdāh ke bayābān meñ us kī apnī zamīn meñ dafnā diyā gayā.

<sup>35</sup> Yoāb kī jagah bādshāh ne Bināyāh bin Yahoyadā ko fauj kā kamānḍar banā diyā. Abiyātar kā ohdā us ne Sadoḡ Imām ko de diyā.

### *Simāī kī Maut*

<sup>36</sup> Is ke bād bādshāh ne Simāī ko bulā kar use hukm diyā, “Yahāñ Yarūshalam meñ apnā ghar banā kar rahnā. Āindā āp ko shahr se nikalne kī ijāzat nahīn hai, ḡhāh āp kahīn bhī jānā chāheñ.

<sup>37</sup> Yaḡīn jāneñ ki jyoñ hī āp shahr ke darwāze se nikal kar Wādī-e-Qidron ko pār kareñge to āp ko mār diyā jāegā. Tab āp ḡhud apnī maut ke zimmedār ṭhahreñge.”

<sup>38</sup> Simāī ne jawāb diyā, “Ṭhīk hai, jo kuchh mere āḡā ne farmāyā hai maiñ karūñgā.”

Simāī der tak bādshāh ke hukm ke mutābiḡ Yarūshalam meñ rahā.

39 Tīn sāl yoñ hī guzar gae. Lekin ek din us ke do ḡhulām bhāg gae. Chalthe chalte wuh Jāt ke bādshāh Akīs bin Mākā ke pās pahuñch gae. Kisī ne Simaī ko ittalā dī, “Āp ke ḡhulām Jāt meñ ṭhahre hue haiñ.”

40 Wuh fauran apne gadhe par zīn kas kar ḡhulāmoñ ko ḡhūñḡne ke lie Jāt meñ Akīs ke pās chalā gayā. Donoñ ḡhulām ab tak wahiñ the to Simaī unheñ pakaṛ kar Yarūshalam wāpas le āyā.

41 Sulemān ko ḡhabar milī ki Simaī Jāt jā kar lauṭ āyā hai.

42 Tab us ne use bulā kar pūchhā, “Kyā maiñ ne āp ko āgāh karke nahīñ kahā thā ki yaqīn jāneñ ki jyoñ hī āp Yarūshalam se nikleṅge āp ko mār diyā jāegā, ḡhāh āp kahīñ bhī jānā chāheñ. Aur kyā āp ne jāwāb meñ Rab kī qasam khā kar nahīñ kahā thā, ‘Ṭhīk hai, maiñ aisā hī karūñga?’

43 Lekin ab āp ne apnī qasam toṛ kar mere hukm kī ḡhilāfwarzī kī hai. Yih āp ne kyoñ kiyā hai?”

44 Phir bādshāh ne kahā, “Āp ḡhūb jānte haiñ ki āp ne mere bāp Dāūd ke sāth kitnā burā sulūk kiyā. Ab Rab āp ko is kī sazā degā.

45 Lekin Sulemān Bādshāh ko wuh barkat detā rahegā, aur Dāūd kā taḡht Rab ke huzūr abad tak qāym rahegā.”

46 Phir bādshāh ne Bināyāh bin Yahoyadā ko hukm diyā ki wuh Simaī ko mār de. Bināyāh ne use bāhar le jā kar talwār se mār diyā. Yoñ Sulemān kī Isrāil par hukūmat mazbūt ho gaī.

### 3

#### *Sulemān Rab se Hikmat Māngtā Hai*

<sup>1</sup> Sulemān Firaun kī beṭī se shādī karke Misrī bādshāh kā dāmād ban gayā. Shurū meñ us kī bīwī shahr ke us hisse meñ rahtī thī jo ‘Dāūd kā Shahr’ kahlātā thā. Kyoñki us waqt nayā mahal, Rab kā ghar aur shahr kī fasīl zer-e-tāmīr the.

<sup>2</sup> Un dinon meñ Rab ke nām kā ghar tāmīr nahīn huā thā, is lie Isrāīlī apnī qurbāniyān muḳhtalif ūnchī jaghon par chaṛhāte the.

<sup>3</sup> Sulemān Rab se pyār kartā thā aur is lie apne bāp Dāūd kī tamām hidāyāt ke mutābiq zindagī guzartā thā. Lekin wuh bhī jānwaron kī apnī qurbāniyān aur baḳhūr aise hī maqāmon par Rab ko pesh kartā thā.

<sup>4</sup> Ek din bādshāh Jibaūn gayā aur wahān bhasm hone wālī 1,000 qurbāniyān chaṛhāīn, kyoñki us shahr kī ūnchī jagah qurbāniyān chaṛhāne kā sab se aham markaz thī.

<sup>5</sup> Jab wuh wahān ṭhahrā huā thā to Rab ḳhāb meñ us par zāhir huā aur farmāyā, “Terā dil kyā chāhtā hai? Mujhe batā de to main terī ḳhāhish pūrī karūnga.”

<sup>6</sup> Sulemān ne jawāb diyā, “Tū mere bāp Dāūd par baṛī mehrbānī kar chukā hai. Wajah yih thī ki terā ḳhādīm wafādārī, insāf aur ḳhulūsdilī se tere huzūr chaltā rahā. Terī us par mehrbānī āj tak jāri rahī hai, kyoñki tū ne us kā beṭā us kī jagah taḳhtnashīn kar diyā hai.

<sup>7</sup> Ai Rab mere Khudā, tū ne apne ḳhādīm ko mere bāp Dāūd kī jagah taḳht par biṭhā diyā hai. Lekin main abhī chhoṭā bachchā hūn jise

apnī zimmedāriyān sahīh taur par sañbhālne kā tajrabā nahīn huā.

<sup>8</sup> To bhī tere k̄hādīm ko terī chunī huī qaum ke bīch meñ kharā kiyā gayā hai, itnī azīm qaum ke darmiyān ki use ginā nahīn jā saktā.

<sup>9</sup> Chunāñche mujhe sunane wālā dil atā farmā tāki maiñ terī qaum kā insāf karūñ aur sahīh aur ḡhalat bātoñ meñ imtiyāz kar sakūñ. Kyonki kaun terī is azīm qaum kā insāf kar saktā hai?”

<sup>10</sup> Sulemān kī yih dar̄khāst Rab ko pasand āī,

<sup>11</sup> is lie us ne jawāb diyā, “Maiñ k̄hush hūñ ki tū ne na umr kī darāzī, na daulat aur na apne dushmanoñ kī halākat balki imtiyāz karne kī salāhiyat māñgī hai tāki sun kar insāf kar sake.

<sup>12</sup> Is lie maiñ terī dar̄khāst pūrī karke tujhe itnā dānishmand aur samajhdār banā dūngā ki utnā na māzī meñ koī thā, na mustaqbil meñ kabhī koī hogā.

<sup>13</sup> Balki tujhe wuh kuchh bhī de dūngā jo tū ne nahīn māñgā, yāñī daulat aur izzat. Tere jīte-jī koī aur bādshāh tere barābar nahīn pāyā jāegā.

<sup>14</sup> Agar tū merī rāhoñ par chaltā rahe aur apne bāp Dāūd kī tarah mere ahkām ke mutābiq zīndagī guzāre to phir maiñ terī umr darāz karūñga.”

<sup>15</sup> Sulemān jāg uṭhā to mālūm huā ki maiñ ne k̄hāb dekhā hai. Wuh Yarūshalam ko wāpas chalā gayā aur Rab ke ahd ke sandūq ke sāmne kharā huā. Wahāñ us ne bhasm hone wālī aur salāmatī kī qurbāniyān pesh kīñ, phir barī ziyāfat kī jis meñ tamām darbārī sharīk hue.

*Do Kasbiyoñ ke Bachche ke bāre meñ Sulemān kā Faislā*

<sup>16</sup> Ek din do kasbiyān bādshāh ke pās āiñ.

<sup>17</sup> Ek bāt karne lagī, “Mere āqā, ham donoñ ek hī ghar meñ bastī haiñ. Kuchh der pahle is kī maujūdagī meñ ghar meñ mere bachchā paidā huā.

<sup>18</sup> Do din ke bād is ke bhī bachā huā. Ham akeli hī thiñ, hamāre siwā ghar meñ koī aur nahīñ thā.

<sup>19</sup> Ek rāt ko merī sāthī kā bachchā mar gayā. Mān ne sote meñ karwaṭeñ badalte badalte apne bachche ko dabā diyā thā.

<sup>20</sup> Rātoñ rāt ise mālūm huā ki beṭā mar gayā hai. Maiñ abhī gahrī nīnd so rahī thī. Yih dekh kar is ne mere bachche ko uṭhāyā aur apne murde beṭe ko merī god meñ rakh diyā. Phir wuh mere beṭe ke sāth so gai.

<sup>21</sup> Subah ke waqt jab maiñ apne beṭe ko dūdh pilāne ke lie uṭhī to dekhā ki us se jān nikal gai hai. Lekin jab din mazīd chaṛhā aur maiñ ghaur se use dekh sakī to kyā deḳhtī hūñ ki yih wuh bachchā nahīñ hai jise maiñ ne janm diyā hai!”

<sup>22</sup> Dūsri aurat ne us kī bāt kāt kar kahā, “Hargiz nahīñ! Yih jhūṭ hai. Merā beṭā zindā hai aur terā to mar gayā hai.” Pahlī aurat chīḳh uṭhī, “Kabhī bhī nahīñ! Zindā bachchā merā aur murdā bachchā terā hai.” Aisī bāteñ karte karte donoñ bādshāh ke sāmne jhagartī rahīñ.

<sup>23</sup> Phir bādshāh bolā, “Sīdhī-sī bāt yih hai ki donoñ hī dāwā kartī haiñ ki zindā bachchā merā hai aur murdā bachchā dūsri kā hai.

<sup>24</sup> Ṭhīk hai, phir mere pās talwār le āeñ!” Us ke pās talwār lāi gai.



25 Tab us ne hukm diyā, “Zindā bachche ko barābar ke do hisson meñ kāt kar har aurat ko ek ek hissā de deñ.”

26 Yih sun kar bachche kī haqīqī mān ne jis kā dil apne beṭe ke lie taraptā thā bādshāh se iltamās kī, “Nahīn mere āqā, use mat māreñ! Barāh-e-karm use isī ko de dīje.”

Lekin dūsri aurat bolī, “Thik hai, use kāt deñ. Agar yih merā nahīn hogā to kam az kam terā bhī nahīn hogā.”

27 Yih dekh kar bādshāh ne hukm diyā, “Rukeñ! Bachche par talwār mat chalāeñ balki use pahlī aurat ko de deñ jo chāhtī hai ki zindā rahe. Wuhī us kī mān hai.”

28 Jald hī Sulemān ke is faisle kī khabar pūre mulk meñ phail gaī, aur logoñ par bādshāh kā khauf chhā gayā, kyonki unhoñ ne jān liyā ki Allāh ne use insāf karne kī khās hikmat atā kī hai.

## 4

### *Sulemān ke Sarkārī Afsaron kī Fahrist*

1 Ab Sulemān pūre Isrāil par hukūmat kartā thā.

2 Yih us ke ālā afsar the:

imām-e-āzam: Azariyāh bin Sadoq,

3 mīrmunshī: Sīsā ke beṭe Ilīhūrif aur Akhiyāh,

bādshāh kā mushīr-e-khās: Yahūsafat bin Akhīlūd,

4 fauj kā kamāndar: Bināyāh bin Yahoyadā,

imām: Sadoq aur Abiyātar,

5 zilon par muqarrar afsaron kā sardār: Azariyāh bin Nātan,

bādshāh kā qarībī mushīr: imām Zabūd bin Nātan,

<sup>6</sup> mahal kā inchārj: Aḳhīsar,

begāriyoñ kā inchārj: Adūnīrām bin Abdā

<sup>7</sup> Sulemān ne Mulk-e-Isrāīl ko bārah ziloñ meñ taqsīm karke har zile par ek afsar muqarrar kiyā thā. In afsaroñ kī ek zimmedārī yih thī ki darbār kī zarūriyāt pūrī karen. Har afsar ko sāl meñ ek māl kī zarūriyāt pūrī karnī thīn.

<sup>8</sup> Darj-e-zail in afsaroñ aur un ke ilāqoñ kī fahrist hai. Bin-hūr: Ifrāīm kā pahārī ilāqā,

<sup>9</sup> Bin-diḳar: Maḳas, Sālbīm, Bait-shams aur Ailon-bait-hanān,

<sup>10</sup> Bin Hasad: Arubbot, Sokā aur Hifar kā ilāqā,

<sup>11</sup> Sulemān kī beṭī Tāfat kā shauhar Bin-abīnadāb: Sāhilī shahr Dor kā pahārī ilāqā,

<sup>12</sup> Bānā bin Aḳhīlūd: Tānak, Majiddo aur us Bait-shān kā pūrā ilāqā jo Zartān ke paṛos meñ Yazrael ke nīche wāḳe hai, nīz Bait-shān se le kar Abīl-mahūlā tak kā pūrā ilāqā bashamūl Yuḳmiyām,

<sup>13</sup> Bin-jabar: Jiliyād meñ Rāmāt kā ilāqā bashamūl Yāīr bin Manassī kī bastiyān, phīr Basan meñ Arjūb kā ilāqā. Is meñ 60 aise fasildār shahr shāmil the jin ke darwāzoñ par pītal ke kunde lage the,

<sup>14</sup> Aḳhīnadāb bin Iddū: Mahanāym,

<sup>15</sup> Sulemān kī beṭī Bāsamat kā shauhar Aḳhīmāz: Naftālī kā qabāyli ilāqā,

<sup>16</sup> Bānā bin Hūsī: Āshar kā qabāyli ilāqā aur Bālot,

<sup>17</sup> Yahūsafat bin Farūh: Ishkār kā qabāyli ilāqā,

18 Simāi bin Ailā: Binyamīn kā qabāyālī ilāqā,

19 Jabar bin Ūrī Jiliyād kā wuh ilāqā jis par pahle Amorī bādshāh Sihon aur Basan ke bādshāh Oj kī hukūmat thī. Is pūre ilāqe par sirf yihī ek afsar muqarrar thā.

### *Sulemān kī Hukūmat kī Azmat*

20 Us zamāne meñ Isrāil aur Yahūdāh ke log sāhil kī ret kī mānind beshumār the. Logoñ ko khāne aur pīne kī sab chīzeñ dastyāb thīn, aur wuh khush the.

21 Sulemān Dariyā-e-Furāt se le kar Filistiyon ke ilāqe aur Misrī sarhad tak tamām mamālik par hukūmat kartā thā. Us ke jīte-jī yih mamālik us ke tābe rahe aur use kharāj dete the.

22 Sulemān ke darbār kī rozānā zarūriyāt yih thīn: taqrīban 5,000 kilogrām bārīk maidā, taqrīban 10,000 kilogrām ām maidā,

23 10 moṭe-tāze bail, charāgāhoñ meñ pale hue 20 ām bail, 100 bheṛ-bakriyāñ, aur is ke alāwā hiran, ghazāl, mrig aur muḥhtalif qism ke moṭe-tāze murgh.

24 Jitne mamālik Dariyā-e-Furāt ke maḡhrib meñ the un sab par Sulemān kī hukūmat thī, yānī Tifsah se le kar Ghazzā tak. Kisī bhī paṛosī mulk se us kā jhagaṛā nahīn thā, balki sab ke sāth sulah thī.

25 Us ke jīte-jī pūre Yahūdāh aur Isrāil meñ sulah-salāmatī rahī. Shimāl meñ Dān se le kar junūb meñ Bair-sabā tak har ek salāmatī se angūr kī apnī bel aur anjīr ke apne daraḥt ke sāye meñ baiṭh saktā thā.

26 Apne rathon ke ghoron ke lie Suleman ne 4,000 than banwae. Us ke 12,000 ghor the.

27 Barah zilon par muqarrar afsar baqaydagi se Suleman Badshah aur us ke darbār ki zaruriyat puri karte rahe. Har ek ko sal mein ek mah ke lie sab kuchh muhaiya karna tha. Un ki mehnat ki wajah se darbār mein koī kamī na hui.

28 Badshah ki hidayat ke mutabiq wuh rathon ke ghoron aur dusre ghoron ke lie darkar jau aur bhusa barah-e-rast un ke thanon tak pahunchate the.

29 Allah ne Suleman ko bahut zyada hikmat aur samajh ata ki. Use sahil ki ret jaisa wasi ilm hasil hua.

30 Us ki hikmat Israil ke mashriq mein rahne wale aur Misr ke alimon se kahin zyada thi.

31 Is lihaz se koī bhī us ke barabar nahin tha. Wuh Aitan Izrahi aur Mahol ke beton Haiman, Kalkul aur Darda par bhī sabqat le gaya tha. Us ki shohrat irdgird ke tamam mamalik mein phail gai.

32 Us ne 3,000 kahawatein aur 1,005 git likh die.

33 Wuh tafsil se muhtalif qism ke paдон ke bare mein bat kar sakti tha, Lubnan mein deodar ke bare darakht se le kar chhote paude zufa tak jo diwar ki dararon mein ugti hai. Wuh maharat se chaupaiyon, paridon, reigne wale janwaron aur machhliyon ki tafsilat bhī bayan kar sakti tha.

34 Chuncha tamam mamalik ke badshahon ne apne safiron ko Suleman ke pas bhej diya taki us ki hikmat sunen.

## 5

*Hīrām Bādshāh ke sāth Sulemān kā Muāhadā*

<sup>1</sup> Sūr kā bādshāh Hīrām hameshā Dāūd kā achchhā dost rahā thā. Jab use khabar milī ki Dāūd ke bād Sulemān ko masah karke bādshāh banāyā gayā hai to us ne apne safīron ko use mubārakbād dene ke lie bhej diyā.

<sup>2</sup> Tab Sulemān ne Hīrām ko paighām bhejā,

<sup>3</sup> “Āp jānte haiñ ki mere bāp Dāūd Rab apne Kḥudā ke nām ke lie ghar tāmīr karnā chāhte the. Lekin yih un ke bas kī bāt nahīn thī, kyonki un ke jīte-jī irdgird ke mamālik un se jang karte rahe. Go Rab ne Dāūd ko tamām dushmanon par fatah baḥshī thī, lekin laṛte laṛte wuh Rab kā ghar na banā sake.

<sup>4</sup> Ab hālāt farq haiñ: Rab mere Kḥudā ne mujhe pūrā sukūn atā kiyā hai. Chāron taraf na koī muḥhālīf nazar ātā hai, na koī khatrā.

<sup>5</sup> Is lie maiñ Rab apne Kḥudā ke nām ke lie ghar tāmīr karnā chāhtā hūñ. Kyonki mere bāp Dāūd ke jīte-jī Rab ne un se wādā kiyā thā, ‘Tere jis beṛe ko maiñ tere bād taḥt par biṭhāūngā wuhī mere nām ke lie ghar banāegā.’

<sup>6</sup> Ab guzārīsh hai ki āp ke lakaṛhāre Lubnān meñ mere lie deodār ke daraḥt kaṭ deñ. Mere log un ke sāth mil kar kām kareñge. Āp ke logoñ kī mazdūrī maiñ hī adā karūngā. Jo kuchh bhī āp kaheñge maiñ unheñ dūngā. Āp to kḥūb jānte haiñ ki hamāre hāñ Saidā ke lakaṛhāron jaise māhir nahīn haiñ.”

<sup>7</sup> Jab Hīrām ko Sulemān kā paighām milā to wuh bahut kḥush ho kar bol uṭhā, “Āj Rab kī hamd ho jis ne Dāūd ko is baṛī qaum par

hukūmat karne ke lie itnā dānishmand beṭā atā kiyā hai!”

<sup>8</sup> Sulemān ko Hīrām ne jawāb bhejā, “Mujhe āp kā paighām mil gayā hai, aur main āp kī zarūr madad karūnga. Deodār aur jūnīpar kī jītnī lakaṛī āp ko chāhie wuh main āp ke pās pahuñchā dūngā.

<sup>9</sup> Mere log daraḳhton ke tane Lubnān ke pahārī ilāqe se nīche sāhil tak lāenge jahān ham un ke beṛe bāndh kar samundar par us jagah pahuñchā deṅge jo āp muqarrar kareṅge. Wahān ham tanoṅ ke rasse khol deṅge, aur āp unheṅ le jā sakeṅge. Muāwaze meṅ āp mujhe itnī ḳhurāk muhaiyā karen ki mere darbār kī zarūriyāt pūrī ho jāeṅ.”

<sup>10</sup> Chunānche Hīrām ne Sulemān ko deodār aur jūnīpar kī utnī lakaṛī muhaiyā kī jītnī use zarūrat thī.

<sup>11</sup> Muāwaze meṅ Sulemān use sālānā taqriban 32,50,000 kilogrām gandum aur taqriban 4,40,000 liṭar zaitūn kā tel bhejtā rahā.

<sup>12</sup> Is ke alāwā Sulemān aur Hīrām ne āpas meṅ sulah kā muāhadā kiyā. Yoṅ Rab ne Sulemān ko hikmat atā kī jis tarah us ne us se wādā kiyā thā.

### *Rab kā Ghar Banāne kī Pahlī Taiyāriyān*

<sup>13-14</sup> Sulemān Bādshāh ne Lubnān meṅ yih kām karne ke lie Isrāil meṅ se 30,000 ādmiyoṅ kī begār par bhartī kī. Us ne Adūnīrām ko un par muqarrar kiyā. Har māh wuh bārī bārī 10,000 afrād ko Lubnān meṅ bhejtā rahā. Yoṅ har mazdūr ek māh Lubnān meṅ aur do māh ghar meṅ rahtā.

15 Sulemān ne 80,000 ādmiyon̄ ko kānoñ meñ lagāyā tāki wuh patthar nikālēñ. 70,000 afrād yih patthar Yarūshalam lāte the.

16 Un logoñ par 3,300 nigarān muqarrar the.

17 Bādshāh ke hukm par wuh kānoñ se behtarīn patthar ke baṛe baṛe ṭukre nikāl lāe aur unheñ tarāsh kar Rab ke ghar kī buniyād ke lie taiyār kiyā.

18 Jabal ke kāriḡaron̄ ne Sulemān aur Hirām ke kāriḡaron̄ kī madad kī. Unhoñ ne mil kar patthar ke baṛe baṛe ṭukre aur lakaṛī ko tarāsh kar Rab ke ghar kī tāmīr ke lie taiyār kiyā.

## 6

### *Rab ke Ghar kī Tāmīr*

1 Sulemān ne apnī hukūmat ke chauthe sāl ke dūsre mahīne Zīb meñ Rab ke ghar kī tāmīr shurū kī. Isrāīl ko Misr se nikle 480 sāl guzar chuke the.

2 Imārat kī lambāī 90 fuṭ, chauṛāī 30 fuṭ aur ūñchāī 45 fuṭ thī.

3 Sāmne ek barāmdā banāyā gayā jo imārat jītnā chauṛā yānī 30 fuṭ aur āge kī taraf 15 fuṭ lambā thā.

4 Imārat kī dīwāron̄ meñ khiṛkiyān thīn jin par jangle lage the.

5 Imārat se bāhar ā kar Sulemān ne dāeñ bāeñ kī dīwāron̄ aur pichhlī dīwār ke sāth ek ḡhāñchā khaṛā kiyā jis kī tīn manzileñ thīn aur jis meñ muḡhtalif kamre the.

6 Nichlī manzil kī andar kī chauṛāī sārhe 7 fuṭ, darmiyānī manzil kī 9 fuṭ aur ūpar kī manzil kī sārhe 10 fuṭ thī. Wajah yih thī ki Rab ke ghar

kī bairūnī dīwār kī moṭāī manzil bamanzil kam hotī gaī. Is tarīq̄e se bairūnī ḍhānche kī dūsri aur tisri manzil ke shahtīroñ ke lie Rab ke ghar kī dīwār meñ sūrākh banāne kī zarūrat nahīn thī balki unheñ dīwār par hī rakhā gayā. Yānī darmiyānī manzil kī imārat wālī dīwār nichlī kī dīwār kī nisbat kam moṭī aur ūpar wālī manzil kī imārat wālī dīwār darmiyānī manzil kī dīwār kī nisbat kam moṭī thī. Yoñ is ḍhānche kī chhatoñ ke shahtīroñ ko imārat kī dīwār toṛ kar us meñ lagāne kī zarūrat nahīn thī balki unheñ imārat kī dīwār par hī rakhā gayā.

<sup>7</sup> Jo patthar Rab ke ghar kī tāmīr ke lie istemāl hue unheñ patthar kī kān ke andar hī tarāsh kar taiyār kiya gayā. Is lie jab unheñ zer-e-tāmīr imārat ke pās lā kar joṛā gayā to na hathaurōñ, na chhainī na lohe ke kisī aur auzār kī āwāz sunāī dī.

<sup>8</sup> Is ḍhānche meñ dākḥil hone ke lie imārat kī dahnī dīwār meñ darwāzā banāyā gayā. Wahāñ se ek sīrhī parastār ko darmiyānī aur ūpar kī manzil tak pahuñchātī thī.

<sup>9</sup> Yoñ Sulemān ne imārat ko takmīl tak pahuñchāyā. Chhat ko deodār ke shahtīroñ aur takhtoñ se banāyā gayā.

<sup>10</sup> Jo ḍhānchā imārat ke tīnoñ taraf khaṛā kiya gayā use deodār ke shahtīroñ se imārat kī bāhar wālī dīwār ke sāth joṛā gayā. Us kī tīnoñ manziloñ kī ūñchāī sārhe sāt sāt fuṭ thī.

<sup>11</sup> Ek din Rab Sulemān se hamkalām huā,

<sup>12</sup> “Jahāñ tak merī sukūnatgāh kā tālluq hai jo tū mere lie banā rahā hai, agar tū mere tamām ahkām aur hidāyāt ke mutābiq zindagī guzāre



to main tere lie wuh kuchh karūnga jis kā wādā main ne tere bāp Dāūd se kiyā hai.

13 Tab main Isrāīl ke darmiyān rahūngā aur apnī qaum ko kabhī tark nahīn karūnga.”

### *Rab ke Ghar kā Andarūnī Hissā*

14 Jab imārat kī dīwāroṅ aur chhat mukammal huīn

15 to andarūnī dīwāroṅ par farsh se le kar chhat tak deodār ke taḳhte lagāe gae. Farsh par jūnīpar ke taḳhte lagāe gae.

16 Ab tak imārat kā ek hī kamrā thā, lekin ab us ne deodār ke taḳhton se farsh se le kar chhat tak dīwār kharī karke pichhle hisse meṅ alag kamrā banā diyā jis kī lambāī 30 fuṭ thī. Yih Muqaddastarīn Kamrā ban gayā.

17 Jo hissā sāmne rah gayā use Muqaddas Kamrā muqarrar kiyā gayā. Us kī lambāī 60 fuṭ thī.

18 Imārat kī tamām andarūnī dīwāroṅ par deodār ke taḳhte yoṅ lage the ki kahīn bhī patthar nazar na āyā. Taḳhton par tūnbe aur phūl kandā kie gae the.

19 Pichhle kamre meṅ Rab ke ahd kā sandūq rakhnā thā.

20 Is kamre kī lambāī 30 fuṭ, chauṛāī 30 fuṭ aur ūnchāī 30 fuṭ thī. Sulemān ne is kī tamām dīwāroṅ aur farsh par ḳhālis sonā chaṛhāyā. Muqaddastarīn Kamre ke sāmne deodār kī qurbāngāh thī. Us par bhī sonā mandhā gayā

21 balki imārat ke sāmne wāle kamre kī dīwāroṅ, chhat aur farsh par bhī sonā mandhā

gayā. Muḡaddastarīn Kamre ke darwāze par sone kī zanjireñ lagāi gaīn.

<sup>22</sup> Chunāñche imārat kī tamām andarūnī dīwāroñ, chhat aur farsh par sonā mandhā gayā, aur isī tarah Muḡaddastarīn Kamre ke sāmne kī qurbāngāh par bhī.

<sup>23</sup> Phir Sulemān ne zaitūn kī lakaṛī se do karūbī farishte banwāe jinheñ Muḡaddastarīn Kamre meñ rakhā gayā. In mujassamoñ kā qad 15 fuṭ thā.

<sup>24-25</sup> Donoñ shakl-o-sūrat meñ ek jaise the. Har ek ke do par the, aur har par kī lambāi sārhe sāt sāt fuṭ thī. Chunāñche ek par ke sire se dūsre par ke sire tak kā fāsila 15 fuṭ thā.

<sup>26</sup> Har ek kā qad 15 fuṭ thā.

<sup>27</sup> Unheñ Muḡaddastarīn Kamre meñ yoñ ek dūsre ke sāth khaṛā kiyā gayā ki har farishte kā ek par dūsre ke par se lagtā jabki dāīn aur bāīn taraf har ek kā dūsra par dīwār ke sāth lagtā thā.

<sup>28</sup> In farishtoñ par bhī sonā mandhā gayā.

<sup>29</sup> Muḡaddas aur muḡaddastarīn kamroñ kī dīwāroñ par karūbī farishte, khajūr ke daraḡht aur phūl kandā kie gae.

<sup>30</sup> Donoñ kamroñ ke farsh par bhī sonā mandhā gayā.

<sup>31</sup> Sulemān ne Muḡaddastarīn Kamre kā darwāzā zaitūn kī lakaṛī se banwāyā. Us ke do kiwār the, aur chaukhaṭ kī lakaṛī ke pāñch kone the.

<sup>32</sup> Darwāze ke kiwāroñ par karūbī farishte, khajūr ke daraḡht aur phūl kandā kie gae. In kiwāroñ par bhī farishtoñ aur khajūr ke daraḡhtoñ samet sonā mandhā gayā.

<sup>33</sup> Sulemān ne imārat meñ dākḥil hone wāle darwāze ke lie bhī zaitūn kī lakaṛī se chaukhaṭ banwāī, lekin us kī lakaṛī ke chār kone the.

<sup>34</sup> Is darwāze ke do kiwār jūnīpar kī lakaṛī ke bane hue the. Donoñ kiwār dīwār tak ghūm sakte the.

<sup>35</sup> In kiwāroñ par bhī karūbī farishte, khajūr ke daraḥt aur phūl kandā kie gae the. Phir un par sonā yoñ mandhā gayā ki wuh achchhī tarah in bel-būṭoñ ke sāth lag gayā.

<sup>36</sup> Imārat ke sāmne ek andarūnī sahan banāyā gayā jis kī chārdīwārī yoñ tāmīr huī ki patthar ke har tīn raddoñ ke bād deodār ke shahtīroñ kā ek raddā lagāyā gayā.

<sup>37</sup> Rab ke ghar kī buniyād Sulemān kī hukūmat ke chauthē sāl ke dūsre mahīne Zīb meñ ḍālī gāī,

<sup>38</sup> aur us kī hukūmat ke gyārḥweñ sāl ke āṭḥweñ mahīne būl meñ imārat mukammal huī. Sab kuchh naqshe ke ain mutābiq banā. Is kām par kul sāt sāl sarf hue.

## 7

### *Sulemān kā Mahal*

<sup>1</sup> Jo mahal Sulemān ne banwāyā wuh 13 sāl ke bād mukammal huā.

<sup>2-3</sup> Us kī ek imārat kā nām 'Lubnān kā Jangal' thā. Imārat kī lambāī 150 fuṭ, chaurāī 75 fuṭ aur ūñchāī 45 fuṭ thī. Nichlī manzil ek barā hāl thā jis ke deodār kī lakaṛī ke 45 satūn the. Pandrah pandrah satūnoñ ko tīn qatāroñ meñ kharā kiyā gayā thā. Satūnoñ par shahtīr the jin par dūsri manzil ke farsh ke lie deodār ke taḥte lagāe gae

the. Dūsri manzil ke muḡhtalif kamre the, aur chhat bhī deodār kī lakaṛī se banāī gaī thī.

<sup>4</sup> Hāl kī donon lambī dīwāron meñ tīn tīn khiṛkiyān thīn, aur ek dīwār kī khiṛkiyān dūsri dīwār kī khiṛkiyon ke bilkul muqābil thīn.

<sup>5</sup> In dīwāron ke tīn tīn darwāze bhī ek dūsre ke muqābil the. Un kī chaukhaṭon kī lakaṛī ke chār chār kone the.

<sup>6</sup> Is ke alāwā Sulemān ne satūnon kā hāl banwāyā jis kī lambāī 75 fuṭ aur chauṛāī 45 fuṭ thī. Hāl ke sāmne satūnon kā barāmdā thā.

<sup>7</sup> Us ne dīwān bhī tāmīr kiya jo Dīwān-e-Adl kahlātā thā. Us meñ us kā taḡht thā, aur wahān wuh logon kī adālat kartā thā. Dīwān kī chāron dīwāron par farsh se le kar chhat tak deodār ke taḡhte lage hue the.

<sup>8</sup> Dīwān ke pīchhe sahan thā jis meñ bādshāh kā rihāishī mahal thā. Mahal kā ḍizāyn dīwān jaisā thā. Us kī Misri biwī Firaun kī beṭī kā mahal bhī ḍizāyn meñ dīwān se mutābiqat rakhtā thā.

<sup>9</sup> Yih tamām imāraten buniyādon se le kar chhat tak aur bāhar se le kar baṛe sahan tak ālā qism ke pattharon se banī huī thīn, aise pattharon se jo chāron taraf ārī se nāp ke ain mutābiq kāṭe gae the.

<sup>10</sup> Buniyādon ke lie umdā qism ke baṛe baṛe patthar istemāl hue. Bāz kī lambāī 12 aur bāz kī 15 fuṭ thī.

<sup>11</sup> In par ālā qism ke pattharon kī dīwāren kharī kī gain. Dīwāron meñ deodār ke shahtir bhī lagāe gae.

<sup>12</sup> Baṛe sahan kī chārdīwārī yon banāī gaī ki pattharon ke har tīn raddon ke bād deodār ke shahtiron kā ek raddā lagāyā gayā thā. Jo

andarūnī sahan Rab ke ghar ke irdgird thā us kī chārdiwārī bhī isī tarah hī banāī gai, aur isī tarah Rab ke ghar ke barāmdē kī dīwārēn bhī.

*Rab ke Ghar ke sāmne ke Do Kḥās Satūn*

<sup>13</sup> Phir Sulemān Bādshāh ne Sūr ke ek ādmī ko bulāyā jis kā nām Hīrām thā.

<sup>14</sup> Us kī mān Isrāīlī qabīle Naftālī kī bewā thī jabki us kā bāp Sūr kā rahne wālā aur pītal kā kāriḡar thā. Hīrām baṛī hikmat, samajhdārī aur mahārat se pītal kī har chīz banā saktā thā. Is qism kā kām karne ke lie wuh Sulemān Bādshāh ke pās āyā.

<sup>15</sup> Pahle us ne pītal ke do satūn ḡhāl die. Har satūn kī ūnchāī 27 fuṭ aur gherā 18 fuṭ thā.

<sup>16</sup> Phir us ne har satūn ke lie pītal kā bālāī hissā ḡhāl diyā jis kī ūnchāī sārhe 7 fuṭ thī.

<sup>17</sup> Har bālāī hissē ko ek dūsre ke sāth kḥūbsūratī se milāī gai sāt zanjīroṅ se ārāstā kiyā gayā.

<sup>18-20</sup> In zanjīroṅ ke ūpar Hīrām ne har bālāī hissē ko pītal ke 200 anāroṅ se sajāyā jo do qatāroṅ meṅ lagāe gae. Phir bālāī hissē satūnoṅ par lagāe gae. Bālāī hissoṅ kī sosan ke phūl kī-sī shakl thī, aur yih phūl 6 fuṭ ūnche the.

<sup>21</sup> Hīrām ne donoṅ satūn Rab ke ghar ke barāmdē ke sāmne khaṛe kie. Dahne hāth ke satūn kā nām us ne ‘Yakīn’ aur bāeṅ hāth ke satūn kā nām ‘Boaz’ rakhā.

<sup>22</sup> Bālāī hissē sosan-numā the. Chunānche kām mukammal huā.

*Pītal kā Hauz*

<sup>23</sup> Is ke bād Hīrām ne pītal kā baṛā gol hauz ḡhāl diyā jis kā nām ‘Samundar’ rakhā gayā. Us

kī ūnchāī sārhe 7 fuṭ, us kā muñh 15 fuṭ chaurā aur us kā gherā taqriban 45 fuṭ thā.

<sup>24</sup> Hauz ke kināre ke nīche tūnboñ kī do qatāreñ thīñ. Fī fuṭ taqriban 6 tūnbe the. Tūnbe aur hauz mil kar ḍhāle gae the.

<sup>25</sup> Hauz ko bailoñ ke 12 mujassamoñ par rakhā gayā. Tīn bailoñ kā ruḵh shimāl kī taraf, tīn kā ruḵh maḡhrib kī taraf, tīn kā ruḵh junūb kī taraf aur tīn kā ruḵh mashriq kī taraf thā. Un ke picḥhle hisse hauz kī taraf the, aur hauz un ke kandhoñ par paṛā thā.

<sup>26</sup> Hauz kā kinārā pyāle balki sosan ke phūl kī tarah bāhar kī taraf muṛā huā thā. Us kī dīwār taqriban tīn inch moṭī thī, aur hauz meñ pānī ke taqriban 44,000 liṭar samā jāte the.

### *Pānī ke Bāsan Uṭhāne kī Hathgāriyāñ*

<sup>27</sup> Phir Hīrām ne pānī ke bāsan uṭhāne ke lie pīṭal kī hathgāriyāñ banāīñ. Har gāri kī lambāī 6 fuṭ, chaurāī 6 fuṭ aur ūnchāī sārhe 4 fuṭ thī.

<sup>28</sup> Har gāri kā ūpar kā hissā sariyoñ se mazbūt kiya gayā frem thā.

<sup>29</sup> Frem ke bairūnī pahlū sherbabaroñ, bailoñ aur karūbī farishtoñ se saje hue the. Sheroñ aur bailoñ ke ūpar aur nīche pīṭal ke sehre lage hue the.

<sup>30</sup> Har gāri ke chār pahie aur do dhure the. Yih bhī pīṭal ke the. Chāroñ konoñ par pīṭal ke aise ṭukre lage the jin par bāsan rakhe jāte the. Yih ṭukre bhī sehroñ se saje hue the.

<sup>31</sup> Frem ke andar jis jagah bāsan ko rakhā jāta thā wuh gol thī. Us kī ūnchāī ḍerḥ fuṭ thī, aur us kā muñh sawā do fuṭ chaurā thā. Us ke bairūnī

pahlū par chīzeñ kandā kī gaī thīñ. Gārī kā frem gol nahīñ balki chauras thā.

<sup>32</sup> Gārī ke frem ke niche mazkūrā chār pahie the jo dhuroñ se juṛe the. Dhure frem ke sāth hī ḍhal gae the. Har pahiyā sawā do fuṭ chauṛā thā.

<sup>33</sup> Pahie rathoñ ke pahiyon kī mānind the. Un ke dhure, kināre, tār aur nābheñ sab ke sab pītal se ḍhāle gae the.

<sup>34</sup> Gārīyon ke chār konoñ par daste lage the jo frem ke sāth mil kar ḍhāle gae the.

<sup>35-36</sup> Har gārī ke ūpar kā kinārā nau inch ūñchā thā. Konoñ par lage daste aur frem ke pahlū har jagah karūbī farishtoñ, sherbabaron aur khajūr ke daraḥtoñ se saje hue the. Chāroñ taraf sehre bhī kandā kie gae.

<sup>37</sup> Hīrām ne dason gārīyon ko ek hī sāñche meñ ḍhālā, is lie sab ek jaisī thīñ.

<sup>38</sup> Hīrām ne har gārī ke lie pītal kā bāsan ḍhāl diyā. Har bāsan 6 fuṭ chauṛā thā, aur us meñ 880 liṭar pānī samā jātā thā.

<sup>39</sup> Us ne pāñch gārīyāñ Rab ke ghar ke dāeñ hāth aur pāñch us ke bāeñ hāth kharī kīñ. Hauz banām Samundar ko us ne Rab ke ghar ke junūb-mashriq meñ rakh diyā.

### *Us Sāmān kī Fahrīst Jo Hīrām ne Banāyā*

<sup>40</sup> Hīrām ne bāsan, belche aur chhīrkāw ke kaṭore bhī banāe. Yoñ us ne Rab ke ghar meñ wuh sārā kām mukammal kiyā jis ke lie Sulemān Bādshāh ne use bulāyā thā. Us ne zail kī chīzeñ banāñ:

<sup>41</sup> do satūn,  
satūnoñ par lage pyālānumā bālāi hisse,

bālāi hissoñ par lagī zanjīroñ kā ñizāyn,  
<sup>42</sup> zanjīroñ ke ūpar lage anār (fī bālāi hissā 200  
 adad),

<sup>43</sup> 10 hathgāriyāñ,  
 in par ke pānī ke 10 bāsan,

<sup>44</sup> hauz banām Samundar,  
 ise uṭhāne wāle bail ke 12 mujassame,

<sup>45</sup> bālṭiyāñ, belche aur chhiṛkāw ke kaṭore.

Yih tamām sāmān jo Hirām ne Sulemān ke  
 hukm par Rab ke ghar ke lie banāyā pītal se ḍhāl  
 kar pālīsh kiyā gayā thā.

<sup>46</sup> Bādshāh ne use Wādī-e-Yardan meñ Sukkāt  
 aur Zartān ke darmiyān ḍhalwāyā. Wahāñ ek  
 fauḍarī thī jahāñ Hirām ne gāre ke sāñche  
 banā kar har chīz ḍhāl dī.

<sup>47</sup> Is sāmān ke lie Sulemān Bādshāh ne itnā  
 zyādā pītal istemāl kiyā ki us kā kul wazn mālūm  
 na ho sakā.

### *Rab ke Ghar ke Andar Sone kā Sāmān*

<sup>48</sup> Rab ke ghar ke andar ke lie Sulemān ne darj-  
 e-zail sāmān banwāyā:

sone kī qurbāngāh,

sone kī wuh mez jis par Rab ke lie maḥsūs  
 roṭiyāñ paṛī rahtī thīñ,

<sup>49</sup> ḳhālis sone ke 10 shamādān jo Muḳad-  
 dastarīn Kamre ke sāmne rakhe gae. Pāñch  
 darwāze ke dahne hāth aur pāñch us ke bāeñ  
 hāth,

sone ke wuh phūl jin se shamādān ārāstā the,  
 sone ke charāgh aur battī ko bujhāne ke auzār,

<sup>50</sup> ḳhālis sone ke bāsan, charāgh ko katarne ke  
 auzār, chhiṛkāw ke kaṭore aur pyāle,

jalte hue koele ke lie ḳhālis sone ke bartan,



Muqaddastarīn Kamre aur baṛe hāl ke darwāzoṅ ke qabze.

<sup>51</sup> Rab ke ghar kī takmīl par Sulemān Bādshāh ne wuh sonā-chāndī aur bāqī tamām qīmtī chīzeṅ Rab ke ghar ke k̄hazānoṅ meṅ rakhwā dīn jo us ke bāp Dāūd ne Rab ke lie maḵhsūs kī thīn.

## 8

### *Ahd kā Sandūq Rab ke Ghar meṅ Lāyā Jātā Hai*

<sup>1</sup> Phir Sulemān ne Isrāīl ke tamām buzurgoṅ aur qabīloṅ aur kunboṅ ke tamām sarparastoṅ ko apne pās Yarūshalam meṅ bulāyā, kyoṅki Rab ke ahd kā sandūq ab tak Yarūshalam ke us hisse meṅ thā jo ‘Dāūd kā Shahr’ yā Siyyūn kahlātā hai. Sulemān chāhtā thā ki qaum ke numāinde hāzir hoṅ jab sandūq ko wahān se Rab ke ghar meṅ pahuṅchāyā jāe.

<sup>2</sup> Chunānche Isrāīl ke tamām mard sāl ke sātweṅ mahīne Itānīm\* meṅ Sulemān Bādshāh ke pās Yarūshalam meṅ jamā hue. Isī mahīne meṅ Jhoṅp̄riyoṅ kī Īd manāī jāti thī.

<sup>3</sup> Jab sab jamā hue to imām Rab ke sandūq ko uṭhā kar

<sup>4</sup> Rab ke ghar meṅ lāe. Lāwīyoṅ ke sāth mil kar unhoṅ ne mulāqāt ke k̄haimē ko bhī us ke tamām muqaddas sāmān samet Rab ke ghar meṅ pahuṅchāyā.

<sup>5</sup> Wahān sandūq ke sāmne Sulemān Bādshāh aur bāqī tamām jamā hue Isrāīliyoṅ ne itnī bheṛ-bakriyāṅ aur gāy-bail qurbān kie ki un kī tādād ginī nahīn jā saktī thī.

\* **8:2** Sitambar tā Aktūbar.

<sup>6</sup> Imāmoñ ne Rab ke ahd kā sandūq pichhle yānī Muqaddastarīn Kamre meñ lā kar karūbī farishtoñ ke paroñ ke nīche rakh diyā.

<sup>7</sup> Farishtoñ ke par pūre sandūq par us kī uṭhāne kī lakariyoñ samet phaile rahe.

<sup>8</sup> To bhī uṭhāne kī yih lakariyāñ itnī lambī thīñ ki un ke sire sāmne wāle yānī Muqaddas Kamre se nazar āte the. Lekin wuh bāhar se dekhe nahīñ jā sakte the. Aj tak wuh wahīñ maujūd haiñ.

<sup>9</sup> Sandūq meñ sirf patthar kī wuh do taḥtiyāñ thīñ jin ko Mūsā ne Horib yānī Koh-e-Sīnā ke dāman meñ us meñ rakh diyā thā, us waqt jab Rab ne Misr se nikle hue Isrāīliyoñ ke sāth ahd bāndhā thā.

<sup>10-11</sup> Jab imām Muqaddas Kamre se nikal kar sahan meñ āe to Rab kā ghar ek bādāl se bhar gayā. Imām apnī k̄hidmat anjām na de sake, kyoñki Rab kā ghar us ke jalāl ke bādāl se māmūr ho gayā thā.

<sup>12</sup> Yih dekh kar Sulemān ne duā kī, “Rab ne farmāyā hai ki maiñ ghane bādāl ke andhere meñ rahūngā.

<sup>13</sup> Yaqīnan maiñ ne tere lie azīm sukūnatgāh banāi hai, ek maqām jo terī abādī sukūnat ke lāyq hai.”

### *Rab ke Ghar kī Maḥsūsiyat par Sulemān kī Taqrīr*

<sup>14</sup> Phir bādshāh ne muṛ kar Rab ke ghar ke sāmne kharī Isrāīl kī pūrī jamāt kī taraf ruḥh kiyā. Us ne unheñ barkat de kar kahā,

15 “Rab Isrāil ke Ḳhudā kī tārīf ho jis ne wuh wādā pūrā kiyā hai jo us ne mere bāp Dāūd se kiyā thā. Kyoṅki us ne farmāyā,

16 ‘Jis din main apnī qaum Isrāil ko Misr se nikāl lāyā us din se le kar āj tak main ne kabhī na farmāyā ki Isrāilī qabīloṅ ke kisī shahr meṅ mere nām kī tazīm meṅ ghar banāyā jāe. Lekin main ne Dāūd ko apnī qaum Isrāil kā bādshāh banāyā hai.’

17 Mere bāp Dāūd kī baṛī ḳhāhish thī ki Rab Isrāil ke Ḳhudā ke nām kī tazīm meṅ ghar banāe.

18 Lekin Rab ne etarāz kiyā, ‘Main ḳhush hūn ki tū mere nām kī tazīm meṅ ghar tāmīr karnā chāhtā hai,

19 lekin tū nahīn balki terā beṭā hī use banāegā.’

20 Aur wāqaī, Rab ne apnā wādā pūrā kiyā hai. Main Rab ke wāde ke ain mutābiq apne bāp Dāūd kī jagah Isrāil kā bādshāh ban kar taḳht par baiṭh gayā hūn. Aur ab main ne Rab Isrāil ke Ḳhudā ke nām kī tazīm meṅ ghar bhī banāyā hai.

21 Us meṅ main ne us sandūq ke lie maqām taiyār kar rakhā hai jis meṅ sharīat kī taḳhtiyān paṛī haiṅ, us ahd kī taḳhtiyān jo Rab ne hamāre bāpdādā se Misr se nikālte waqt bāndhā thā.”

### *Rab ke Ghar kī Maḳhsūsiyat par Sulemān kī Duā*

22 Phir Sulemān Isrāil kī pūrī jamāt ke deḳhte deḳhte Rab kī qurbāngāh ke sāmne khaṛā huā. Us ne apne hāth āsmān kī taraf uṭhā kar

23 duā kī,

“Ai Rab Isrāīl ke Ḳhudā, tujh jaisā koī Ḳhudā nahīn hai, na āsmān aur na zamīn par. Tū apnā wuh ahd qāym rakhtā hai jise tū ne apnī qaum ke sāth bāndhā hai aur apnī mehrbānī un sab par zāhir kartā hai jo pūre dil se terī rāh par chalte haiñ.

<sup>24</sup> Tū ne apne ḳhādim Dāūd se kiyā huā wādā pūrā kiyā hai. Jo bāt tū ne apne muñh se mere bāp se kī wuh tū ne apne hāth se āj hī pūrī kī hai.

<sup>25</sup> Ai Rab Isrāīl ke Ḳhudā, ab apnī dūsri bāt bhī pūrī kar jo tū ne apne ḳhādim Dāūd se kī thī. Kyoñki tū ne mere bāp se wādā kiyā thā, ‘Agar terī aulād terī tarah apne chāl-chalan par dhyān de kar mere huzūr chaltī rahe to Isrāīl par us kī hukūmat hameshā tak qāym rahegi.’

<sup>26</sup> Ai Isrāīl ke Ḳhudā, ab barāh-e-karm apnā yih wādā pūrā kar jo tū ne apne ḳhādim mere bāp Dāūd se kiyā hai.

<sup>27</sup> Lekin kyā Allāh wāqai zamīn par sukūnat karegā? Nahīn, tū to bulandtarīn āsmān meñ bhī samā nahīn saktā! To phir yih makān jo main ne banāyā hai kis tarah terī sukūnatgāh ban saktā hai?

<sup>28</sup> Ai Rab mere Ḳhudā, to bhī apne ḳhādim kī duā aur iltijā sun jab main āj tere huzūr pukarte hue iltamās kartā hūñ

<sup>29</sup> ki barāh-e-karm din rāt is imārat kī nigarānī kar! Kyoñki yih wuh jagah hai jis ke bāre meñ tū ne ḳhud farmāyā, ‘Yahān merā nām sukūnat karegā.’ Chunāñche apne ḳhādim kī guzārish sun jo main is maqām kī taraf ruḳh kie hue kartā hūñ.

<sup>30</sup> Jab ham is maqām kī taraf ruḡh karke duā karen̄ to apne ḡhādīm aur apnī qaum kī iltijā sun. Āsmān par apne taḡht se hamārī sun. Aur jab sunegā to hamāre gunāhoñ ko muāf kar!

<sup>31</sup> Agar kisī par ilzām lagāyā jāe aur use yahān terī qurbāngāh ke sāmne lāyā jāe tāki halaf uṡhā kar wādā kare ki main bequsūr hūñ

<sup>32</sup> to barāh-e-karm āsmān par se sun kar apne ḡhādimoñ kā insāf kar. Qusūrwār ko mujrim ṡhahrā kar us ke apne sar par wuh kuchh āne de jo us se sarzad huā hai, aur bequsūr ko be'ilzām qarār de kar us kī rāstbāzī kā badlā de.

<sup>33</sup> Ho saktā hai kisī waqt terī qaum Isrāīl terā gunāh kare aur natīje meñ dushman ke sāmne shikast khāe. Agar Isrāīlī āḡhirkār tere pās lauṡ āeñ aur tere nām kī tamjīd karke yahān is ghar meñ tujh se duā aur iltamās karen̄

<sup>34</sup> to āsmān par se un kī fariyād sun lenā. Apnī qaum Isrāīl kā gunāh muāf karke unheñ dubārā us mulk meñ wāpas lānā jo tū ne un ke bāpdādā ko de diyā thā.

<sup>35</sup> Ho saktā hai Isrāīlī terā itnā sangīn gunāh karen̄ ki kāl paṡe aur baṡī der tak bārish na barse. Agar wuh āḡhirkār is ghar kī taraf ruḡh karke tere nām kī tamjīd karen̄ aur terī sazā ke bāis apnā gunāh chhoṡ kar lauṡ āeñ

<sup>36</sup> to āsmān par se un kī fariyād sun lenā. Apne ḡhādimoñ aur apnī qaum Isrāīl ko muāf kar, kyōñki tū hī unheñ achchhī rāh kī tālīm detā hai. Tab us mulk par dubārā bārish barsā de jo tū ne apnī qaum ko mīrās meñ de diyā hai.

<sup>37</sup> Ho saktā hai Isrāīl meñ kāl par jāe, anāj kī fasal kisī bīmārī, phaphūndī, ṭiḍḍiyon yā kīron se muta'assir ho jāe, yā dushman kisī shahr kā muhāsarā kare. Jo bhī musībat yā bīmārī ho,

<sup>38</sup> agar koī Isrāīlī yā terī pūrī qaum us kā sabab jān kar apne hāthoñ ko is ghar kī taraf barhāe aur tujh se iltamās kare

<sup>39</sup> to āsmān par apne taḡht se un kī fariyād sun lenā. Unheñ muāf karke wuh kuchh kar jo zarūrī hai. Har ek ko us kī tamām harkatoñ kā badlā de, kyoñki sirf tū hī har insān ke dil ko jāntā hai.

<sup>40</sup> Phir jitnī der wuh us mulk meñ zindagī guzāreñge jo tū ne hamāre bāpdādā ko diyā thā utnī der wuh terā ḡhauf māneñge.

<sup>41</sup> Āindā padesī bhī tere nām ke sabab se dūr-darāz mamālik se āeñge. Agarche wuh terī qaum Isrāīl ke nahīñ hoñge

<sup>42</sup> to bhī wuh tere azīm nām, terī baḡī qudrat aur tere zabardast kāmoñ ke bāre meñ sun kar āeñge aur is ghar kī taraf ruḡh karke duā kareñge.

<sup>43</sup> Tab āsmān par se un kī fariyād sun lenā. Jo bhī darḡhāst wuh pesh kareñ wuh pūrī karnā tāki duniyā kī tamām aḡwām terā nām jān kar terī qaum Isrāīl kī tarah hī terā ḡhauf māneñ aur jān leñ ki jo imārat maiñ ne tāmīr kī hai us par tere hī nām kā ṡhappā lagā hai.

<sup>44</sup> Ho saktā hai terī qaum ke mard terī hidāyat ke mutābiq apne dushman se laḡne ke lie nikleñ. Agar wuh tere chune hue shahr aur us imārat kī taraf ruḡh karke duā kareñ jo maiñ ne tere nām ke lie tāmīr kī hai

<sup>45</sup> to āsmān par se un kī duā aur iltamās sun kar un ke haq meñ insāf qāym rakhnā.

<sup>46</sup> Ho saktā hai wuh terā gunāh karen, aisī harkateñ to ham sab se sarzad hotī rahtī haiñ, aur natīje meñ tū nārāz ho kar unheñ dushman ke hawāle kar de jo unheñ qaid karke apne kisī dūr-darāz yā qarībī mulk meñ le jāe.

<sup>47</sup> Shāyad wuh jilāwatanī meñ taubā karke dubārā terī taraf rujū karen aur tujh se iltamās karen, ‘Ham ne gunāh kiyā hai, ham se ġhaltī huī hai, ham ne bedīn harkateñ kī haiñ.’

<sup>48</sup> Agar wuh aisā karke dushman ke mulk meñ apne pūre dil-o-jān se dubārā terī taraf rujū karen aur terī taraf se bāpdādā ko die gae mulk, tere chune hue shahr aur us imārat kī taraf rukh karke duā karen jo maiñ ne tere nām ke lie tāmīr kī hai

<sup>49</sup> to āsmān par apne taḡht se un kī duā aur iltamās sun lenā. Un ke haq meñ insāf qāym karnā,

<sup>50</sup> aur apnī qaum ke gunāhoñ ko muāf kar denā. Jis bhī jurm se unhoñ ne terā gunāh kiyā hai wuh muāf kar denā. Baḡhsh de ki unheñ giriftār karne wāle un par rahm karen.

<sup>51</sup> Kyoñki yih terī hī qaum ke afrād haiñ, terī hī mīrās jise tū Mīsr ke bhaḡakte bhaḡte se nikāl lāyā.

<sup>52</sup> Ai Allāh, terī ānkheñ merī iltijāoñ aur terī qaum Isrāīl kī fariyādoñ ke lie khulī raheñ. Jab bhī wuh madad ke lie tujhe pukāreñ to un kī sun lenā!

<sup>53</sup> Kyoñki tū, ai Rab Qādir-e-mutlaq ne Isrāīl ko duniyā kī tamām qaumoñ se alag karke apnī

ḳhās milkiyat banā liyā hai. Hamāre bāpdādā ko Misr se nikālṭe waqt tū ne Mūsā kī mārifat is haqīqat kā elān kiyā.”

### *Āḳhirī Duā aur Barkat*

<sup>54</sup> Is duā ke bād Sulemān khaṛā huā, kyoṅki duā ke daurān us ne Rab kī qurbāngāh ke sāmne apne ghuṭne ṭeke aur apne hāth āsmān kī taraf uṭhāe hue the.

<sup>55</sup> Ab wuh Isrāīl kī pūrī jamāt ke sāmne khaṛā huā aur buland āwāz se use barkat dī,

<sup>56</sup> “Rab kī tamjīd ho jis ne apne wāde ke ain mutābiq apnī qaum Isrāīl ko ārām-o-sukūn farāham kiyā hai. Jitne bhī ḳhūbsūrat wāde us ne apne ḳhādīm Mūsā kī mārifat kie haiṅ wuh sab ke sab pūre ho gae haiṅ.

<sup>57</sup> Jis tarah Rab hamārā Ḳhudā hamāre bāpdādā ke sāth thā usī tarah wuh hamāre sāth bhī rahe. Na wuh hameṅ chhoṛe, na tark kare

<sup>58</sup> balki hamāre diloṅ ko apnī taraf māyl kare tāki ham us kī tamām rāhoṅ par chaleṅ aur un tamām ahkām aur hidāyāt ke tābe raheṅ jo us ne hamāre bāpdādā ko dī haiṅ.

<sup>59</sup> Rab ke huzūr merī yih fariyād din rāt Rab hamāre Ḳhudā ke qarīb rahe tāki wuh merā aur apnī qaum kā insāf qāym rakhe aur hamārī rozānā zarūriyāt pūrī kare.

<sup>60</sup> Tab tamām aqwām jān leṅgī ki Rab hī Ḳhudā hai aur ki us ke siwā koī aur mābūd nahīṅ hai.

<sup>61</sup> Lekin lāzim hai ki āp Rab hamāre Ḳhudā ke pūre dil se wafādār raheṅ. Hameshā us kī hidāyāt aur ahkām ke mutābiq zindagī guzāreṅ, bilkul usī tarah jis tarah āp āj kar rahe haiṅ.”



### *Rab ke Ghar kī Maḥsūsiyat par Jashn*

<sup>62-63</sup> Phir bādshāh aur tamām Isrāīl ne Rab ke huzūr qurbāniyān pesh karke Rab ke ghar ko maḥsūs kiyā. Is silsile meñ Sulemān ne 22,000 gāy-bailoñ aur 1,20,000 bheṛ-bakriyoñ ko salāmatī kī qurbāniyoñ ke taur par zabah kiyā.

<sup>64</sup> Usī din bādshāh ne sahan kā darmiyānī hissā qurbāniyān chaṛhāne ke lie maḥsūs kiyā. Wajah yih thī ki pital kī qurbāngāh itnī qurbāniyān pesh karne ke lie chhoṭī thī, kyonki bhasm hone wālī qurbāniyoñ aur ḡhallā kī nazon kī tādād bahut zyādā thī. Is ke alāwā salāmatī kī beshumār qurbāniyoñ kī charbī ko bhī jalānā thā.

<sup>65</sup> Īd 14 din tak manāī gāī. Pahle hafte meñ Sulemān aur tamām Isrāīl ne Rab ke ghar kī maḥsūsiyat manāī aur dūsre hafte meñ Jhoñp̄riyoñ kī Īd. Bahut zyādā log sharīk hue. Wuh dūr-darāz ilāqoñ se Yarūshalam āe the, shimāl meñ Labo-hamāt se le kar junūb meñ us wādī tak jo Misr kī sarhad thī.

<sup>66</sup> Do haftoñ ke bād Sulemān ne Isrāīliyoñ ko ruḥsat kiyā. Bādshāh ko barkat de kar wuh apne apne ghar chale gae. Sab shādmān aur dil se ḡhush the ki Rab ne apne ḡhādim Dāūd aur apnī qaum Isrāīl par itnī mehrbānī kī hai.

## 9

### *Rab Sulemān se Hamkalām Hotā Hai*

<sup>1</sup> Chunāñche Sulemān ne Rab ke ghar aur shāhī mahal ko takmīl tak pahuñchāyā. Jo kuchh bhī us ne ṭhān liyā thā wuh pūrā huā.

<sup>2</sup> Us waqt Rab dubārā us par zāhir huā, us tarah jis tarah wuh Jibaūn meñ us par zāhir huā thā.

<sup>3</sup> Us ne Sulemān se kahā,

“Jo duā aur iltijā tū ne mere huzūr kī use main ne sun kar is imārat ko jo tū ne banāi hai apne lie maḥsūs-o-muqaddas kar liyā hai. Us meñ main apnā nām abad tak qāym rakhūngā. Merī ānkheñ aur dil abad tak wahān hāzir raheñge.

<sup>4</sup> Jahān tak terā tālluq hai, apne bāp Dāūd kī tarah diyānatdārī aur rāstī se mere huzūr chaltā rah. Kyoñki agar tū mere tamām ahkām aur hidāyāt kī pairawī kartā rahe

<sup>5</sup> to main terī Isrāil par hukūmat hameshā tak qāym rakhūngā. Phir merā wuh wādā qāym rahegā jo main ne tere bāp Dāūd se kiyā thā ki Isrāil par terī aulād kī hukūmat hameshā tak qāym rahegī.

<sup>6</sup> Lekin ḵhabardār! Agar tū yā terī aulād mujh se dūr ho kar mere die gae ahkām aur hidāyāt ke tābe na rahe balki dīgar mābūdoñ kī taraf rujū karke un kī ḵhidmat aur parastish kare

<sup>7</sup> to main Isrāil ko us mulk meñ se miṭā dūngā jo main ne un ko de diyā thā. Na sirf yih balki main is ghar ko bhī radd kar dūngā jo main ne apne nām ke lie maḥsūs-o-muqaddas kar liyā hai. Us waqt Isrāil tamām aqwām meñ mazāq aur lān-tān kā nishānā ban jāegā.

<sup>8</sup> Is shāndār ghar kī burī hālat dekh kar yahān se guzarne wāle tamām logoñ ke roñgṭe khare ho jāeñge, aur wuh apnī hiqārat kā izhār karke pūchheñge, ‘Rab ne is mulk aur is ghar se aisā sulūk kyoñ kiyā?’

<sup>9</sup> Tab log jawāb deṅge, ‘Is lie ki go Rab un kā Ḳhudā un ke bāpdādā ko Misr se nikāl kar yahān lāyā to bhī yih log use tark karke dīgar mābūdoṅ se chimaṭ gae haiṅ. Chūnki wuh un kī parastish aur ḳhidmat karne se bāz na āe is lie Rab ne unheṅ is sārī musībat meṅ ḍāl diyā hai.’ ”

### *Hīrām kī Madad kā Silā*

<sup>10</sup> Rab ke ghar aur shāhī mahal ko tāmīr karne meṅ 20 sāl sarf hue the.

<sup>11</sup> Us daurān Sūr kā bādshāh Hīrām Sulemān ko deodār aur jūnīpar kī utnī lakaṛī aur utnā sonā bhejtā rahā jitnā Sulemān chāhtā thā. Jab imārateṅ takmīl tak pahunch gaīn to Sulemān ne Hīrām ko muāwaze meṅ Galīl ke 20 shahr de die.

<sup>12</sup> Lekin jab Hīrām un kā muāynā karne ke lie Sūr se Galīl āyā to wuh use pasand na āe.

<sup>13</sup> Us ne sawāl kiyā, “Mere bhāī, yih kaise shahr haiṅ jo āp ne mujhe die haiṅ?” Aur us ne us ilāqe kā nām Kābūl yānī ‘Kuchh Bhī Nahīn’ rakhā. Yih nām āj tak rāyj hai.

<sup>14</sup> Bāt yih thī ki Hīrām ne Isrāīl ke bādshāh ko taqṛīban 4,000 kilogrām sonā bhejā thā.

### *Sulemān kī Mukhtalif Muhimmāt*

<sup>15</sup> Sulemān ne apne tāmīrī kām ke lie begārī lagāe. Aise hī logon kī madad se us ne na sirf Rab kā ghar, apnā mahal, irdgird ke chabūtare aur Yarūshalam kī fasīl banwāī balki tīnoṅ shahr Hasūr, Majiddo aur Jazar ko bhī.

<sup>16</sup> Jazar Shahr par Misr ke bādshāh Firaun ne hamlā karke qabzā kar liyā thā. Us ke Kanānī bāshindoṅ ko qatl karke us ne pūre shahr ko jalā diyā thā. Jab Sulemān kī Firaun kī beṭī se shādī

huī to Misrī bādshāh ne jahez ke taur par use yih ilāqā de diyā.

<sup>17</sup> Ab Sulemān ne Jazar kā shahr dubārā tāmīr kiyā. Is ke alāwā us ne Nashebī Bait-haurūn,

<sup>18</sup> Bālāt aur registān ke shahr Tadmūr meñ bahut-sā tāmīrī kām karāyā.

<sup>19</sup> Sulemān ne apne godāmoñ ke lie aur apne rathoñ aur ghoṛoñ ko rakhne ke lie bhī shahr banwāe. Jo kuchh bhī wuh Yarūshalam, Lubnān yā apnī saltanat kī kisī aur jagah banwānā chāhtā thā wuh us ne banwāyā.

<sup>20-21</sup> Jin ādmiyoñ kī Sulemān ne begār par bhartī kī wuh Isrāīlī nahīn the balki Amorī, Hittī, Farizzī, Hiwwī aur Yabūsī yānī Kanān ke pahle bāshindoñ kī wuh aulād the jo bāqī rah gae the. Mulk par qabzā karte waqt Isrāīlī in qaumoñ ko pūre taur par miṭā na sake, aur āj tak in kī aulād ko Isrāīl ke lie begār meñ kām karnā paṛtā hai.

<sup>22</sup> Lekin Sulemān ne Isrāīliyoñ meñ se kisī ko bhī aise kām karne par majbūr na kiyā balki wuh us ke faujī, sarkārī afsar, fauj ke afsar aur rathoñ ke faujī ban gae. Aur unheñ us ke rathoñ aur ghoṛoñ par muqarrar kiyā gayā.

<sup>23</sup> Sulemān ke tāmīrī kām par bhī 550 Isrāīlī muqarrar the jo ziloñ par muqarrar afsaroñ ke tābe the. Yih log tāmīrī kām karne wāloñ kī nigaranī karte the.

<sup>24</sup> Jab Firaun kī beṭī Yarūshalam ke purāne hisse banām ‘Dāūd kā Shahr’ se us mahal meñ muntaqil huī jo Sulemān ne us ke lie tāmīr kiyā thā to wuh irdgird ke chabūtare banwāne lagā.

<sup>25</sup> Sulemān sāl meñ tīn bār Rab ko bhasm hone wālī aur salāmatī kī qurbāniyān pesh kartā thā.

Wuh unheñ Rab ke ghar kī us qurbāngāh par chaṛhātā thā jo us ne Rab ke lie banwāī thī. Sāth sāth wuh baḥhūr bhī jalātā thā. Yoñ us ne Rab ke ghar ko takmīl tak pahuñchāyā.

<sup>26</sup> Is ke alāwā Sulemān Bādshāh ne baharī jahāzoñ kā beṛā bhī banwāyā. Is kām kā markaz Ailāt ke qarīb shahr Asyūn-jābar thā. Yih bandargāh Mul-e-Adom meñ Bahr-e-Qulzum ke sāhil par hai.

<sup>27</sup> Hīrām Bādshāh ne use tajrabākār mallāh bheje tāki wuh Sulemān ke ādmiyoñ ke sāth mil kar jahāzoñ ko chalāeñ.

<sup>28</sup> Unhoñ ne Ofīr tak safr kiyā aur wahāñ se taqriban 14,000 kilogrām sonā Sulemān ke pās le āe.

## 10

### *Sabā kī Malikā Sulemān se Miltī Hai*

<sup>1</sup> Sulemān kī shohrat Sabā kī malikā tak pahuñch gaī. Jab us ne us ke bāre meñ sunā aur yih bhī ki us ne Rab ke nām ke lie kyā kuchh kiyā hai to wuh Sulemān se milne ke lie rawānā huī tāki use mushkil paheliyāñ pesh karke us kī dānishmandī jāñch le.

<sup>2</sup> Wuh nihāyat baṛe qāfile ke sāth Yarūshalam pahuñchī jis ke ūñṭ balsān, kasrat ke sone aur qīmtī jawāhar se lade hue the.

Malikā kī Sulemān se mulāqāt huī to us ne us se wuh tamām mushkil sawālāt pūchhe jo us ke zahan meñ the.

<sup>3</sup> Sulemān us ke har sawāl kā jawāb de sakā. Koī bhī bāt itnī pechīdā nahīn thī ki bādshāh us kā matlab malikā ko batā na saktā.

4 Sabā kī malikā Sulemān kī wasī hikmat aur us ke nae mahal se bahut muta'assir huī.

5 Us ne bādshāh kī mezon par ke mukhtalif khāne dekhe aur yih ki us ke afsar kis tartīb se us par biṭhāe jāte the. Us ne bairon kī ḳhidmat, un kī shāndār wardiyon aur sāqiyon par bhī ḡhaur kiyā. Jab us ne in bāton ke alāwā bhasm hone wālī wuh qurbāniyān bhī dekhīn jo Sulemān Rab ke ghar meñ chaḥātā thā to malikā hakkā-bakkā rah gaī.

6 Wuh bol uṭhī, “Wāqaī, jo kuchh maiñ ne apne mulk meñ āp ke shāhkāron aur hikmat ke bāre meñ sunā thā wuh durust hai.

7 Jab tak maiñ ne ḳhud ā kar yih sab kuchh apnī ānkhoñ se na dekhā mujhe yaqīn nahīn ātā thā. Balki haqīqat meñ mujhe āp ke bāre meñ ādhā bhī nahīn batāyā gayā thā. Āp kī hikmat aur daulat un riṭon se kahīn zyādā hai jo mujh tak pahuñchī thīn.

8 Āp ke log kitne mubāarak haiñ! Āp ke afsar kitne mubāarak haiñ jo musalsal āp ke sāmne khare rahte aur āp kī dānish bhārī bāteñ sunte haiñ!

9 Rab āp ke Ḳhudā kī tamjīd ho jis ne āp ko pasand karke Isrāīl ke taḫt par biṭhāyā hai. Rab Isrāīl se abadī muhabbat rakhtā hai, isī lie us ne āp ko bādshāh banā diyā hai tākī insāf aur rāstbāzī qāym rakheñ.”

10 Phir malikā ne Sulemān ko taqrīban 4,000 kilogrām sonā, bahut zyādā balsān aur jawāhar die. Bād meñ kabhī bhī utnā balsān Isrāīl meñ nahīn lāyā gayā jitnā us waqt Sabā kī malikā lāī.

11 Hīrām ke jahāz Ofīr se na sirf sonā lāe

balki unhoñ ne qīmtī lakaṛī aur jawāhar bhī baṛī miqdār meñ Isrāīl tak pahuñchāe.

<sup>12</sup> Jitnī qīmtī lakaṛī un dinon meñ darāmad huī utnī āj tak kabhī Yahūdāh meñ nahīn lāī gaī. Is lakaṛī se bādshāh ne Rab ke ghar aur apne mahal ke lie kaṭahre banwāe. Yih mausiqāron ke sarod aur sitār banāne ke lie bhī istemāl huī.

<sup>13</sup> Sulemān Bādshāh ne apnī taraf se Sabā kī malikā ko bahut-se tohfe die. Nīz, jo kuchh bhī malikā chāhtī thī yā us ne māngā wuh use diyā gayā. Phir wuh apne naukar-chākaron aur afsaron ke hamrāh apne watan wāpas chalī gaī.

### *Sulemān kī Daulat aur Shohrat*

<sup>14</sup> Jo sonā Sulemān ko sālānā miltā thā us kā wazn taqṛīban 23,000 kilogrām thā.

<sup>15</sup> Is meñ wuh ṭaiks shāmil nahīn the jo use saudāgaron, tājiron, Arab bādshāhon aur zilon ke afsaron se milte the.

<sup>16-17</sup> Sulemān Bādshāh ne 200 baṛī aur 300 chhoṭī dhāleñ banwāīn. Un par sonā mandhā gayā. Har baṛī dhāl ke lie taqṛīban 7 kilogrām sonā istemāl huā aur har chhoṭī dhāl ke lie taqṛīban sārhe 3 kilogrām. Sulemān ne unheñ 'Lubnān kā Jangal' nāmī mahal meñ mahfūz rakhā.

<sup>18</sup> In ke alāwā bādshāh ne hāthidānt se ārāstā ek baṛā taḱht banwāyā jis par ḱhālis sonā chaṛhāyā gayā.

<sup>19-20</sup> Taḱht kī pusht kā ūpar kā hissā gol thā, aur us ke har bāzū ke sāth sherbabar kā mujassamā thā. Taḱht kuchh ūñchā thā, aur bādshāh chhih pāe wālī sīṛhī par chaṛh kar us par baiṭhtā thā. Dāīn aur bāīn taraf har pāe par

sherbabar kā mujassamā thā. Is qism kā taḡht kisī aur saltanat meñ nahīn pāyā jātā thā.

21 Sulemān ke tamām pyāle sone ke the, balki ‘Lubnān kā Jangal’ nāmī mahal meñ tamām bartan ḡhālis sone ke the. Koī bhī chīz chāñdī kī nahīn thī, kyonki Sulemān ke zamāne meñ chāñdī kī koī qadar nahīn thī.

22 Bādshāh ke apne baharī jahāz the jo Hīrām ke jahāzoñ ke sāth mil kar muḡhtalif jaghoñ par jāte the. Har tīn sāl ke bād wuh sone-chāñdī, hāthīdāñt, bandaron aur moroñ se lade hue wāpas āte the.

23 Sulemān kī daulat aur hikmat duniyā ke tamām bādshāhoñ se kahīn zyādā thī.

24 Pūrī duniyā us se milne kī koshish kartī rahī tāki wuh hikmat sun le jo Allāh ne us ke dil meñ ḡāl dī thī.

25 Sāl basāl jo bhī Sulemān ke darbār meñ ātā wuh koī na koī tohfā lātā. Yoñ use sone-chāñdī ke bartan, qīmī libās, hathiyār, balsān, ghoṛe aur ḡhachchar milte rahe.

26 Sulemān ke 1,400 rath aur 12,000 ghoṛe the. Kuchh us ne rathoñ ke lie maḡhsūs kie gae shahroñ meñ aur kuchh Yarūshalām meñ apne pās rakhe.

27 Bādshāh kī sargarmiyon ke bāis chāñdī patthar jaisī ām ho gāi aur deodār kī qīmī lakaṛī Yahūdāh ke maḡhrib ke nashebī pahārī ilāqe kī anjīr-tūt kī sastī lakaṛī jaisī ām ho gāi.

28 Bādshāh apne ghoṛe Misr aur que yāñī Kilikiyā se darāmad kartā thā. Us ke tājir in jaghoñ par jā kar unheñ ḡharīd lāte the.



<sup>29</sup> Bādshāh ke rath Misr se darāmad hote the. Har rath kī qīmat chāndī ke 600 sikke aur har ghoṛe kī qīmat chāndī ke 150 sikke thī. Sulemān ke tājir yih ghoṛe barāmad karte hue tamām Hittī aur Arāmī bādshāhoṅ tak bhī pahuñchāte the.

## 11

### *Sulemān Rab se Dūr Ho Jātā Hai*

<sup>1</sup> Lekin Sulemān bahut-sī ḡhairmulkī ḡhawātīn se muhabbat kartā thā. Firaun kī beṭī ke alāwā us kī shādī Moābī, Ammonī, Adomī, Saidānī aur Hittī auratoṅ se huī.

<sup>2</sup> In qaumoṅ ke bāre meṅ Rab ne Isrāīliyoṅ ko hukm diyā thā, “Na tum in ke gharoṅ meṅ jāo aur na yih tumhāre gharoṅ meṅ āeṅ, warnā yih tumhāre dil apne dewatāoṅ kī taraf māyl kar deṅge.” To bhī Sulemān baṛe pyār se apnī in bīwīyoṅ se liptā rahā.

<sup>3</sup> Us kī shāhī ḡhāndānoṅ se tālluḡ rakhne wālī 700 bīwīyāṅ aur 300 dāshtāeṅ thīṅ. In auratoṅ ne āḡhirkār us kā dil Rab se dūr kar diyā.

<sup>4</sup> Jab wuh būṛhā ho gayā to unhoṅ ne us kā dil dīgar mābūdoṅ kī taraf māyl kar diyā. Yoṅ wuh būṛhāpe meṅ apne bāp Dāūd kī tarah pūre dil se Rab kā wafādār na rahā

<sup>5</sup> balki Saidāniyoṅ kī dewī Astārāt aur Ammonīyoṅ ke dewatā Milkūm kī pūjā karne lagā.

<sup>6</sup> ḡharz us ne aisā kām kiyā jo Rab ko nāpasand thā. Wuh wafādārī na rahī jis se us ke bāp Dāūd ne Rab kī ḡhidmat kī thī.

<sup>7</sup> Yarūshalam ke mashriḡ meṅ Sulemān ne ek pahārī par do mandir banāe, ek Moāb ke

ghinaune dewatā Kamos ke lie aur ek Ammon ke ghinaune dewatā Malik yānī Milkūm ke lie.

<sup>8</sup> Aise mandir us ne apnī tamām ghairmulkī bīwiyōñ ke lie tāmīr kie tāki wuh apne dewatāōñ ko baḡhūr aur zabah kī qurbāniyāñ pesh kar sakeñ.

<sup>9</sup> Rab ko Sulemān par baḡā ghussā āyā, kyoñki wuh Isrāīl ke Ḳhudā se dūr ho gayā thā, hālāñki Rab us par do bār zāhir huā thā.

<sup>10</sup> Go us ne use dīgar mābūdoñ kī pūjā karne se sāf manā kiyā thā to bhī Sulemān ne us kā hukm na mānā.

<sup>11</sup> Is lie Rab ne us se kahā, “Chūñki tū mere ahd aur ahkām ke mutābiq zindagī nahīñ guzārtā, is lie maiñ bādshāhī ko tujh se chhīn kar tere kisī afsar ko dūngā. Yih bāt yaqīnī hai.

<sup>12</sup> Lekin tere bāp Dāūd kī ḡhātīr maiñ yih tere jīte-jī nahīñ karūngā balki bādshāhī ko tere beṭe hī se chhīnūngā.

<sup>13</sup> Aur maiñ pūrī mamlakat us ke hāth se nahīñ lūngā balki apne ḡhādīm Dāūd aur apne chune hue shahr Yarūshalam kī ḡhātīr us ke lie ek qabīlā chhoḡ dūngā.”

### *Sulemān ke Dushman Hadad aur Razūn*

<sup>14</sup> Phir Rab ne Adom ke shāhī ḡhāndān meñ se ek ādmī banām Hadad ko barpā kiyā jo Sulemān kā sakht muḡhālīf ban gayā.

<sup>15</sup> Wuh yoñ Sulemān kā dushman ban gayā ki chand sāl pahle jab Dāūd ne Adom ko shikast dī to us kā faujī kamāñdar Yoāb maidān-e-jang meñ paḡī tamām Isrāīlī lāshoñ ko dafnāne ke lie Adom āyā. Jahāñ bhī gayā wahāñ us ne har Adomī mard ko mār dālā.

16 Wuh chhih māh tak apne faujiyoñ ke sāth har jagah phirā aur tamām Adomī mardoñ ko mārta gayā.

17 Hadad us waqt bach gayā aur apne bāp ke chand ek sarkārī afsaroñ ke sāth farār ho kar Misr meñ panāh le sakā.

18 Rāste meñ unheñ Dasht-e-Fārān ke Mulk-e-Midiyān se guzarnā parā. Wahāñ wuh mazīd kuchh ādmiyoñ ko jamā kar sake aur safr karte karte Misr pahuñch gae. Hadad Misr ke bādshāh Firaun ke pās gayā to us ne use ghar, kuchh zamīn aur khurāk muhaiyā kī.

19 Hadad Firaun ko itnā pasand āyā ki us ne us kī shādī apnī biwī malikā Tahfanīs kī bahan ke sāth karāī.

20 Is bahan ke beṭā paidā huā jis kā nām Janūbat rakhā gayā. Tahfanīs ne use shāhī mahal meñ pālā jahāñ wuh Firaun ke beṭoñ ke sāth parwān chārhā.

21 Ek din Hadad ko khabar milī ki Dāūd aur us kā kamāndar Yoāb faut ho gae haiñ. Tab us ne Firaun se ijāzat māngī, “Maiñ apne mulk lauṭ jānā chāhtā hūñ, barāh-e-karm mujhe jāne deñ.”

22 Firaun ne etarāz kiyā, “Yahāñ kyā kamī hai ki tum apne mulk wāpas jānā chāhte ho?” Hadad ne jawāb diyā, “Maiñ kisī bhī chīz se mahrūm nahīñ rahā, lekin phir bhī mujhe jāne dījie.”

23 Allāh ne ek aur ādmī ko bhī Sulemān ke khilāf barpā kiyā. Us kā nām Razūn bin Ilyadā thā. Pahle wuh Zobāh ke bādshāh Hadadazar kī khidmat anjām detā thā, lekin ek din us ne apne mālik se bhāg kar

<sup>24</sup> kuchh ādmiyoñ ko apne gird jamā kiyā aur dākuoñ ke jatthe kā sarġhanā ban gayā. Jab Dāūd ne Zobāh ko shikast de dī to Razūn apne ādmiyoñ ke sāth Damishq gayā aur wahāñ ābād ho kar apnī hukūmat qāym kar lī.

<sup>25</sup> Hote hote wuh pūre Shām kā hukmrān ban gayā. Wuh Isrāīliyoñ se nafrat kartā thā aur Sulemān ke jīte-jī Isrāīl kā ḡhās dushman banā rahā. Hadad kī tarah wuh bhī Isrāīl ko tang kartā rahā.

### *Yarubiyām aur Aḡhiyāh Nabī*

<sup>26</sup> Sulemān kā ek sarkārī afsar bhī us ke ḡhilāf uṡh khaṛā huā. Us kā nām Yarubiyām bin Nābāt thā, aur wuh Ifrāīm ke shahr Sarīdā kā thā. Us kī māñ Saruā bewā thī.

<sup>27</sup> Jab Yarubiyām bāġhī huā to un dinoñ meñ Sulemān irdgird ke chabūtare aur fasīl kā aḡhirī hissā tāmīr kar rahā thā.

<sup>28</sup> Us ne dekhā kī Yarubiyām māhir aur mehnatī jawān hai, is lie us ne use Ifrāīm aur Manassī ke qabīloñ ke tamām begār meñ kām karne wāloñ par muqarrar kiyā.

<sup>29</sup> Ek din Yarubiyām shahr se nikal rahā thā to us kī mulāqāt Sailā ke nabī Aḡhiyāh se huī. Aḡhiyāh naī chādar oṛhe phir rahā thā. Khule maidān meñ jahāñ koī aur nazar na āyā

<sup>30</sup> Aḡhiyāh ne apnī chādar ko pakaṛ kar bārah ṡukroñ meñ phāṛ liyā

<sup>31</sup> aur Yarubiyām se kahā,

“Chādar ke das ṡukre apne pās rakheñ! Kyoñki Rab Isrāīl kā ḡhudā farmātā hai, ‘Is waqt main Isrāīl kī bādshāhī ko Sulemān se chhīnane

wālā hūn. Jab aisā hogā to main us ke das qabīle tere hawāle kar dūngā.

<sup>32</sup> Ek hī qabīlā us ke pās rahegā, aur yih bhī sirf us ke bāp Dāūd aur us shahr kī khātir jise main ne tamām qabīlon meñ se chun liyā hai.

<sup>33</sup> Is tarah main Sulemān ko sazā dūngā, kyōnki wuh aur us ke log mujhe tark karke Saidāniyon kī dewī Astārāt kī, Moābiyon ke dewatā Kamos kī aur Ammoniyon ke dewatā Milkūm kī pūjā karne lage haiñ. Wuh merī rāhoñ par nahīn chalte balki wuhī kuchh karte haiñ jo mujhe bilkul nāpasand hai. Jis tarah Dāūd mere ahkām aur hidāyāt kī pairawī kartā thā us tarah us kā beṭā nahīn kartā.

<sup>34</sup> Lekin main is waqt pūrī bādshāhī Sulemān ke hāth se nahīn chhīnūngā. Apne khādīm Dāūd kī khātir jise main ne chun liyā aur jo mere ahkām aur hidāyāt ke tābe rahā main Sulemān ke jīte-jī yih nahīn karūngā. Wuh khud bādshāh rahegā,

<sup>35</sup> lekin us ke beṭe se main bādshāhī chhīn kar das qabīle tere hawāle kar dūngā.

<sup>36</sup> Sirf ek qabīlā Sulemān ke beṭe ke sapurd rahegā tāki mere khādīm Dāūd kā charāgh hameshā mere huzūr Yarūshalam meñ jaltā rahe, us shahr meñ jo main ne apne nām kī sukūnat ke lie chun liyā hai.

<sup>37</sup> Lekin tujhe, ai Yarubiyām, main Isrāil par bādshāh banā dūngā. Jo kuchh bhī terā jī chāhtā hai us par tū hukūmat karegā.

<sup>38</sup> Us waqt agar tū mere khādīm Dāūd kī tarah merī har bāt mānegā, merī rāhoñ par chalegā aur mere ahkām aur hidāyāt ke tābe rah kar

wuh kuchh karegā jo mujhe pasand hai to phir main tere sāth rahūngā. Phir main terā shāhī khāndān utnā hī qāym-o-dāym kar dūngā jitnā main ne Dāūd kā kiyā hai, aur Isrāīl tere hī hawāle rahegā.

<sup>39</sup> Yoñ main Sulemān ke gunāh ke bāis Dāūd kī aulād ko sazā dūngā, agarche yih abadī sazā nahīn hogī.’ ”

<sup>40</sup> Is ke bād Sulemān ne Yarubiyām ko marwāne kī koshish kī, lekin Yarubiyām ne farār ho kar Misr ke bādshāh Sīsaq ke pās panāh lī. Wahān wuh Sulemān kī maut tak rahā.

### *Sulemān kī Maut*

<sup>41</sup> Sulemān kī zindagī aur hikmat ke bāre mein mazīd bāteñ ‘Sulemān ke Āmāl’ kī kitāb mein bayān kī gāi haiñ.

<sup>42</sup> Sulemān 40 sāl pūre Isrāīl par hukūmat kartā rahā. Us kā dārul-hukūmat Yarūshalam thā.

<sup>43</sup> Jab wuh mar kar apne bāpdādā se jā milā to use Yarūshalam ke us hisse mein dafn kiyā gayā jo ‘Dāūd kā Shahr’ kahlātā hai. Phir us kā beṭā Rahubiyām takhtnashīn huā.

## 12

### *Shimālī Qabīle Alag Ho Jāte Haiñ*

<sup>1</sup> Rahubiyām Sikam gayā, kyonki wahān tamām Isrāīlī use bādshāh muqarrar karne ke lie jamā ho gae the.

<sup>2</sup> Yarubiyām bin Nabāt yih khabar sunte hī Misr se jahān us ne Sulemān Bādshāh se bhāg kar panāh lī thī Isrāīl wāpas āyā.

<sup>3</sup> Isrāīliyon ne use bulāyā tāki us ke sāth Sikam jāēn. Jab pahuñchā to Isrāīl kī pūrī jamāt Yarubiyām ke sāth mil kar Rahubiyām se milne gaī. Unhoñ ne bādshāh se kahā,

<sup>4</sup> “Jo juā āp ke bāp ne ham par ḍāl diyā thā use uṭhānā mushkil thā, aur jo waqt aur paise hameñ bādshāh kī k̄hidmat meñ sarf karne the wuh nāqābil-e-bardāsht the. Ab donoñ ko kam kar deñ. Phir ham k̄hushī se āp kī k̄hidmat kareñge.”

<sup>5</sup> Rahubiyām ne jawāb diyā, “Mujhe tīn din kī muhlat deñ, phir dubārā mere pās āēn.” Chunāñche log chale gae.

<sup>6</sup> Phir Rahubiyām Bādshāh ne un buzurgoñ se mashwarā kiyā jo Sulemān ke jīte-jī bādshāh kī k̄hidmat karte rahe the. Us ne pūchhā, “Āp kā kyā k̄hayāl hai? Maiñ in logoñ ko kyā jawāb dūñ?”

<sup>7</sup> Buzurgoñ ne jawāb diyā, “Hamārā mashwarā hai ki is waqt un kā k̄hādīm ban kar un kī k̄hidmat kareñ aur unheñ narm jawāb deñ. Agar āp aisā kareñ to wuh hameshā āp ke wafādār k̄hādīm bane raheñge.”

<sup>8</sup> Lekin Rahubiyām ne buzurgoñ kā mashwarā radd karke us kī k̄hidmat meñ hāzir un jawānoñ se mashwarā kiyā jo us ke sāth parwān charhe the.

<sup>9</sup> Us ne pūchhā, “Maiñ is qaum ko kyā jawāb dūñ? Yih taqāzā kar rahe haiñ ki maiñ wuh juā halkā kar dūñ jo mere bāp ne un par ḍāl diyā.”

<sup>10</sup> Jo jawān us ke sāth parwān charhe the unhoñ ne kahā, “Achchhā, yih log taqāzā kar rahe haiñ ki āp ke bāp kā juā halkā kiyā jāe?”

Unheñ batā denā, ‘Merī chhoṭī unglī mere bāp kī kamr se zyādā moṭī hai!

11 Beshak jo juā us ne āp par ḍāl diyā use uṭhānā mushkil thā, lekin merā juā aur bhī bhārī hogā. Jahāñ mere bāp ne āp ko koṛe lagāe wahāñ maiñ āp kī bichchhuoñ se tādīb karūnga!’”

12 Tin din ke bād jab Yarubiyām tamām Isrāīlyoñ ke sāth Rahubiyām kā faislā sunane ke lie wāpas āyā

13 to bādshāh ne unheñ saḡht jawāb diyā. Buzurgoñ kā mashwarā radd karke

14 us ne unheñ jawānoñ kā jawāb diyā, “Beshak jo juā mere bāp ne āp par ḍāl diyā use uṭhānā mushkil thā, lekin merā juā aur bhī bhārī hogā. Jahāñ mere bāp ne āp ko koṛe lagāe wahāñ maiñ āp kī bichchhuoñ se tādīb karūnga!”

15 Yoñ Rab kī marzī pūrī huī ki Rahubiyām logoñ kī bāt nahīn mānegā. Kyoñki ab Rab kī wuh peshgoī pūrī huī jo Sailā ke nabī Aḡhiyāh ne Yarubiyām bin Nabāt ko batāi thī.

16 Jab Isrāīlyoñ ne dekhā ki bādshāh hamārī bāt sunane ke lie taiyār nahīn hai to unhoñ ne us se kahā, “Na hameñ Dāūd se mīrās meñ kuchh milegā, na Yassī ke beṭe se kuchh milne kī ummīd hai. Ai Isrāīl, sab apne apne ghar wāpas chalen! Ai Dāūd, ab apnā ghar ḡhud sañbhāl lo!” Yih kah kar wuh sab chale gae.

17 Sirf Yahūdāh ke qabile ke shahroñ meñ rahne wāle Isrāīlī Rahubiyām ke taht rahe.

18 Phir Rahubiyām Bādshāh ne begāriyoñ par muqarrar afsar Adūnīrām ko shimālī qabīloñ



ke pās bhej diyā, lekin use dekh kar tamām logoñ ne use sangsār kiyā. Tab Rahubiyām jaldī se apne rath par sawār huā aur bhāg kar Yarūshalam pahuñch gayā.

<sup>19</sup> Yoñ Isrāil ke shimālī qabile Dāūd ke shāhī gharāne se alag ho gae aur āj tak us kī hukūmat nahīn mānte.

<sup>20</sup> Jab khabar shimālī Isrāil meñ phailī ki Yarubiyām Misr se wāpas ā gayā hai to logoñ ne qaumī ijlās mun'aqid karke use bulāyā aur wahāñ use apnā bādshāh banā liyā. Sirf Yahūdāh kā qabilā Rahubiyām aur us ke gharāne kā wafādār rahā.

### *Rahubiyām ko Isrāil se Jang Karne kī Ijāzat Nahīn Miltī*

<sup>21</sup> Jab Rahubiyām Yarūshalam pahuñchā to us ne Yahūdāh aur Binyamīn ke qabiloñ ke chīdā chīdā faujiyoñ ko Isrāil se jang karne ke lie bulāyā. 1,80,000 mard jamā hue tāki Rahubiyām bin Sulemān ke lie Isrāil par dubārā qābū pāen.

<sup>22</sup> Lekin ain us waqt mard-e-Ḳhudā Samāyāh ko Allāh kī taraf se paighām milā,

<sup>23</sup> “Yahūdāh ke bādshāh Rahubiyām bin Sulemān, Yahūdāh aur Binyamīn ke tamām afrād aur bāqī logoñ ko ittalā de,

<sup>24</sup> ‘Rab farmātā hai ki apne Isrāilī bhāiyoñ se jang mat karnā. Har ek apne apne ghar wāpas chalā jāe, kyonki jo kuchh huā hai wuh mere hukm par huā hai.’ ”

Tab wuh Rab kī sun kar apne apne ghar wāpas chale gae.

### *Yarubiyām ke Sone ke Bachhṛe*

25 Yarubiyām Ifrāīm ke pahārī ilāqe ke shahr Sikam ko mazbūt karke wahān ābād huā. Bād meñ us ne Fanuel Shahr kī bhī qilābandī kī aur wahān muntaqil huā.

26 Lekin dil meñ andeshā rahā ki kahīn Isrāīl dubārā Daūd ke gharāne ke hāth meñ na ā jāe.

27 Us ne sochā, “Log bāqāydaḡī se Yarūshalam āte jāte haiñ tāki wahān Rab ke ghar meñ apnī qurbāniyān pesh karen. Agar yih silsilā toṛā na jāe to āhistā āhistā un ke dil dubārā Yahūdāh ke bādshāh Rahubiyām kī taraf māyl ho jāenge. Aḡhirkār wuh mujhe qatl karke Rahubiyām ko apnā bādshāh banā leñge.”

28 Apne afsaron ke mashware par us ne sone ke do bachhre banwāe. Logoñ ke sāmne us ne elān kiyā, “Har qurbānī ke lie Yarūshalam jānā mushkil hai! Ai Isrāīl dekh, yih tere dewatā haiñ jo tujhe Misr se nikāl lāe.”

29 Ek but us ne junūbī shahr Baitel meñ khaṛā kiyā aur dūsra shimālī shahr Dān meñ.

30 Yoñ Yarubiyām ne Isrāīliyon ko gunāh karne par uksāyā. Log Dān tak safr kiyā karte the tāki wahān ke but kī pūjā karen.

31 Is ke alāwā Yarubiyām ne bahut-sī ūnchī jaghoñ par mandir banwāe. Unheñ sañbhālne ke lie us ne aise log muqarrar kie jo Lāwī ke qabile ke nahīn balki ām log the.

32 Us ne ek naī īd bhī rāyj kī jo Yahūdāh meñ manāne wālī Jhoñpriyon kī īd kī mānind thī. Yih īd āṭhweñ māh \* ke pandrahweñ din manāī jāti thī. Baitel meñ us ne ḡhud qurbāngāh par jā

---

\* 12:32 Aktūbar tā Nawambar.

kar apne banwāe hue bachhron ko qurbāniyān pesh kīn, aur wahīn us ne apne un mandiron ke imāmon ko muqarrar kiyā jo us ne ūnchī jaghon par tāmīr kie the.

*Nabī Yarubiyām ko Burī Khabar Pahuñchātā Hai*

<sup>33</sup> Chunānche Yarubiyām ke muqarrarkardā din yānī āṭhweñ mahīne ke pandrahweñ din Isrāīliyon ne Baitel meñ id manāī. Tamām mehmānon ke sāmne Yarubiyām qurbāngāh par chaṛh gayā tāki qurbāniyān pesh kare.

## 13

<sup>1</sup> Wuh abhī qurbāngāh ke pās kharā apnī qurbāniyān pesh karnā hī chāhtā thā ki ek mard-e-Ḳhudā ān pahuñchā. Rab ne use Yahūdāh se Baitel bhej diyā thā.

<sup>2</sup> Buland āwāz se wuh qurbāngāh se muḳhātib huā, “Ai qurbāngāh! Ai qurbāngāh! Rab farmātā hai, ‘Dāūd ke gharāne se beṭā paidā hogā jis kā nām Yūsiyāh hogā. Tujh par wuh un imāmon ko qurbān kar degā jo ūnchī jaghon ke mandiron meñ ḳhidmat karte aur yahān qurbāniyān pesh karne ke lie āte haiñ. Tujh par insānon kī haḍḍiyān jalāī jāengī.’ ”

<sup>3</sup> Phir mard-e-Ḳhudā ne ilāhī nishān bhī pesh kiyā. Us ne elān kiyā, “Ek nishān sābit karegā ki Rab merī mārifat bāt kar rahā hai! Yih qurbāngāh phaṭ jāegī, aur is par maujūd charbī milī rākh zamīn par bikhar jāegī.”

<sup>4</sup> Yarubiyām Bādshāh ab tak qurbāngāh ke pās kharā thā. Jab us ne Baitel kī qurbāngāh ke ḳhilāf mard-e-Ḳhudā kī bāt sunī to wuh hāth

se us kī taraf ishārā karke garjā, “Use pakaṛo!” Lekin jyoñ hī bādshāh ne apnā hāth barhāyā wuh sūkh gayā, aur wuh use wāpas na khīnch sakā.

<sup>5</sup> Usī lamhe qurbāngāh phaṭ gaī aur us par maujūd rākh zamīn par bikhar gaī. Bilkul wuhī kuchh huā jis kā elān mard-e-Ḳhudā ne Rab kī taraf se kiyā thā.

<sup>6</sup> Tab bādshāh iltamās karne lagā, “Rab apne Ḳhudā kā ḡhussā ṭhandā karke mere lie duā karen tāki merā hāth bahāl ho jāe.” Mard-e-Ḳhudā ne us kī shafā'at kī to Yarubiyām kā hāth fauran bahāl ho gayā.

<sup>7</sup> Tab Yarubiyām Bādshāh ne mard-e-Ḳhudā ko dāwat dī, “Āeñ, mere ghar meñ khānā khā kar tādādam ho jāeñ. Maiñ āp ko tohfā bhī dūngā.”

<sup>8</sup> Lekin us ne inkār kiyā, “Maiñ āp ke pās nahīñ āūngā, chāhe āp mujhe apnī milkiyat kā ādhā hissā kyoñ na deñ. Maiñ yahāñ na roṭī khāūngā, na kuchh piyūngā.

<sup>9</sup> Kyoñki Rab ne mujhe hukm diyā hai, ‘Rāste meñ na kuchh khā aur na kuchh pī. Aur wāpas jāte waqt wuh rāstā na le jis par se tū Baitel pahuñchā hai.’ ”

<sup>10</sup> Yih kah kar wuh farq rāstā iḡhtiyār karke apne ghar ke lie rawānā huā.

### *Nabī kī Nāfarmānī*

<sup>11</sup> Baitel meñ ek būrhā nabī rahtā thā. Jab us ke beṭe us din ghar wāpas āe to unhoñ ne use sab kuchh kah sunāyā jo mard-e-Ḳhudā ne Baitel meñ kiyā aur Yarubiyām Bādshāh ko batāyā thā.

12 Bāp ne pūchhā, “Wuh kis taraf gayā?” Beṭoñ ne use wuh rāstā batāyā jo Yahūdāh ke mard-e-Ḳhudā ne liyā thā.

13 Bāp ne hukm diyā, “Mere gadhe par jaldī se zīn kaso!” Beṭoñ ne aisā kiyā to wuh us par baiṭh kar

14 mard-e-Ḳhudā ko ḍhūñḍne gayā.

Chalte chalte mard-e-Ḳhudā balūt ke daraḳht ke sāye meñ baiṭhā nāzar āyā. Buzurg ne pūchhā, “Kyā āp wuhī mard-e-Ḳhudā haiñ jo Yahūdāh se Baitel āe the?” Us ne jawāb diyā, “Jī, maiñ wuhī hūñ.”

15 Buzurg nabī ne use dāwat dī, “Āeñ, mere sāth. Maiñ ghar meñ āp ko kuchh khānā khilātā hūñ.”

16 Lekin mard-e-Ḳhudā ne inkār kiyā, “Nahiñ, na maiñ āp ke sāth wāpas jā saktā hūñ, na mujhe yahāñ khāne-pīne kī ijāzat hai.

17 Kyonki Rab ne mujhe hukm diyā, ‘Rāste meñ na kuchh khā aur na kuchh pī. Aur wāpas jāte waqt wuh rāstā na le jis par se tū Baitel pahuñchā hai.’ ”

18 Buzurg nabī ne etarāz kiyā, “Maiñ bhī āp jaisā nabī hūñ! Ek farishte ne mujhe Rab kā nayā paighām pahuñchā kar kahā, ‘Use apne sāth ghar le jā kar roṭī khilā aur pānī pilā.’ ” Buzurg jhūṭ bol rahā thā,

19 lekin mard-e-Ḳhudā us ke sāth wāpas gayā aur us ke ghar meñ kuchh khāyā aur piyā.

20 Wuh abhī wahāñ baiṭhe khānā khā rahe the ki buzurg par Rab kā kalām nāzil huā.

21 Us ne buland āwāz se Yahūdāh ke mard-e-Ḳhudā se kahā, “Rab farmātā hai, ‘Tū ne Rab ke

kalām kī ḵhilāfwarzī kī hai! Jo hukm Rab tere Ḵhudā ne tujhe diyā thā wuh tū ne nazarandāz kiyā hai.

<sup>22</sup> Go us ne farmāyā thā ki yahān na kuchh khā aur na kuchh pī to bhī tū ne wāpas ā kar yahān roṭī khāi aur pānī piyā hai. Is lie marte waqt tujhe tere bāpdādā kī qabr meñ dafnāyā nahīn jāegā.’ ”

<sup>23</sup> Khāne ke bād buzurg ke gadhe par zīn kasā gayā aur mard-e-Ḵhudā ko us par biṭhāyā gayā.

<sup>24</sup> Wuh dubārā rawānā huā to rāste meñ ek sherbabar ne us par hamlā karke use mār ḍālā. Lekin us ne lāsh ko na chheṛā balki wuh wahīn rāste meñ paṛī rahī jabki gadhā aur sher donoñ hī us ke pās khare rahe.

<sup>25</sup> Kuchh log wahān se guzare. Jab unhoñ ne lāsh ko rāste meñ paṛe aur sherbabar ko us ke pās khare dekhā to unhoñ ne Baitel jahān buzurg nabī rahtā thā ā kar logoñ ko ittalā dī.

<sup>26</sup> Jab buzurg ko ḵhabar milī to us ne kahā, “Wuhī mard-e-Ḵhudā hai jis ne Rab ke farmān kī ḵhilāfwarzī kī. Ab wuh kuchh huā hai jo Rab ne use farmāyā thā yānī us ne use sherbabar ke hawāle kar diyā tāki wuh use phar kar mār ḍāle.”

<sup>27</sup> Buzurg ne apne beṭoñ ko gadhe par zīn kasne kā hukm diyā,

<sup>28</sup> aur wuh us par baiṭh kar rawānā huā. Jab wahān pahuñchā to dekhā ki lāsh ab tak rāste meñ paṛī hai aur gadhā aur sher donoñ hī us ke pās khare haiñ. Sherbabar ne na lāsh ko chheṛā aur na gadhe ko pharā thā.

<sup>29</sup> Buzurg nabī ne lāsh ko uṭhā kar apne gadhe par rakhā aur use Baitel lāyā tāki us kā mātām karke use wahān dafnāe.

<sup>30</sup> Us ne lāsh ko apnī ḵhāndānī qabr meñ dafn kiyā, aur logoñ ne “Hāy, mere bhāi” kah kar us kā mātām kiyā.

<sup>31</sup> Janāze ke bād buzurg nabī ne apne beṭoñ se kahā, “Jab main kūch kar jāūngā to mujhe mard-e-Ḵhudā kī qabr meñ dafnānā. Merī haḍḍiyon ko us kī haḍḍiyon ke pās hī rakheñ.

<sup>32</sup> Kyoñki jo bāteñ us ne Rab ke hukm par Baitel kī qurbāngāh aur Sāmariya ke shahron kī ūnchī jaghoñ ke mandiron ke bāre meñ kī haiñ wuh yaqīnan pūrī ho jāeñgī.”

### *Yarubiyām Phir Bhī Nāfarmān Rahtā Hai*

<sup>33</sup> In wāqiyāt ke bāwujūd Yarubiyām apnī sharīr harkatoñ se bāz na āyā. Ām logoñ ko imām banāne kā silsilā jāri rahā. Jo koī bhī imām banānā chāhtā use wuh ūnchī jaghoñ ke mandiron meñ ḵhidmat karne ke lie maḵsūs kartā thā.

<sup>34</sup> Yarubiyām ke gharāne ke is sangīn gunāh kī wajah se wuh āḵhirkār tabāh huā aur rū-e-zamīn par se miṭ gayā.

## 14

### *Yarubiyām ko Ilāhī Sazā Miltī Hai*

<sup>1</sup> Ek dīn Yarubiyām kā beṭā Abiyāh bahut bīmār huā.

<sup>2</sup> Tab Yarubiyām ne apnī bīwī se kahā, “Jā kar apnā bhes badleñ tāki koī na pahchāne ki āp merī bīwī haiñ. Phir Sailā jāeñ. Wahān Aḵhiyāh

Nabī rahtā hai jis ne mujhe ittalā dī thī ki main is qaum kā bādshāh ban jāūngā.

<sup>3</sup> Us ke pās das roṭiyān, kuchh biskuṭ aur shahd kā martabān le jāēn. Wuh ādmī āp ko zarūr batā degā ki larke ke sāth kyā ho jāegā.”

<sup>4</sup> Chunānche Yarubiyām kī bīwī apnā bhes badal kar rawānā huī aur chalte chalte Sailā meñ Aḳhiyāh ke ghar pahunch gai. Aḳhiyāh umrrasīdā hone ke bāis dekh nahīn saktā thā.

<sup>5</sup> Lekin Rab ne use āgāh kar diyā, “Yarubiyām kī bīwī tujh se milne ā rahī hai tāki apne bīmār beṭe ke bāre meñ mālūmāt hāsīl kare. Lekin wuh apnā bhes badal kar āegī tāki use pahchānā na jāe.” Phir Rab ne nabī ko batāyā ki use kyā jawāb denā hai.

<sup>6</sup> Jab Aḳhiyāh ne aurat ke qadmoñ kī āhaṭ sunī to bolā, “Yarubiyām kī bīwī, andar āēn! Rūp bharne kī kyā zarūrat? Mujhe āp ko burī ḳhabar pahunchānī hai.

<sup>7</sup> Jāēn, Yarubiyām ko Rab Isrāīl ke Ḳhudā kī taraf se paighām deñ, ‘Main ne tujhe logoñ meñ se chun kar kharā kiyā aur apnī qaum Isrāīl par bādshāh banā diyā.

<sup>8</sup> Main ne bādshāhī ko Dāūd ke gharāne se chhīn kar tujhe de diyā. Lekin afsos, tū mere ḳhādīm Dāūd kī tarah zindagī nahīn guzartā jo mere ahkām ke tābe rah kar pūre dil se merī pairawī kartā rahā aur hameshā wuh kuchh kartā thā jo mujhe pasand thā.

<sup>9</sup> Jo tujh se pahle the un kī nisbat tū ne kahīn zyādā badī kī, kyonki tū ne but dhāl kar apne lie dīgar mābūd banāe haiñ aur yoñ mujhe taish



dilāyā. Chūnki tū ne apnā muñh mujh se pher liyā

<sup>10</sup> is lie main tere khāndān ko musibat meñ dāl dūngā. Isrāil meñ main Yarubiyām ke tamām mardoñ ko halāk kar dūngā, khāh wuh bachche hoñ yā bālīgh. Jis tarah gobar ko jhārū de kar dūr kiyā jātā hai usī tarah Yarubiyām ke gharāne kā nām-o-nishān miṭ jāegā.

<sup>11</sup> Tum meñ se jo shahr meñ mareñge unheñ kutte khā jāeñge, aur jo khule maidān meñ mareñge unheñ parinde chaṭ kar jāeñge. Kyoñki yih Rab kā farmān hai.' "

<sup>12</sup> Phir Aḳhiyāh ne Yarubiyām kī bīwī se kahā, "Āp apne ghar wāpas chalī jāeñ. Jyoñ hī āp shahr meñ dākhil hoñgī laṛkā faut ho jāegā.

<sup>13</sup> Pūrā Isrāil us kā mātām karke use dāfn karegā. Wuh āp ke khāndān kā wāhid fard hogā jise sahīh taur se dāfnāyā jāegā. Kyoñki Rab Isrāil ke Ḳhudā ne sirf usī meñ kuchh pāyā jo use pasand thā.

<sup>14</sup> Rab Isrāil par ek bādshāh muqarrar karegā jo Yarubiyām ke khāndān ko halāk karegā. Āj hī se yih silsilā shurū ho jāegā.

<sup>15</sup> Rab Isrāil ko bhī sazā degā, kyoñki wuh Yasīrat Dewī ke khambe banā kar un kī pūjā karte haiñ. Chūnki wuh Rab ko taish dilāte rahe haiñ, is lie wuh unheñ māregā, aur wuh pānī meñ sarkanḍe kī tarah hil jāeñge. Rab unheñ is achche mulk se ukhār kar Dariyā-e-Furāt ke pār muntashir kar degā.

<sup>16</sup> Yoñ wuh Isrāil ko un gunāhoñ ke bāis tark karegā jo Yarubiyām ne kie aur Isrāil ko karne par uksāyā hai."

17 Yarubiyām kī bīwī Tīrzā meñ apne ghar wāpas chalī gaī. Aur ghar ke darwāze meñ dākḥil hote hī us kā beṭā mar gayā.

18 Tamām Isrāīl ne use dafnā kar us kā mātām kiyā. Sab kuchh waise huā jaise Rab ne apne ḡhādīm Aḡhiyāh Nabī kī mārīfat farmāyā thā.

### *Yarubiyām kī Maut*

19 Bāqī jo kuchh Yarubiyām kī zīndagī ke bāre meñ likhā hai wuh ‘Shāhān-e-Isrāīl kī Tārīḡh’ kī kitāb meñ darj hai. Us kitāb meñ parhā jā saktā hai ki wuh kis tarah ḡukūmat kartā thā aur us ne kaun kaun-sī jangeñ kīñ.

20 Yarubiyām 22 sāl bādshāh rahā. Jab wuh mar kar apne bāpdādā se jā milā to us kā beṭā Nadab taḡhtnashīn huā.

### *Yahūdāh kā Bādshāh Rahubiyām*

21 Yahūdāh meñ Rahubiyām bin Sulemān ḡukūmat kartā thā. Us kī māñ Nāmā Ammonī thī. 41 sāl kī umr meñ wuh taḡhtnashīn huā aur 17 sāl bādshāh rahā. Us kā dārul-ḡukūmat Yarūshalam thā, wuh shahr jise Rab ne tamām Isrāīlī qabīloñ meñ se chun liyā tāki us meñ apnā nām qāym kare.

22 Lekīn Yahūdāh ke bāshinde bhī aīsī harkateñ karte the jo Rab ko nāpasand thīñ. Apne ḡunāhoñ se wuh use taish dilāte rahe, kyōñki un ke yih ḡunāh un ke bāpdādā ke ḡunāhoñ se kahīñ zyādā sangīn the.

23 Unhoñ ne bhī ūñchī jaghoñ par mandir banāe. Har ūñchī pahārī par aur har ghane darakḡt ke sāye meñ unhoñ ne maḡhsūs patthar yā Yasīrat Dewī ke khambe khare kie,

<sup>24</sup> yahān tak ki mandiron̄ meñ jismfarosh mard aur aurateñ the. Ġharz, unhoñ ne un qaumon̄ ke tamām ghinaune rasm-o-riwāj apnā lie jin ko Rab ne Isrāīliyon̄ ke āge āge nikāl diyā thā.

<sup>25</sup> Rahubiyām Bādshāh kī hukūmat ke pāñchweñ sāl meñ Misr ke bādshāh Sīsaq ne Yarūshalam par hamlā karke

<sup>26</sup> Rab ke ghar aur shāhī mahal ke tamām khazāne lūṭ lie. Sone kī wuh dhāleñ bhī chhīn lī gaīn jo Sulemān ne banwāi thīn.

<sup>27</sup> In kī jagah Rahubiyām ne pītal kī dhāleñ banwāīn aur unheñ un muhāfizon̄ ke afsaron̄ ke sapurd kiyā jo shāhī mahal ke darwāze kī pahrādārī karte the.

<sup>28</sup> Jab bhī bādshāh Rab ke ghar meñ jātā tab muhāfiz yih dhāleñ uṭhā kar sāth le jāte. Is ke bād wuh unheñ pahredāron̄ ke kamre meñ wāpas le jāte the.

<sup>29</sup> Bāqī jo kuchh Rahubiyām Bādshāh kī hukūmat ke daurān huā aur jo kuchh us ne kiyā wuh ‘Shāhān-e-Yahūdāh kī Tārīkh’ kī kitāb meñ darj hai.

<sup>30</sup> Donon̄ bādshāhon̄ Rahubiyām aur Yarusbiyām ke jīte-jī un ke darmiyān jang jāri rahī.

<sup>31</sup> Jab Rahubiyām mar kar apne bāpdādā se jā milā to use Yarūshalam ke us hisse meñ jo ‘Dāūd kā Shahr’ kahlātā hai khāndānī qabr meñ dafnāyā gayā. Us kī māñ Nāmā Ammonī thī. Phir Rahubiyām kā beṭā Abiyāh taḳhtnashīn huā.

### *Yahūdāh kā Bādshāh Abiyāh*

<sup>1</sup> Abiyāh Isrāīl ke bādshāh Yarubiyām bin Nabāt kī hukūmat ke 18weñ sāl meñ Yahūdāh kā bādshāh banā.

<sup>2</sup> Wuh tīn sāl bādshāh rahā, aur us kā dārul-hukūmat Yarūshalam thā. Us kī māñ Mākā bint Abīsalūm thī.

<sup>3</sup> Abiyāh se wuhī gunāh sarzad hue jo us ke bāp ne kie the, aur wuh pūre dil se Rab apne Ḳhudā kā wafādār na rahā. Go wuh is meñ apne pardādā Dāūd se farq thā

<sup>4</sup> to bhī Rab us ke Ḳhudā ne Abiyāh kā Yarūshalam meñ charāgh jalne diyā. Dāūd kī ḳhātir us ne use jānashīn atā kiyā aur Yarūshalam ko qāym rakhā,

<sup>5</sup> kyonki Dāūd ne wuh kuchh kiyā thā jo Rab ko pasand thā. Jīte-jī wuh Rab ke ahkām ke tābe rahā, siwāe us jurm ke jab us ne Ūriyāh Hittī ke silsile meñ ghalat qadam uṭhāe the.

<sup>6</sup> Rahubiyām aur Yarubiyām ke darmiyān kī jang Abiyāh kī hukūmat ke daurān bhī jāri rahī.

<sup>7</sup> Bāqī jo kuchh Abiyāh kī hukūmat ke daurān huā aur jo kuchh us ne kiyā wuh 'Shāhān-e-Yahūdāh kī Tārīḳh' kī kitāb meñ darj hai.

<sup>8</sup> Jab wuh mar kar apne bāpdādā se jā milā to use Yarūshalam ke us hisse meñ dafn kiyā gayā jo 'Dāūd kā Shahr' kahlātā hai. Phir us kā beṭā Āsā taḳhtnashīn huā.

### *Yahūdāh kā Bādshāh Āsā*

<sup>9</sup> Āsā Isrāīl ke bādshāh Yarubiyām ke 20weñ sāl meñ Yahūdāh kā bādshāh ban gayā.

10 Us kī hukūmat kā daurāniyā 41 sāl thā, aur us kā dārul-hukūmat Yarūshalām thā. Mān kā nām Mākā thā, aur wuh Abīsalūm kī beṭī thī.

11 Apne pardādā Dāūd kī tarah Āsā bhī wuh kuchh kartā rahā jo Rab ko pasand thā.

12 Us ne un jismfarosh mardoñ aur auratoñ ko nikāl diyā jo mandiroñ meñ nām-nihād k̄hidmat karte the aur un tamām butoñ ko tabāh kar diyā jo us ke bāpdādā ne banāe the.

13 Aur go us kī mān bādshāh kī mān hone ke bāis bahut asar-o-rasūkh rakhtī thī, tāham Āsā ne yih ohdā k̄hatm kar diyā jab mān ne Yasīrat Dewī kā ghinaunā khambā banwā liyā. Āsā ne yih but kaṭwā kar Wādī-e-Qidron meñ jalā diyā.

14 Afsos ki us ne ūnchī jaghoñ ke mandiroñ ko dūr na kiyā. To bhī Āsā jīte-jī pūre dil se Rab kā wafādār rahā.

15 Sonā-chāndī aur bāqī jītnī chīzeñ us ke bāp aur us ne Rab ke lie maḥsūs kī thīñ un sab ko wuh Rab ke ghar meñ lāyā.

16 Yahūdāh ke bādshāh Āsā aur Isrāīl ke bādshāh Bāshā ke darmiyān zindagī-bhar jang jāri rahī.

17 Ek din Bāshā Bādshāh ne Yahūdāh par hamlā karke Rāmā Shahr kī qilābandī kī. Maqsad yih thā ki na koī Yahūdāh ke mulk meñ dākhil ho sake, na koī wahāñ se nikal sake.

18 Jawāb meñ Āsā ne Shām ke bādshāh Bin-hadad ke pās wafd bhejā. Bin-hadad kā bāp Tābrimmoñ bin Hazyūn thā, aur us kā dārul-hukūmat Damishq thā. Āsā ne Rab ke ghar aur shāhī mahal ke k̄hazānoñ kā tamām bachā huā sonā aur chāndī wafd ke sapurd karke Damishq

ke bādshāh ko paighām bhejā,

19 “Merā āp ke sāth ahd hai jis tarah mere bāp kā āp ke bāp ke sāth ahd thā. Guzārish hai ki āp sone-chāndī kā yih tohfā qabūl karke Isrāil ke bādshāh Bāshā ke sāth apnā ahd mansūkh kar deñ tāki wuh mere mulk se nikal jāe.”

20 Bin-hadad muttafiq huā. Us ne apne fauji afsaron ko Isrāil ke shahron par hamlā karne ke lie bhej diyā to unhoñ ne Aiyūn, Dān, Abil-bait-mākā, tamām Kinnarat aur Naftālī par qabzā kar liyā.

21 Jab Bāshā ko is kī khabar milī to wuh Rāmā kī qilābandī karne se bāz āyā aur Tirezā wāpas chalā gayā.

22 Phir Āsā Bādshāh ne Yahūdāh ke tamām mardoñ kī bhartī karke unheñ Rāmā bhej diyā tāki wuh un tamām pattharon aur shahtiron ko uṭhā kar le jāeñ jin se Bāshā Bādshāh Rāmā kī qilābandī karnā chāhtā thā. Tamām mardoñ ko wahāñ jānā parā, ek ko bhī chhuṭṭī na milī. Is sāmān se Āsā ne Binyamīn ke shahr Jibā aur Misfāh kī qilābandī kī.

23 Bāqī jo kuchh Āsā kī hukūmat ke daurān huā aur jo kuchh us ne kiyā wuh ‘Shāhān-e-Yahūdāh kī Tārīkh’ kī kitāb meñ darj hai. Us meñ us kī kāmyābion aur us ke tāmīr kie gae shahron kā zikr hai. Buṛhāpe meñ us ke pānwoñ ko bīmārī lag gāī.

24 Jab wuh mar kar apne bāpdādā se jā milā to use Yarūshalam ke us hisse meñ jo ‘Dāūd kā Shahr’ kahlātā hai khāndānī qabr meñ dafnāyā gayā. Phir us kā beṭā Yahūsafat us kī jagah taḥtnashīn huā.

### *Isrāil kā Bādshāh Nadab*

<sup>25</sup> Nadab bin Yarubiyām Yahūdāh ke bādshāh Āsā kī hukūmat ke dūsre sāl meñ Isrāil kā bādshāh banā. Us kī hukūmat kā daurāniyā do sāl thā.

<sup>26</sup> Us kā tarz-e-zindagī Rab ko pasand nahīn thā, kyonki wuh apne bāp ke namūne par chaltā rahā. Jo badī Yarubiyām ne Isrāil ko karne par uksāyā thā us se Nadab bhī dūr na huā.

<sup>27-28</sup> Ek din jab Nadab Isrāilī fauj ke sāth Filistī shahr Jibbatūn kā muhāsarā kie hue thā to Ishkār ke qabīle ke Bāshā bin Aḳhiyāh ne us ke ḳhilāf sazīsh karke use mār ḳālā aur ḳhud Isrāil kā bādshāh ban gayā. Yih Yahūdāh ke bādshāh Āsā kī hukūmat ke tīsre sāl meñ huā.

<sup>29</sup> Taḳht par baiṭhte hī Bāshā ne Yarubiyām ke pūre ḳhāndān ko marwā diyā. Us ne ek ko bhī zindā na chhoṛā. Yoñ wuh bāt pūrī huī jo Rab ne Sailā ke rahne wāle apne ḳhādīm Aḳhiyāh kī mārifat farmāi thī.

<sup>30</sup> Kyonki jo gunāh Yarubiyām ne kie aur Isrāil ko karne par uksāyā thā un se us ne Rab Isrāil ke Ḳhudā ko taish dilāyā thā.

<sup>31</sup> Bāqī jo kuchh Nadab kī hukūmat ke daurān huā aur jo kuchh us ne kiyā wuh 'Shāhān-e-Isrāil kī Tārīḳh' kī kitāb meñ darj hai.

### *Isrāil kā Bādshāh Bāshā*

<sup>32-33</sup> Bāshā bin Aḳhiyāh Yahūdāh ke bādshāh Āsā kī hukūmat ke tīsre sāl meñ Isrāil kā bādshāh banā. Us kī hukūmat kā daurāniyā 24 sāl thā, aur us kā dārul-hukūmat Tirzā rahā. Us ke aur Yahūdāh ke bādshāh Āsā ke darmiyān zindagī-bhar jang jāri rahī.

34 Lekin wuh bhī aisā kām kartā thā jo Rab ko nāpasand thā, kyonki us ne Yarubiyām ke namūne par chal kar wuh gunāh jāri rakhe jo karne par Yarubiyām ne Isrāil ko uksāyā thā.

## 16

1 Ek din Rab ne Yāhū bin Hanānī ko Bāshā ke pās bhej kar farmāyā,

2 “Pahle tū kuchh nahīn thā, lekin main ne tujhe khāk meñ se uthā kar apnī qaum Isrāil kā hukmrān banā diyā. To bhī tū ne Yarubiyām ke namūne par chal kar merī qaum Isrāil ko gunāh karne par uksāyā aur mujhe taish dilāyā hai.

3 Is lie main tere gharāne ke sāth wuhī kuchh karūnga jo Yarubiyām bin Nabāt ke gharāne ke sāth kiyā thā. Bāshā kī pūrī nasl halāk ho jāegī.

4 Khāndān ke jo afrād shahr meñ mareñge unheñ kutte khā jāeñge, aur jo khule maidān meñ mareñge unheñ parinde chaṭ kar jāeñge.”

5 Bāqī jo kuchh Bāshā kī hukūmat ke daurān huā, jo kuchh us ne kiyā aur jo kāmyābiyān use hāsil huīn wuh ‘Shāhān-e-Isrāil kī Tārīkh’ kī kitāb meñ darj haiñ.

6 Jab wuh mar kar apne bāpdādā se jā milā to use Tirzā meñ dafn kiyā gayā. Phir us kā beṭā Ailā taḥtnashīn huā.

7 Rab kī sazā kā jo paighām Hanānī ke beṭe Yāhū Nabī ne Bāshā aur us ke khāndān ko sunāyā us kī do wujūhāt thīñ. Pahle, Bāshā ne Yarubiyām ke khāndān kī tarah wuh kuchh kiyā jo Rab ko nāpasand thā aur use taish dilāyā. Dūsre, us ne Yarubiyām ke pūre khāndān ko halāk kar diyā thā.



### *Isrāīl kā Bādshāh Ailā*

<sup>8</sup> Ailā bin Bāshā Yahūdāh ke bādshāh Āsā kī hukūmat ke 26weñ sāl meñ Isrāīl kā bādshāh banā. Us kī hukūmat ke do sāl ke daurān us kā dārul-hukūmat Tirzā rahā.

<sup>9</sup> Ailā kā ek afsar banām Zimrī thā. Zimrī rathoñ ke ādhe hisse par muqarrar thā. Ab wuh bādshāh ke khilāf sāzisheñ karne lagā. Ek din Ailā Tirzā meñ mahal ke inchārj Arzā ke ghar meñ baiṭhā mai pī rahā thā. Jab nashe meñ dhut huā

<sup>10</sup> to Zimrī ne andar jā kar use mār ḍālā. Phir wuh khud taḡht par baiṭh gayā. Yih Yahūdāh ke bādshāh Āsā kī hukūmat ke 27weñ sāl meñ huā.

<sup>11</sup> Taḡht par baiṭhte hī Zimrī ne Bāshā ke pūre khāndān ko halāk kar diyā. Us ne kisī bhī mard ko zindā na chhoṛā, khāh wuh dūr kā rishtedār thā, khāh dost.

<sup>12</sup> Yoñ wuhī kuchh huā jo Rab ne Yāhū Nabī kī mārifat Bāshā ko farmāyā thā.

<sup>13</sup> Kyonki Bāshā aur us ke beṭe Ailā se sangīn gunāh sarzad hue the, aur sāth sāth unhoñ ne Isrāīl ko bhī yih karne par uksāyā thā. Apne bātil dewatāoñ se unhoñ ne Rab Isrāīl ke Khudā ko taish dilāyā thā.

<sup>14</sup> Bāqī jo kuchh Ailā kī hukūmat ke daurān huā aur jo kuchh us ne kiyā wuh 'Shāhān-e-Isrāīl kī Tārīkh' kī kitāb meñ darj hai.

### *Isrāīl kā Bādshāh Zimrī*

<sup>15</sup> Zimrī Yahūdāh ke bādshāh Āsā kī hukūmat ke 27weñ sāl meñ Isrāīl kā bādshāh banā. Lekin Tirzā meñ us kī hukūmat sirf sāt din tak qāym rahī. Us waqt Isrāīlī fauj Filistī shahr Jibbatūn kā muhāsarā kar rahī thī.

16 Jab fauj meñ k̄habar phail gaī ki Zimrī ne bādshāh ke k̄hilāf s̄azish karke use qatl kiyā hai to tamām Isrāīliyoñ ne lashkargāh meñ ā kar usī din apne kamāñdar Umrī ko bādshāh banā diyā.

17 Tab Umrī tamām faujiyoñ ke sāth Jibbatūn ko chhoṛ kar Tirzā kā muhāsarā karne lagā.

18 Jab Zimrī ko patā chalā ki shahr dūsron ke qabze meñ ā gayā hai to us ne mahal ke burj meñ jā kar use āg lagāī. Yoñ wuh jal kar mar gayā.

19 Is tarah use bhī munāsib sazā mil gaī, kyonki us ne bhī wuh kuchh kiyā thā jo Rab ko nāpasand thā. Yarubiyām ke namūne par chal kar us ne wuh tamām gunāh kie jo Yarubiyām ne kie aur Isrāīl ko karne par uksayā thā.

20 Jo kuchh Zimrī kī hukūmat ke daurān huā aur jo s̄azisheñ us ne kīñ wuh ‘Shāhān-e-Isrāīl kī Tārīkh’ kī kitāb meñ darj haiñ.

### *Isrāīl kā Bādshāh Umrī*

21 Zimrī kī maut ke bād Isrāīlī do firqon meñ baṭ gae. Ek firqā Tibnī bin Jīnat ko bādshāh banānā chāhtā thā, dūsra Umrī ko.

22 Lekin Umrī kā firqā Tibnī ke firqe kī nisbat zyādā tāqatwar niklā. Chunāñche Tibnī mar gayā aur Umrī pūrī qaum par bādshāh ban gayā.

23 Umrī Yahūdāh ke bādshāh Āsā kī hukūmat ke 31weñ sāl meñ Isrāīl kā bādshāh banā. Us kī hukūmat kā daurāniyā 12 sāl thā. Pahle chhīh sāl dārul-hukūmat Tirzā rahā.

24 Is ke bād us ne ek ādmī banām Samar ko chāñdī ke 6,000 sikke de kar us se Sāmariya Pahārī k̄harīd lī aur wahāñ apnā nayā dārul-hukūmat tāmīr kiyā. Pahle mālik Samar kī yād meñ us ne shahr kā nām Sāmariya rakhā.

25 Lekin Umrī ne bhī wuhī kuchh kiyā jo Rab ko nāpasand thā, balki us ne mazī ke bādshāhoñ kī nisbat zyādā badī kī.

26 Us ne Yarubiyām bin Nabāt ke namūne par chal kar wuh tamām gunāh kie jo Yarubiyām ne kie aur Isrāīl ko karne par uksāyā thā. Natīje meñ Isrāīlī Rab apne Ḳhudā ko apne bātil dewatāoñ se taish dilāte rahe.

27 Bāqī jo kuchh Umrī kī hukūmat ke daurān huā, jo kuchh us ne kiyā aur jo kāmyābiyāñ use hāsil huñ wuh ‘Shāhān-e-Isrāīl kī Tārīḳh’ kī kitāb meñ bayān kī gai haiñ.

28 Jab Umrī mar kar apne bāpdādā se jā milā to use Sāmariya meñ dafnāyā gayā. Phir us kā beṭā Aḳhiyab taḳhtnashīn huā.

### *Isrāīl kā Bādshāh Aḳhiyab*

29 Aḳhiyab bin Umrī Yahūdāh ke bādshāh Āsā ke 38weñ sāl meñ Isrāīl kā bādshāh banā. Us kī hukūmat kā daurāniyā 22 sāl thā, aur us kā dārul-hukūmat Sāmariya rahā.

30 Aḳhiyab ne bhī aise kām kie jo Rab ko nāpasand the, balki mazī ke bādshāhoñ kī nisbat us ke gunāh zyādā sangīn the.

31 Yarubiyām ke namūne par chalnā us ke lie kāfī nahīñ thā balki us ne is se baḥ kar Saidā ke bādshāh Itbāl kī beṭī Īzabil se shādī bhī kī. Natīje meñ wuh us ke dewatā Bāl ke sāmne jhuk kar us kī pūjā karne lagā.

32 Sāmariya meñ us ne Bāl kā mandir tāmīr kiyā aur dewatā ke lie qurbāngāh banā kar us meñ rakh diyā.

33 Aḳhiyab ne Yasīrat Dewī kā but bhī banwā diyā. Yoñ us ne apne ghinaune kāmoñ se mazī ke

tamām Isrāīlī bādshāhoñ kī nisbat kahīñ zyādā Rab Isrāīl ke Ḳhudā ko taish dilāyā.

<sup>34</sup> Aḳhiyab kī hukūmat ke daurān Baitel ke rahne wāle Hiyel ne Yarīhū Shahr ko nae sire se tāmīr kiyā. Jab us kī buniyād rakhī gaī to us kā sab se baṛā beṭā Abīrām mar gayā, aur jab us ne shahr ke darwāze lagā die to us ke sab se chhoṭe beṭe Sajūb ko apnī jān denī paṛī. Yoñ Rab kī wuh bāt pūrī huī jo us ne Yashua bin Nūn kī mārifat farmāī thī.

## 17

### *Kawwe Iliyās Nabī ko Khānā Khilāte Haiñ*

<sup>1</sup> Ek din Iliyās Nabī ne jo Jiliyād ke shahr Tishbī kā thā Aḳhiyab Bādshāh se kahā, “Rab Isrāīl ke Ḳhudā kī qasam jis kī ḳhidmat maiñ kartā hūñ, āne wāle sāloñ meñ na os, na bārish paṛegī jab tak maiñ na kahūñ.”

<sup>2</sup> Phir Rab ne Iliyās se kahā,

<sup>3</sup> “Yahān se chalā jā! Mashriq kī taraf safr karke Wādī-e-Karīt meñ chhup jā jis kī nadī Dariyā-e-Yardan meñ bahtī hai.

<sup>4</sup> Pānī tū nadī se pī saktā hai, aur maiñ ne kawwoñ ko tujhe wahān khānā khilāne kā hukm diyā hai.”

<sup>5</sup> Iliyās Rab kī sun kar rawānā huā aur Wādī-e-Karīt meñ rahne lagā jis kī nadī Dariyā-e-Yardan meñ bahtī hai.

<sup>6</sup> Subh-o-shām kawwe use roṭī aur gosht pahuñchāte rahe, aur pānī wuh nadī se pītā thā.

### *Iliyās Sārpat kī Bewā ke pās*

7 Is pūre arse meñ bārish na huī, is lie nadī āhistā āhistā sūkh gai. Jab us kā pānī bilkul khatm ho gayā

8 to Rab dubārā Iliyās se hamkalām huā,

9 “Yahān se rawānā ho kar Saidā ke shahr Sārpat meñ jā bas. Maiñ ne wahān kī ek bewā ko tujhe khānā khilāne kā hukm diyā hai.”

10 Chunānche Iliyās Sārpat ke lie rawānā huā.

Safr karte karte wuh shahr ke darwāze ke pās pahuñch gayā. Wahān ek bewā jalāne ke lie lakariyān chun kar jamā kar rahī thī. Use bulā kar Iliyās ne kahā, “Zarā kisī bartan meñ pānī bhar kar mujhe thoṛā-sā pilāen.”

11 Wuh abhī pānī lāne jā rahī thī ki Iliyās ne us ke pīchhe āwāz de kar kahā, “Mere lie roṭī kā ṭukrā bhī lānā!”

12 Yih sun kar bewā ruk gai aur bolī, “Rab āp ke Kḥudā kī qasam, mere pās kuchh nahīn hai. Bas, ek bartan meñ muṭṭhī-bhar maidā aur dūsre meñ thoṛā-sā tel rah gayā hai. Ab maiñ jalāne ke lie chand ek lakariyān chun rahī hūñ tāki apne aur apne beṭe ke lie ākhirī khānā pakāūn. Is ke bād hamārī maut yaqīnī hai.”

13 Iliyās ne use tasallī dī, “Dareñ mat! Beshak wuh kuchh karen jo āp ne kahā hai. Lekin pahle mere lie chhoṭī-sī roṭī banā kar mere pās le āen. Phir jo bāqī rah gayā ho us se apne aur apne beṭe ke lie roṭī banāen.”

14 Kyoñki Rab Isrāīl kā Kḥudā farmātā hai, ‘Jab tak Rab bārish barasne nā de tab tak maide aur tel ke bartan khālī nahīn hoñge.’ ”

15-16 Aurat ne jā kar waisā hī kiyā jaisā Iliyās ne use kahā thā. Wāqaī maidā aur tel kabhī khatm

na huā. Roz baroz Iliyās, bewā aur us ke beṭe ke lie khānā dastyāb rahā. Sab kuchh waisā hī huā jaisā Rab ne Iliyās kī mārifat farmāyā thā.

17 Ek dīn bewā kā beṭā bīmār ho gayā. Us kī tabiyat bahut ḵharāb huī, aur hote hote us kī jān nikal gāī.

18 Tab bewā Iliyās se shikāyat karne lagī, “Mard-e-Ḵhudā, merā āp ke sāth kyā wāstā? Āp to sirf is maqsad se yahān āe haiñ ki Rab ko mere guñāh kī yād dilā kar mere beṭe ko mār ḍaleñ!”

19 Iliyās ne jawāb meñ kahā, “Apne beṭe ko mujhe de deñ.” Wuh laṛke ko aurat kī god meñ se uṭhā kar chhat par apne kamre meñ le gayā aur wahāñ use chārpāī par rakh kar

20 duā karne lagā, “Ai Rab mere Ḵhudā, tū ne is bewā ko jis kā mehmān main hūñ aisī musībat meñ kyoñ ḍāl diyā hai? Tū ne us ke beṭe ko marne kyoñ diyā?”

21 Wuh tīn bār lāsh par darāz huā aur sāth sāth Rab se iltamās kartā rahā, “Ai Rab mere Ḵhudā, barāh-e-karm bachche kī jān ko us meñ wāpas āne de!”

22 Rab ne Iliyās kī sunī, aur laṛke kī jān us meñ wāpas āī.

23 Iliyās use uṭhā kar nīche le āyā aur use us kī māñ ko wāpas de kar bolā, “Dekheñ, āp kā beṭā zindā hai!”

24 Aurat ne jawāb diyā, “Ab main ne jān liyā hai ki āp Allāh ke paīghambar haiñ aur ki jo kuchh āp Rab kī taraf se bolte haiñ wuh sach hai.”

# 18

## *Iliyās Isrāīl Wāpas Jātā Hai*

<sup>1</sup> Bahut dīn guzar gae. Phir kāl ke tīsre sāl meñ Rab Iliyās se hamkalām huā, “Ab jā kar apne āp ko Aḳhiyab ke sāmne pesh kar. Maiñ bārish kā silsilā dubārā shurū kar dūngā.”

<sup>2</sup> Chunānche Iliyās Aḳhiyab se milne ke lie Isrāīl chalā gayā. Us waqt Sāmariya kāl kī saḳht girift meñ thā,

<sup>3</sup> is lie Aḳhiyab ne mahal ke inchārj Abadiyāh ko bulāyā. (Abadiyāh Rab kā ḳhauf māntā thā.

<sup>4</sup> Jab Īzabil ne Rab ke tamām nabiyōñ ko qatl karne kī koshish kī thī to Abadiyāh ne 100 nabiyōñ ko do ḡhāroñ meñ chhupā diyā thā. Har ḡhār meñ 50 nabī rahte the, aur Abadiyāh unheñ khāne-pīne kī chīzeñ pahuñchātā rahtā thā.)

<sup>5</sup> Ab Aḳhiyab ne Abadiyāh ko hukm diyā, “Pūre mulk meñ se guzar kar tamām chashmoñ aur wādiyōñ kā muāynā kareñ. Shāyad kahīñ kuchh ḡhās mil jāe jo ham apne ḡhoṛoñ aur ḳhachcharoñ ko khilā kar unheñ bachā sakeñ. Āisā na ho ki hameñ khāne kī qillat ke bāis kuchh jānwaroñ ko zabah karnā pare.”

<sup>6</sup> Unhoñ ne muqarrar kiyā ki Aḳhiyab kahāñ jāegā aur Abadiyāh kahāñ, phir donoñ ek dūsre se alag ho gae.

<sup>7</sup> Chalthe chalthe Abadiyāh ko achānak Iliyās us kī taraf āte hue nazar āyā. Jab Abadiyāh ne use pahchānā to wuh muñh ke bal jhuk kar bolā, “Mere āqā Iliyās, kyā āp hī haiñ?”

<sup>8</sup> Iliyās ne jawāb diyā, “Jī, maiñ hī hūñ. Jāeñ, apne mālik ko ittalā deñ ki Iliyās ā gayā hai.”

<sup>9</sup> Abadiyāh ne etarāz kiyā, “Mujh se kyā ḡhaltī huī hai ki āp mujhe Aḳhiyab se marwānā chāhte haiñ?”

<sup>10</sup> Rab āp ke Ḳhudā kī qasam, bādshāh ne apne bandoñ ko har qaum aur mulk meñ bhej diyā hai tāki āp ko ḡhūḡ nikāleñ. Aur jahāñ jawāb milā ki Iliyās yahāñ nahīñ hai wahāñ logoñ ko qasam khānī paṛī ki ham Iliyās kā khoj lagāne meñ nākām rahe haiñ.

<sup>11</sup> Aur ab āp chāhte haiñ ki maiñ bādshāh ke pās jā kar use batāūñ ki Iliyās yahāñ hai?

<sup>12</sup> Ain mumkin hai ki jab maiñ āp ko chhoṛ kar chalā jāūñ to Rab kā Rūh āp ko uṭhā kar kisi nāmālūm jagah le jāe. Agar bādshāh merī yih ittalā sun kar yahāñ āe aur āp ko na pāe to mujhe mār ḡālegā. Yād rahe ki maiñ jawānī se le kar āj tak Rab kā ḡhauf māntā āyā hūñ.

<sup>13</sup> Kyā mere āqā tak yih ḡhabar nahīñ pahuñchī ki jab Īzabil Rab ke nabiyōñ ko qatl kar rahī thī to maiñ ne kyā kiyā? Maiñ do ḡhāroñ meñ pachās pachās nabiyōñ ko chhupā kar unheñ khāne-pīne kī chīzeñ pahuñchātā rahā.

<sup>14</sup> Aur ab āp chāhte haiñ ki maiñ Aḳhiyab ke pās jā kar use ittalā dūñ ki Iliyās yahāñ ā gayā hai? Wuh mujhe zarūr mār ḡālegā.”

<sup>15</sup> Iliyās ne kahā, “Rabbul-afwāj kī hayāt kī qasam jis kī ḡhidmat maiñ kartā hūñ, āj maiñ apne āp ko zarūr bādshāh ko pesh karūñgā.”

<sup>16</sup> Tab Abadiyāh chalā gayā aur bādshāh ko Iliyās kī ḡhabar pahuñchāī. Yih sun kar Aḳhiyab Iliyās se milne ke lie āyā.

*Kyā Bāl Haqīqī Mābūd Hai yā Rab?*



17 Iliyās ko dekhte hī Aḳhiyab bolā, “Ai Isrāīl ko musibat men ḍālne wāle, kyā āp wāpas ā gae haiñ?”

18 Iliyās ne etarāz kiyā, “Main to Isrāīl ke lie musibat kā bāis nahīn banā balki āp aur āp ke bāp kā gharānā. Āp Rab ke ahkām chhoṛ kar Bāl ke butoñ ke pīchhe lag gae haiñ.

19 Ab main āp ko chailenḷ detā hūñ, tamām Isrāīl ko bulā kar Karmil Pahāṛ par jamā karen. Sāth sāth Bāl Dewatā ke 450 nabiyon ko aur İzabil kī mez par sharīk hone wāle Yasīrat Dewī ke 400 nabiyon ko bhī bulāen.”

20 Aḳhiyab mān gayā. Us ne tamām Isrāīliyon aur nabiyon ko bulāyā. Jab wuh Karmil Pahāṛ par jamā ho gae

21 to Iliyās un ke sāmne jā khaṛā huā aur kahā, “Āp kab tak kabhī is taraf, kabhī us taraf langaṛāte raheñge? \* Agar Rab Ḳhudā hai to sirf usī kī pairawī karen, lekin agar Bāl wāhid Ḳhudā hai to usī ke pīchhe lag jāen.”

Log ḳhāmosh rahe.

22 Iliyās ne bāt jāri rakhī, “Rab ke nabiyon men se sirf main hī bāqī rah gayā hūñ. Dūsri taraf Bāl Dewatā ke yih 450 nabī khaṛe haiñ.

23 Ab do bail le āen. Bāl ke nabī ek ko pasand karen aur phir use ṭukṛe ṭukṛe karke apnī qurbāngāh kī lakaṛiyon par rakh den. Lekin wuh lakaṛiyon ko āg na lagāen. Main dūsre bail ko taiyār karke apnī qurbāngāh kī lakaṛiyon par rakh dūngā. Lekin main bhī unhen āg nahīn lagāūngā.

---

\* 18:21 Dekhie āyat 26.

24 Phir āp apne dewatā kā nām pukāreñ jabki main Rab kā nām pukārūnga. Jo mābūd qurbānī ko jalā kar jawāb degā wuhī K̄hudā hai.” Tamām log bole, “Āp ṭhīk kahte haiñ.”

25 Phir Iliyās ne Bāl ke nabiyōñ se kahā, “Shurū karen, kyonki āp bahut haiñ. Ek bail ko chun kar use taiyār karen. Lekin use āg mat lagānā balki apne dewatā kā nām pukāreñ tāki wuh āg bhej de.”

26 Unhoñ ne bailoñ meñ se ek ko chun kar use taiyār kiyā, phir Bāl kā nām pukārne lage. Subah se le kar dopahar tak wuh musalsal chīkhte-chillāte rahe, “Ai Bāl, hamārī sun!” Sāth sāth wuh us qurbāngāh ke irdgird nāchte rahe † jo unhoñ ne banāī thī. Lekin na koī āwāz sunāī dī, na kisī ne jawāb diyā.

27 Dopahar ke waqt Iliyās un kā mazāq urāne lagā, “Zyādā ūñchī āwāz se boleñ! Shāyad wuh sochoñ meñ gharq ho yā apnī hājat rafā karne ke lie ek taraf gayā ho. Yih bhī ho saktā hai ki wuh kahīn safr kar rahā ho. Yā shāyad wuh gahrī nīnd so gayā ho aur use jagāne kī zarūrat hai.”

28 Tab wuh mazīd ūñchī āwāz se chīkhnē-chillāne lage. Māmūl ke mutābiq wuh chhuriyōñ aur nezoñ se apne āp ko zaḥmī karne lage, yahāñ tak ki ḳhūn bahne lagā.

29 Dopahar guzar gāī, aur wuh shām ke us waqt tak wajd meñ rahe jab ḡhallā kī nazar pesh kī jātī hai. Lekin koī āwāz na sunāī dī. Na kisī

---

† 18:26 Lafzī tarjumā: langarāte hue nāchte rahe. Ḡhālīban Bāl kī tāzīm meñ ek ḳhās qism kā raqs. Lihāzā āyat 21 meñ Iliyās kā sawāl, “Āp kab tak . . . langarāte raheñge?”

ne jawāb diyā, na un ke tamāshe par tawajjuh dī.

<sup>30</sup> Phir Iliyās Isrāīliyon se muḥhātib huā, “Āeñ, sab yahān mere pās āeñ!” Sab qarīb āe. Wahān Rab kī ek qurbāngāh thī jo girāi gai thī. Ab Iliyās ne wuh dubārā kharī kī.

<sup>31</sup> Us ne Yāqūb se nikle har qabīle ke lie ek ek patthar chun liyā. (Bād meñ Rab ne Yāqūb kā nām Isrāīl rakhā thā.)

<sup>32</sup> In bārah pattharon ko le kar Iliyās ne Rab ke nām kī tāzīm meñ qurbāngāh banāi. Is ke irdgird us ne itnā chaurā garhā khodā ki us meñ taqriban 15 liṭar pānī samā saktā thā.

<sup>33</sup> Phir us ne qurbāngāh par lakariyon kā dher lagāyā aur bail ko ṭukre ṭukre karke lakariyon par rakh diyā. Is ke bād us ne hukm diyā, “Chār gharē pānī se bhar kar qurbānī aur lakariyon par unḍel deñ!”

<sup>34</sup> Jab unhoñ ne aisā kiyā to us ne dubārā aisā karne kā hukm diyā, phir tīsri bār.

<sup>35</sup> Āḥhirkār itnā pānī thā ki us ne chāron taraf qurbāngāh se ṭapak kar garhe ko bhar diyā.

<sup>36</sup> Shām ke waqt jab ḡhallā kī nazar pesh kī jāti hai Iliyās ne qurbāngāh ke pās jā kar buland āwāz se duā kī, “Ai Rab, ai Ibrāhīm, Is'hāq aur Isrāīl ke Ḳhudā, āj logon par zāhir kar ki Isrāīl meñ tū hī Ḳhudā hai aur ki main terā khādim hūñ. Sābit kar ki main ne yih sab kuchh tere hukm ke mutābiq kiyā hai.

<sup>37</sup> Ai Rab, merī duā sun! Merī sun tāki yih log jān leñ ki tū, ai Rab, Ḳhudā hai aur ki tū hī un ke dilon ko dubārā apnī taraf māyl kar rahā hai.”

<sup>38</sup> Achānak āsmān se Rab kī āg nāzil huī. Āg ne na sirf qurbānī aur lakaṛī ko bhasm kar diyā balki qurbāngāh ke pattharon aur us ke nīche kī miṭṭī ko bhī. Gaṛhe meñ pānī bhī ek dam sūkh gayā.

<sup>39</sup> Yih dekh kar Isrāīlī aundhe muñh gir kar pukārne lage, “Rab hī Ḳhudā hai! Rab hī Ḳhudā hai!”

<sup>40</sup> Phir Iliyās ne unheñ hukm diyā, “Bāl ke nabiyon ko pakaṛ leñ. Ek bhī bachne na pāe!” Logoñ ne unheñ pakaṛ liyā to Iliyās unheñ nīche Wādī-e-Qaison meñ le gayā aur wahāñ sab ko maut ke ghāṭ utār diyā.

### *Bārish Hotī Hai*

<sup>41</sup> Phir Iliyās ne Aḳhiyab se kahā, “Ab jā kar kuchh khāeñ aur pieñ, kyoñki mūslādhār bārish kā shor sunāī de rahā hai.”

<sup>42</sup> Chunāñche Aḳhiyab khāne-pīne ke lie chalā gayā jabki Iliyās Karmil Pahāṛ kī choṭī par chaṛh gayā. Wahāñ us ne jhuk kar apne sar ko donoñ ghuṭnon ke bīch meñ chhupā liyā.

<sup>43</sup> Apne naukar ko us ne hukm diyā, “Jāo, samundar kī taraf dekho.”

Naukar gayā aur samundar kī taraf dekhā, phir wāpas ā kar Iliyās ko ittalā dī, “Kuchh bhī nazar nahīñ ātā.” Lekin Iliyās ne use dubārā dekhne ke lie bhej diyā. Is dafā bhī kuchh mālūm na ho sakā. Sāt bār Iliyās ne naukar ko dekhne ke lie bhejā.

<sup>44</sup> Āḳhirkār jab naukar sātwiñ dafā gayā to us ne wāpas ā kar ittalā dī, “Ek chhoṭā-sā bādāl samundar meñ se nikal kar ūpar chaṛh rahā hai. Wuh ādmī ke hāth ke barābar hai.”

Tab Iliyās ne hukm diyā, “Jāo, Aḳhiyab ko ittalā do, ‘Ghoṛoñ ko fauran rath meñ jot kar ghar chale jāeñ, warnā bārish āp ko rok legī.’ ”

<sup>45</sup> Naukar ittalā dene chalā gayā to jald hī āndhī āī, āsmān par kāle kāle bādāl chhā gae aur mūslādhār bārish barasne lagī. Aḳhiyab jaldī se rath par sawār ho kar Yazrael ke lie rawānā ho gayā.

<sup>46</sup> Us waqt Rab ne Iliyās ko ḳhās tāqat dī. Safr ke lie kamarbastā ho kar wuh Aḳhiyab ke rath ke āge āge dauṛ kar us se pahle Yazrael pahuñch gayā.

## 19

### *Iliyās Bhāg Jātā Hai*

<sup>1</sup> Aḳhiyab ne Īzabil ko sab kuchh sunāyā jo Iliyās ne kahā thā, yih bhī ki us ne Bāl ke nabiyōñ ko kis tarah talwār se mār diyā thā.

<sup>2</sup> Tab Īzabil ne qāsīd ko Iliyās ke pās bhej kar use ittalā dī, “Dewatā mujhe saḳht sazā deñ agar main kal is waqt tak āp ko un nabiyōñ kī-sī sazā na dūñ.”

<sup>3</sup> Iliyās saḳht ḍar gayā aur apnī jān bachāne ke lie bhāg gayā. Chalthe chalthe wuh Yahūdāh ke shahr Bair-sabā tak pahuñch gayā. Wahāñ wuh apne naukar ko chhoṛ kar

<sup>4</sup> āge registān meñ jā niklā. Ek din ke safr ke bād wuh sīnk kī jhārī ke pās pahuñch gayā aur us ke sāye meñ baiṭh kar duā karne lagā, “Ai Rab, mujhe marne de. Bas ab kāfī hai. Merī jān le le, kyonki main apne bāpdādā se behtar nahīn hūñ.”

<sup>5</sup> Phir wuh jhārī ke sāye meñ leṭ kar so gayā.

Achānak ek farishte ne use chhū kar kahā, “Uṭh, khānā khā le!”

<sup>6</sup> Jab us ne apnī ānkheñ kholīn to dekhā ki sirhāne ke qarīb koelon par banāī gaī roṭī aur pānī kī surāhī paṛī hai. Us ne roṭī khāī, pānī piyā aur dubārā so gayā.

<sup>7</sup> Lekin Rab kā farishtā ek bār phir āyā aur use hāth lagā kar kahā, “Uṭh, khānā khā le, warnā āge kā lambā safr tere bas kī bāt nahīn hogī.”

<sup>8</sup> Tab Iliyās ne uṭh kar dubārā khānā khāyā aur pānī piyā. Is khurāk ne use itnī taqwiyaat dī ki wuh chālīs din aur chālīs rāt safr karte karte Allāh ke pahār Horib yānī Sīnā tak pahuñch gayā.

<sup>9</sup> Wahān wuh rāt guzārne ke lie ek ghār mein chalā gayā.

### *Rab Iliyās kī Hauslā-afzāī Kartā Hai*

ghār mein Rab us se hamkalām huā. Us ne pūchhā, “Iliyās, tū yahān kyā kar rahā hai?”

<sup>10</sup> Iliyās ne jawāb diyā, “Main ne Rab, āsmānī lashkaron ke Khudā kī khidmat karne kī sirtoṛ koshish kī hai, kyonki Isrāīliyon ne tere ahd ko tark kar diyā hai. Unhon ne terī qurbāngāhon ko girā kar tere nabiyon ko talwār se qatl kar diyā hai. Main akelā hī bachā hūn, aur wuh mujhe bhī mār ḍalne ke darpai haiñ.”

<sup>11</sup> Jawāb mein Rab ne farmāyā, “Ghār se nikal kar pahār par Rab ke sāmne kharā ho jā!” Phir Rab wahān se guzarā. Us ke āge āge baṛī aur zabardast āndhī āī jis ne pahāron ko chīr kar chaṭṭānon ko ṭukre ṭukre kar diyā. Lekin Rab āndhī mein nahīn thā.

<sup>12</sup> Is ke bād zalzalā āyā, lekin Rab zalzale meñ nahīn thā.

<sup>13</sup> Zalzale ke bād bharaktī huī āg wahān se guzarī, lekin Rab āg meñ bhī nahīn thā. Phir narm hawā kī dhīmī dhīmī āwāz sunāī dī. Yih āwāz sun kar Iliyās ne apne chehre ko chādar se dhānp liyā aur nīkal kar ghār ke muñh par kharā ho gayā. Ek āwāz us se muḥtātib huī, “Iliyās, tū yahān kyā kar rahā hai?”

<sup>14</sup> Iliyās ne jawāb diyā, “Maiñ ne Rab, āsmānī lashkaron ke Ḳhudā kī ḳhidmat karne kī sirtoṛ koshish kī hai, kyonki Isrāīliyon ne tere ahd ko tark kar diyā hai. Unhon ne terī qurbāngāhon ko girā kar tere nabiyon ko talwār se qatl kar diyā hai. Maiñ akelā hī bachā hūñ, aur wuh mujhe bhī mār ḍalne ke darpai haiñ.”

<sup>15</sup> Rab ne jawāb meñ kahā, “Registān meñ us rāste se ho kar wāpas jā jis ne tujhe yahān pahuñchāyā hai. Phir Damishq chalā jā. Wahān Hazāel ko tel se masah karke Shām kā bādshāh qarār de.

<sup>16</sup> Isī tarah Yāhū bin Nimsī ko masah karke Isrāīl kā bādshāh qarār de aur Abīl-mahūlā ke rahne wāle Ilīshā bin Sāfat ko masah karke apnā jānashīn muqarrar kar.

<sup>17</sup> Jo Hazāel kī talwār se bach jāegā use Yāhū mār degā, aur jo Yāhū kī talwār se bach jāegā use Ilīshā mār degā.

<sup>18</sup> Lekin maiñ ne apne lie Isrāīl meñ 7,000 afrād ko bachā liyā hai, un tamām logon ko jo ab tak na Bāl Dewatā ke sāmne jhuke, na us ke but ko bosā diyā hai.”

*Iliyās Ilīshā ko Apnā Jānashīn Muqarrar*

*Kartā Hai*

<sup>19</sup> Iliyās wahān se chalā gayā. Isrāil meñ wāpas ā kar use Ilīshā bin Sāfat milā jo bailoñ kī bārah joṛiyon kī madad se hal chalā rahā thā. Khud wuh bārhwīn joṛī ke sāth chal rahā thā. Iliyās ne us ke pās ā kar apnī chādar us ke kandhoñ par dāl dī aur ruke baḡhair āge nikal gayā.

<sup>20</sup> Ilīshā fauran apne bailoñ ko chhor kar Iliyās ke pīchhe bhāgā. Us ne kahā, “Pahle mujhe apne mān-bāp ko bosā de kar ḡhairbād kahne dījīe. Phir main āp ke pīchhe ho lūngā.” Iliyās ne jawāb diyā, “Chaleñ, wāpas jāeñ. Lekin wuh kuchh yād rahe jo main ne āp ke sāth kiyā hai.”

<sup>21</sup> Tab Ilīshā wāpas chalā gayā. Bailoñ kī ek joṛī ko le kar us ne donoñ ko zabah kiyā. Hal chalāne kā sāmān us ne gosht pakāne ke lie jalā diyā. Jab gosht taiyār thā to us ne use logoñ meñ taq̄sīm karke unheñ khilā diyā. Is ke bād Ilīshā Iliyās ke pīchhe ho kar us kī ḡhidmat karne lagā.

**20***Shām kī Fauj Sāmariya kā Muhāsarā Kartī Hai*

<sup>1</sup> Ek din Shām ke bādshāh Bin-hadad ne apnī pūrī fauj ko jamā kiyā. 32 ittahādī bādshāh bhī apne rathoñ aur ghoṛoñ ko le kar āe. Is baṛī fauj ke sāth Bin-hadad ne Sāmariya kā muhāsarā karke Isrāil se jang kā elān kiyā.

<sup>2</sup> Us ne apne ḡāsidoñ ko shahr meñ bhej kar Isrāil ke bādshāh Aḡhiyab ko ittalā dī,

<sup>3</sup> “Ab se āp kā sonā, chāndī, ḡhawātīn aur beṭe mere hī haiñ.”



<sup>4</sup> Isrāīl ke bādshāh ne jawāb diyā, “Mere āqā aur bādshāh, āp kī marzī. Maiñ aur jo kuchh merā hai āp kī milkiyat hai.”

<sup>5</sup> Thoṛī der ke bād qāsīd Bin-hadad kī naī khabar le kar āe, “Maiñ ne āp se sone, chāñdī, kḥawātīn aur beṭoñ kā taqāzā kiyā hai.

<sup>6</sup> Ab ġhaur karen! Kal is waqt maiñ apne mulāzimoñ ko āp ke pās bhej dūngā, aur wuh āp ke mahal aur āp ke afsaroñ ke gharoñ kī talāshī leñge. Jo kuchh bhī āp ko pyārā hai use wuh le jāeñge.”

<sup>7</sup> Tab Akhiyab Bādshāh ne mulk ke tamām buzurgoñ ko bulā kar un se bāt kī, “Dekheñ yih ādmī kitnā burā irādā rakhtā hai. Jab us ne merī kḥawātīn, beṭoñ, sone aur chāñdī kā taqāzā kiyā to maiñ ne inkār na kiyā.”

<sup>8</sup> Buzurgoñ aur bāqī logoñ ne mil kar mashwarā diyā, “Us kī na suneñ, aur jo kuchh wuh māngtā hai us par rāzī na ho jāeñ.”

<sup>9</sup> Chunāñche bādshāh ne qāsidoñ se kahā, “Mere āqā bādshāh ko jawāb denā, jo kuchh āp ne pahlī martabā māng liyā wuh maiñ āp ko dene ke lie taiyār hūñ, lekin yih ākhirī taqāzā maiñ pūrā nahīn kar saktā.”

Jab qāsidoñ ne Bin-hadad ko yih khabar pahuñchāī

<sup>10</sup> to us ne Akhiyab ko fauran khabar bhej dī, “Dewatā mujhe sakht sazā deñ agar maiñ Sāmariya ko nest-o-nābūd na kar dūñ. Itnā bhī nahīn rahegā ki merā har faujī muṭṭhī-bhar kḥāk apne sāth wāpas le jā sake!”

<sup>11</sup> Isrāīl ke bādshāh ne qāsidoñ ko jawāb diyā, “Use batā denā ki jo abhī jang kī taiyāriyān kar rahā hai wuh fatah ke nāre na lagāe.”

<sup>12</sup> Jab Bin-hadad ko yih ittalā milī to wuh lashkargāh meñ apne ittahādī bādshāhoñ ke sāth mai pī rahā thā. Us ne apne afsaroñ ko hukm diyā, “Hamlā karne ke lie taiyāriyān karo!” Chunāñche wuh shahr par hamlā karne kī taiyāriyān karne lage.

### *Shām kī Fauj se Pahlī Jang*

<sup>13</sup> Is daurān ek nabī Aḳhiyab Bādshāh ke pās āyā aur kahā, “Rab farmātā hai, ‘Kyā tujhe dushman kī yih baṛī fauj nazar ā rahī hai? To bhī maiñ ise āj hī tere hawāle kar dūngā. Tab tū jān legā ki maiñ hī Rab hūñ.’ ”

<sup>14</sup> Aḳhiyab ne sawāl kiyā, “Rab yih kis ke wasīle se karegā?” Nabī ne jawāb diyā, “Rab farmātā hai ki ziloñ par muḡarrar afsaroñ ke jawān yih fatah pāeñge.” Bādshāh ne mazīd pūchhā, “Laṛāī meñ kaun pahlā qadam uṭhāe?” Nabī ne kahā, “Tū hī.”

<sup>15</sup> Chunāñche Aḳhiyab ne ziloñ par muḡarrar afsaroñ ke jawānoñ ko bulāyā. 232 afrād the. Phir us ne bāqī Isrāīliyoñ ko jamā kiyā. 7,000 afrād the.

<sup>16-17</sup> Dopahar ko wuh lerne ke lie nikle. Ziloñ par muḡarrar afsaroñ ke jawān sab se āge the. Bin-hadad aur 32 ittahādī bādshāh lashkargāh meñ baiṭhe nashe meñ dhut mai pī rahe the ki achānak shahr kā jāyzā lene ke lie Bin-hadad ke bheje gae sipāhī andar āe aur kahne lage, “Sāmariya se ādmī nikal rahe haiñ.”

18 Bin-hadad ne hukm diyā, “Har sūrat meñ unheñ zindā pakareñ, ḳhāh wuh amnpasand irādā rakhte hoñ yā na.”

19 Lekin unheñ yih karne kā mauqā na milā, kyonki Isrāil ke zilon par muqarrar afsaron aur bāqī faujiyon ne shahr se nikal kar

20 fauran un par hamlā kar diyā. Aur jis bhī dushman kā muqābalā huā use mārā gayā. Tab Shām kī pūrī fauj bhāg gāī. Isrāiliyon ne un kā tāqqub kiyā, lekin Shām kā bādshāh Bin-hadad ghoṛe par sawār ho kar chand ek ghurṣawāron ke sāth bach niklā.

21 Us waqt Isrāil kā bādshāh jang ke lie niklā aur ghoṛon aur rathon ko tabāh karke Arāmiyon ko zabardast shikast dī.

### *Shām kī Fauj se Dūsri Jang*

22 Bād meñ mazkūrā nabī dubārā Isrāil ke bādshāh ke pās āyā. Wuh bolā, “Ab mazbūt ho kar baṛe dhyān se socheñ ki āne wāle dinon meñ kyā kyā taiyāriyāñ karnī chāhieñ, kyonki agle bahār ke mausam meñ Shām kā bādshāh dubārā āp par hamlā karegā.”

23 Shām ke bādshāh ko bhī mashwarā diyā gayā. Us ke baṛe afsaron ne ḳhayāl pesh kiyā, “Isrāiliyon ke dewatā pahārī dewatā haiñ, is lie wuh ham par ḡhālib ā gae haiñ. Lekin agar ham maidānī ilāqe meñ un se laṛeñ to har sūrat meñ jiteñge.

24 Lekin hamārā ek aur mashwarā bhī hai. 32 bādshāhon ko haṭā kar un kī jagah apne afsaron ko muqarrar kareñ.

25 Phir ek naī fauj taiyār kareñ jo tabāhshudā purānī fauj jaisī tāqatwar ho. Us ke utne hī rath

aur ghere hoñ jitne pahle the. Phir jab ham maidānī ilāqe meñ un se laṛeñge to un par zarūr ḡhālib āeñge.”

Bādshāh un kī bāt mān kar taiyāriyāñ karne lagā.

<sup>26</sup> Jab bahār kā mausam āyā to wuh Shām ke faujiyoñ ko jamā karke Isrāīl se laṛne ke lie Afīq Shahr gayā.

<sup>27</sup> Isrāīlī fauj bhī laṛne ke lie jamā huī. Khāne-pīne kī ashyā kā band-o-bast kiyā gayā, aur wuh dushman se laṛne ke lie nikle. Jab wahāñ pahuñche to unhoñ ne apne khaimoñ ko do jaghoñ par lagāyā. Yih do guroh Shām kī wasī fauj ke muqābale meñ bakriyoñ ke do chhoṭe rewaroñ jaise lag rahe the, kyonki pūrā maidān Shām ke faujiyoñ se bharā thā.

<sup>28</sup> Phir mard-e-Khudā ne Aḡhiyab ke pās ā kar kahā, “Rab farmātā hai, ‘Shām ke log ḡhayāl karte haiñ ki Rab pahārī dewatā hai is lie maidānī ilāqe meñ nākām rahegā. Chunāñche main un kī zabardast fauj ko tere hawāle kar dūngā. Tab tū jān legā ki main hī Rab hūñ.’ ”

<sup>29</sup> Sāt din tak donoñ faujeñ ek dūsre ke muqābil saf-ārā rahīñ. Sātweñ din laṛāī kā āḡhāz huā. Isrāīlī is martabā bhī Shām kī fauj par ḡhālib āe. Us din unhoñ ne un ke ek lākh piyādā faujiyoñ ko mār diyā.

<sup>30</sup> Bāqī farār ho kar Afīq Shahr meñ ghus gae. Taqrīban 27,000 ādmī the. Lekin achānak shahr kī fasīl un par gir gaī, to wuh bhī halāk ho gae.

*Aḡhiyab Shām ke Bādshāh par Rahm Kartā Hai*

Bin-hadad Bādshāh bhī Afīq meñ farār huā thā. Ab wuh kabhī is kamre meñ, kabhī us meñ khisak kar chhupne kī koshish kar rahā thā.

<sup>31</sup> Phir us ke afsaron ne use mashwarā diyā, “Sunā hai ki Isrāīl ke bādshāh narmdil hote haiñ. Kyon na ham tāt orh kar aur apnī gardanon meñ rasse dāl kar Isrāīl ke bādshāh ke pās jāen? Shāyad wuh āp ko zindā chhoṛ de.”

<sup>32</sup> Chunānche Bin-hadad ke afsar tāt orh kar aur apnī gardanon meñ rasse dāl kar Isrāīl ke bādshāh ke pās āe. Unhoñ ne kahā, “Āp kā k̄hādīm Bin-hadad guzārish kartā hai ki mujhe zindā chhoṛ deñ.” Aḳhiyab ne sawāl kiyā, “Kyā wuh ab tak zindā hai? Wuh to merā bhāī hai!”

<sup>33</sup> Jab Bin-hadad ke afsaron ne jān liyā ki Aḳhiyab kā rujhān kis taraf hai to unhoñ ne jaldī se is kī tasdīq kī, “Jī, Bin-hadad āp kā bhāī hai!” Aḳhiyab ne hukm diyā, “Jā kar use bulā lāen.”

Tab Bin-hadad nikal āyā, aur Aḳhiyab ne use apne rath par sawār hone kī dāwat dī.

<sup>34</sup> Bin-hadad ne Aḳhiyab se kahā, “Main āp ko wuh tamām shahr wāpas kar detā hūñ jo mere bāp ne āp ke bāp se chhīn lie the. Āp hamāre dārul-hukūmat Dāmishq meñ tijāratī marākiz bhī qāym kar sakte haiñ, jis tarah mere bāp ne pahle Sāmariya meñ kiyā thā.” Aḳhiyab bolā, “Thīk hai. Is ke badle meñ main āp ko rihā kar dūngā.” Unhoñ ne muāhadā kiyā, phir Aḳhiyab ne Shām ke bādshāh ko rihā kar diyā.

### *Nabī Aḳhiyab ko Malāmat Kartā Hai*

<sup>35</sup> Us waqt Rab ne nabiyon meñ se ek ko hidāyat kī, “Jā kar apne sāthī ko kah de ki wuh

tujhe māre.” Nabī ne aisā kiyā, lekin sāthī ne inkār kiyā.

<sup>36</sup> Phir nabī bolā, “Chūnki āp ne Rab kī nahīn sunī, is lie jyoñ hī āp mujh se chale jāenge sherbabar āp ko phār dālegā.” Aur aisā hī huā. Jab sāthī wahāñ se niklā to sherbabar ne us par hamlā karke use phār dālā.

<sup>37</sup> Nabī kī mulāqāt kisī aur se huī to us ne us se bhī kahā, “Mehrbānī karke mujhe māreñ!” Us ādmī ne nabī ko mār mār kar zaḥmī kar diyā.

<sup>38</sup> Tab nabī ne apnī ānkhon par paṭṭī bāndhī tāki use pahchānā na jāe, phir rāste ke kināre par Aḳhiyab Bādshāh ke intazār meñ kharā ho gayā.

<sup>39</sup> Jab bādshāh wahāñ se guzarā to nabī chillā kar us se muḳhātib huā, “Janāb, main maidān-e-jang meñ laṛ rahā thā ki achānak kisī ādmī ne mere pās ā kar apne qaidī ko mere hawāle kar diyā. Us ne kahā, ‘Is kī nigarānī karnā. Agar yih kisī bhī wajah se bhāg jāe to āp ko us kī jān ke ewaz apnī jān denī paregī yā āp ko ek man chāndī adā karnī paregī.’

<sup>40</sup> Lekin main idhar-udhar masrūf rahā, aur itne meñ qaidī ghāyb ho gayā.” Aḳhiyab Bādshāh ne jawāb diyā, “Āp ne ḳhud apne bāre meñ faislā diyā hai. Ab āp ko is kā natijā bhugatnā paregā.”

<sup>41</sup> Phir nabī ne jaldī se paṭṭī ko apnī ānkhon par se utār diyā, aur bādshāh ne pahchān liyā ki yih nabiyon meñ se ek hai.

<sup>42</sup> Nabī ne kahā, “Rab farmātā hai, ‘Main ne muqarrar kiyā thā ki Bin-hadad ko mere lie maḳhsūs karke halāk karnā hai, lekin tū ne use

rihā kar diyā hai. Ab us kī jagah tū hī maregā, aur us kī qaum kī jagah terī qaum ko nuqsān pahuñchegā.’ ”

<sup>43</sup> Isrāīl kā bādshāh baṛe ḡhusse aur badmizājī ke ālam meñ Sāmariya meñ apne mahal meñ chalā gayā.

## 21

### *Īzabil ke Hāthoñ Nabot kā Qatl*

<sup>1</sup> Is ke bād ek aur qābil-e-zikr bāt huī. Yazrael meñ Sāmariya ke bādshāh Aḡhiyab kā ek mahal thā. Mahal kī zamīn ke sāth sāth angūr kā bāḡh thā. Mālik kā nām Nabot thā.

<sup>2</sup> Ek dīn Aḡhiyab ne Nabot se bāt kī, “Angūr kā āp kā bāḡh mere mahal ke qarīb hī hai. Use mujhe de deñ, kyonki main us meñ sabziyān lagānā chāhtā huñ. Muāwaze meñ main āp ko us se achchhā angūr kā bāḡh de dūngā. Lekin agar āp paise ko tarjīh deñ to āp ko us kī pūrī raqam adā kar dūngā.”

<sup>3</sup> Lekin Nabot ne jawāb diyā, “Allāh na kare ki main āp ko wuh maurūsī zamīn dūn jo mere bāpdādā ne mere sapurd kī hai!”

<sup>4</sup> Aḡhiyab baṛe ḡhusse meñ apne ghar wāpas chalā gayā. Wuh bezār thā ki Nabot apne bāpdādā kī maurūsī zamīn bechnā nahīn chāhtā. Wuh palang par leṭ gayā aur apnā muñh dīwār kī taraf karke khānā khāne se inkār kiyā.

<sup>5</sup> Us kī bīwī Īzabil us ke pās āī aur pūchhne lagī, “Kyā bāt hai? Āp kyon itne bezār haiñ ki khānā bhī nahīn khānā chāhte?”

<sup>6</sup> Aḳhiyab ne jawāb diyā, “Yazrael kā rahne wālā Nabot mujhe angūr kā bāgh nahīn denā chāhtā. Go main use paise denā chāhtā thā balki use is kī jagah koī aur bāgh dene ke lie taiyār thā to bhī wuh bazid rahā.”

<sup>7</sup> Īzabil bolī, “Kyā āp Isrāīl ke bādshāh haiñ ki nahīn? Ab uṭheñ! Khāeñ, piēñ aur apnā dil bahlāeñ. Main hī āp ko Nabot Yazraelī kā angūr kā bāgh dilā dūngī.”

<sup>8</sup> Us ne Aḳhiyab ke nām se ḳhutūt likh kar un par bādshāh kī muhr lagāī aur unheñ Nabot ke shahr ke buzurgoñ aur shurafā ko bhej diyā.

<sup>9</sup> Ḳhatoñ meñ zail kī ḳhabar likhī thī,

“Shahr meñ elān kareñ ki ek dīn kā rozā rakhā jāe. Jab log us dīn jamā ho jāeñge to Nabot ko logoñ ke sāmne izzat kī kursī par biṭhā deñ.

<sup>10</sup> Lekin us ke muqābil do badmāshoñ ko biṭhā denā. Ijtimā ke daurān yih ādmī sab ke sāmne Nabot par ilzām lagāeñ, ‘Is shaḳhs ne Allāh aur bādshāh par lānat bhejī hai! Ham is ke gawāh haiñ.’ Phir use shahr se bāhar le jā kar sangsār kareñ.”

<sup>11</sup> Yazrael ke buzurgoñ aur shurafā ne aisā hī kiyā.

<sup>12</sup> Unhoñ ne roze ke dīn kā elān kiyā. Jab log muqarrarā dīn jamā hue to Nabot ko logoñ ke sāmne izzat kī kursī par biṭhā diyā gayā.

<sup>13</sup> Phir do badmāsh āe aur us ke muqābil baiṭh gae. Ijtimā ke daurān yih ādmī sab ke sāmne Nabot par ilzām lagāne lage, “Is shaḳhs ne Allāh aur bādshāh par lānat bhejī hai! Ham is ke gawāh haiñ.” Tab Nabot ko shahr se bāhar le jā kar sangsār kar diyā gayā.



14 Phir shahr ke buzurgoñ ne Īzabil ko ittalā dī, “Nabot mar gayā hai, use sangsār kiyā gayā hai.”

15 Yih khabar milte hī Īzabil ne Aḳhiyab se bāt kī, “Jāeñ, Nabot Yazraelī ke us bāgh par qabzā karen̄ jo wuh āp ko bechne se inkār kar rahā thā. Ab wuh ādmī zindā nahīn rahā balki mar gayā hai.”

16 Yih sun kar Aḳhiyab fauran Nabot ke angūr ke bāgh par qabzā karne ke lie rawānā huā.

### *Iliyās Aḳhiyab ko Sazā Sunātā Hai*

17 Tab Rab Iliyās Tishbī se hamkalām huā,

18 “Isrāil ke bādshāh Aḳhiyab se jo Sāmariya meñ rahtā hai milne jā. Is waqt wuh Nabot ke angūr ke bāgh meñ hai, kyonki wuh us par qabzā karne ke lie wahān pahuñchā hai.

19 Use batā denā, ‘Rab farmātā hai ki tū ne ek ādmī ko bilāwajah qatl karke us kī milkiyat par qabzā kar liyā hai. Rab farmātā hai ki jahān kutton ne Nabot kā khūn chātā hai wahān wuh terā khūn bhī chāteñge.’ ”

20 Jab Iliyās Aḳhiyab ke pās pahuñchā to bādshāh bolā, “Mere dushman, kyā āp ne mujhe dhūnd nikālā hai?” Iliyās ne jawāb diyā, “Jī, maiñ ne āp ko dhūnd nikālā hai, kyonki āp ne apne āp ko badī ke hāth meñ bech kar aisā kām kiyā hai jo Rab ko nāpasand hai.

21 Ab suneñ Rab kā farmān, ‘Maiñ tujhe yoñ musibat meñ dāl dūngā ki terā nām-o-nishān tak nahīn rahegā. Maiñ Isrāil meñ se tere khāndān ke har mard ko miṭā dūngā, khāh wuh bāligh ho yā bachchā.

22 Tū ne mujhe barā taish dilāyā aur Isrāīl ko gunāh karne par uksāyā hai. Is lie merā tere gharāne ke sāth wuhī sulūk hogā jo main ne Yarubiyām bin Nabāt aur Bāshā bin Aḳhiyāh ke sāth kiyā hai.’

23 Īzabil par bhī Rab kī sazā āegī. Rab farmātā hai, ‘Kutte Yazrael kī fasīl ke pās Īzabil ko khā jāenge.

24 Aḳhiyab ke ḳhāndān meñ se jo shahr meñ mareñge unheñ kutte khā jāenge, aur jo khule maidān meñ mareñge unheñ parinde chaṭ kar jāenge.’ ”

25 Aur yih haqīqat hai ki Aḳhiyab jaisā ḳharāb shaḳhs koī nahīn thā. Kyoñki Īzabil ke uksāne par us ne apne āp ko badī ke hāth meñ bech kar aisā kām kiyā jo Rab ko nāpasand thā.

26 Sab se ghinaunī bāt yih thī ki wuh butoñ ke pīchhe lagā rahā, bilkul un Amoriyoñ kī tarah jinheñ Rab ne Isrāīl se nikāl diyā thā.

27 Jab Aḳhiyab ne Iliyās kī yih bāteñ sunīn to us ne apne kapṛe phār kar ṭaṭ oṛh liyā. Rozā rakh kar wuh ḡhamgīn hālat meñ phirtā rahā. Ṭaṭ us ne sote waqt bhī na utārā.

28 Tab Rab dubārā Iliyās Tishbī se hamkalām huā,

29 “Kyā tū ne ḡhaur kiyā hai ki Aḳhiyab ne apne āp ko mere sāmne kitnā past kar diyā hai? Chūñki us ne apnī ājizī kā izhār kiyā hai is lie main us ke jīte-jī us ke ḳhāndān ko mazkūrā musibat meñ nahīn dālūngā balki us waqt jab us kā beṭā taḳht par baiṭhegā.”

## 22

### *Jhūṭe Nabiyōn aur Mikāyāh kā Muqābalā*

<sup>1</sup> Tin sāl tak Shām aur Isrāil ke darmiyān sulah rahī.

<sup>2</sup> Tisre sāl Yahūdāh kā bādshāh Yahūsafat Isrāil ke bādshāh Aḳhiyab se milne gayā.

<sup>3</sup> Us waqt Isrāil ke bādshāh ne apne afsaron se bāt kī, “Dekheñ, Rāmāt-jiliyād hamārā hī shahr hai. To phir ham kyon kuchh nahīn kar rahe? Hameñ use Shām ke bādshāh ke qabze se chhurwānā chāhie.”

<sup>4</sup> Us ne Yahūsafat se sawāl kiyā, “Kyā āp mere sāth Rāmāt-jiliyād jāenge tāki us par qabzā karen?” Yahūsafat ne jawāb diyā, “Jī zarūr. Ham to bhāi haiñ. Merī qaum ko apnī qaum aur mere ghoron ko apne ghore samjheñ!”

<sup>5</sup> Lekin mehrbānī karke pahle Rab kī marzī mālūm kar leñ.”

<sup>6</sup> Isrāil ke bādshāh ne taqrīban 400 nabiyon ko bulā kar un se pūchhā, “Kyā maiñ Rāmāt-jiliyād par hamlā karūn yā is irāde se bāz rahūn?” Nabiyon ne jawāb diyā, “Jī karen, kyonki Rab use bādshāh ke hawāle kar degā.”

<sup>7</sup> Lekin Yahūsafat mutma'in na huā. Us ne pūchhā, “Kyā yahān Rab kā koī nabī nahīn jis se ham dariyāft kar sakeñ?”

<sup>8</sup> Isrāil kā bādshāh bolā, “Hāñ, ek to hai jis ke zariye ham Rab kī marzī mālūm kar sakte haiñ. Lekin maiñ us se nafrat kartā hūñ, kyonki wuh mere bāre meñ kabhī bhī achchhī peshgoī nahīn kartā. Wuh hameshā burī peshgoiyān sunātā hai. Us kā nām Mikāyāh bin Imlā hai.”

Yahūsafat ne etarāz kiyā, “Bādshāh aisī bāt na kahe!”

<sup>9</sup> Tab Isrāil ke bādshāh ne kisī mulāzim ko bulā kar hukm diyā, “Mikāyāh bin Imlā ko fauran hamāre pās pahuñchā denā!”

<sup>10</sup> Aḳhiyab aur Yahūsafat apne shāhī libās pahne hue Sāmariya ke darwāze ke qarīb apne apne taḳht par baiṭhe the. Yih aisī khulī jagah thī jahān anāj gāhā jātā thā. Tamām 400 nabī wahān un ke sāmne apnī peshgoiyān pesh kar rahe the.

<sup>11</sup> Ek nabī banām Sidqiyāh bin Kanānā ne apne lie lohe ke siṅg banā kar elān kiyā, “Rab farmātā hai ki in siṅgoñ se tū Shām ke faujiyoñ ko mār mār kar halāk kar degā.”

<sup>12</sup> Dūsre nabī bhī is qism kī peshgoiyān kar rahe the, “Rāmāt-jiliyād par hamlā karen, kyoñki āp zarūr kāmyāb ho jāenge. Rab shahr ko āp ke hawāle kar degā.”

<sup>13</sup> Jis mulāzim ko Mikāyāh ko bulāne ke lie bhejā gayā thā us ne rāste meñ use samjhāyā, “Dekheñ, bāqī tamām nabī mil kar kah rahe haiñ ki bādshāh ko kāmyābī hāsil hogī. Āp bhī aisī hī bāteñ karen, āp bhī fatah kī peshgoī karen!”

<sup>14</sup> Lekin Mikāyāh ne etarāz kiyā, “Rab kī hayāt kī gasam, maiñ bādshāh ko sirf wuhī kuchh batāūngā jo Rab mujhe farmāegā.”

<sup>15</sup> Jab Mikāyāh Aḳhiyab ke sāmne kharā huā to bādshāh ne pūchhā, “Mikāyāh, kyā ham Rāmāt-jiliyād par hamlā karen yā maiñ is irāde se bāz rahūñ?” Mikāyāh ne jawāb diyā, “Us par hamlā karen, kyoñki Rab shahr ko āp ke hawāle karke āp ko kāmyābī baḳhshegā.”

16 Bādshāh nārāz huā, “Mujhe kitnī dafā āp ko samjhānā paṛegā ki āp qasam khā kar mujhe Rab ke nām meñ sirf wuh kuchh sunāen jo haqīqat hai.”

17 Tab Mikāyāh ne jawāb meñ kahā, “Mujhe tamām Isrāil gallābān se mahrūm bher-bakriyon kī tarah pahāron par bikhrā huā nazar āyā. Phir Rab mujh se hamkalām huā, ‘In kā kōi mālik nahīn hai. Har ek salāmatī se apne ghar wāpas chalā jāe.’ ”

18 Isrāil ke bādshāh ne Yahūsafat se kahā, “Lo, kyā maiñ ne āp ko nahīn batāyā thā ki yih shaḥs hameshā mere bāre meñ burī peshgoiyān kartā hai?”

19 Lekin Mikāyāh ne apnī bāt jāri rakhī, “Rab kā farmān sunēn! Maiñ ne Rab ko us ke taḥt par baiṭhe dekhā. Āsmān kī pūrī fauj us ke dāen aur bāen hāth kharī thī.

20 Rab ne pūchhā, ‘Kaun Aḥhiyab ko Rāmājiliyād par hamlā karne par uksāegā tāki wuh wahān jā kar mar jāe?’ Ek ne yih mashwarā diyā, dūsre ne wuh.

21 Āḥhirkār ek rūh Rab ke sāmne kharī huī aur kahne lagī, ‘Maiñ use uksāūngī.’

22 Rab ne sawāl kiyā, ‘Kis tarah?’ Rūh ne jawāb diyā, ‘Maiñ nikal kar us ke tamām nabiyon par yon qābū pāūngī ki wuh jhūṭ hī boleṅge.’ Rab ne farmāyā, ‘Tū kāmyāb hogī. Jā aur yon hī kar!’

23 Ai bādshāh, Rab ne āp par āfat lāne kā faisla kar liyā hai, is lie us ne jhūṭī rūh ko āp ke in tamām nabiyon ke muñh meñ ḍāl diyā hai.”

24 Tab Sidqiyāh bin Kanānā ne āge baḥ kar Mikāyāh ke muñh par thappaṛ mārā aur bolā,

“Rab kā Rūh kis tarah mujh se nikal gayā tāki tujh se bāt kare?”

<sup>25</sup> Mikāyāh ne jawāb diyā, “Jis din āp kabhī is kamre meñ, kabhī us meñ khisak kar chhupne kī koshish kareñge us din āp ko patā chalegā.”

<sup>26</sup> Tab Aḳhiyab Bādshāh ne hukm diyā, “Mikāyāh kō shahr par muqarrar afsar Amūn aur mere beṭe Yuās ke pās wāpas bhej do!

<sup>27</sup> Unheñ batā denā, ‘Is admī ko jel meñ ḍāl kar mere saḥih-salāmat wāpas āne tak kam se kam roṭī aur pānī diyā kareñ.’ ”

<sup>28</sup> Mikāyāh bolā, “Agar āp saḥih-salāmat wāpas āeñ to matlab hogā ki Rab ne merī mārifat bāt nahīn kī.” Phir wuh sāth khare logon se muḳhātib huā, “Tamām log dhyān deñ!”

### *Aḳhiyab Rāmāt ke Qarīb Mar Jātā Hai*

<sup>29</sup> Is ke bād Isrāil kā bādshāh Aḳhiyab aur Yahūdāh kā bādshāh Yahūsafat mil kar Rāmāt-jiliyād par hamlā karne ke lie rawānā hue.

<sup>30</sup> Jang se pahle Aḳhiyab ne Yahūsafat se kahā, “Maiñ apnā bhes badal kar maidān-e-jang meñ jāūngā. Lekin āp apnā shāhī libās na utāreñ.” Chunānche Isrāil kā bādshāh apnā bhes badal kar maidān-e-jang meñ āyā.

<sup>31</sup> Shām ke bādshāh ne rathon par muqarrar apne 32 afsaron ko hukm diyā thā, “Sirf aur sirf bādshāh par hamlā kareñ. Kisī aur se mat laṛnā, ḳhāh wuh chhoṭā ho yā baṛā.”

<sup>32</sup> Jab laṛāi chhiṛ gaī to rathon ke afsar Yahūsafat par ṭuṭ paṛe, kyonki unhon ne kahā,

“Yaqīnan yihī Isrāīl kā bādshāh hai!” Lekin jab Yahūsafat madad ke lie chillā uṭhā

<sup>33</sup> to dushmanoñ ko mālūm huā ki yih Aḳhiyab Bādshāh nahīn hai, aur wuh us kā tāqqub karne se bāz āe.

<sup>34</sup> Lekin kisī ne ḳhās nishānā bāndhe baḡhair apnā tīr chalāyā to wuh Aḳhiyab ko aisī jagah jā lagā jahān zirābaktar kā joṛ thā. Bādshāh ne apne rathbān ko hukm diyā, “Rath ko moṛ kar mujhe maidān-e-jang se bāhar le jāo! Mujhe choṭ lag gāi hai.”

<sup>35</sup> Lekin chūnki us pūre din shadīd qism kī larāī jāri rahī, is lie bādshāh apne rath meñ ṭek lagā kar dushman ke muqābil kharā rahā. Ḳhūn zaḳhm se rath ke farsh par ṭapaktā rahā, aur shām ke waqt Aḳhiyab mar gayā.

<sup>36</sup> Jab sūraj ḡhurūb hone lagā to Isrāīlī fauj meñ buland āwāz se elān kiyā gayā, “Har ek apne shahr aur apne ilāqe meñ wāpas chalā jāe!”

<sup>37</sup> Bādshāh kī maut ke bād us kī lāsh ko Sāmariya lā kar dafnāyā gayā.

<sup>38</sup> Shāhī rath ko Sāmariya ke ek tālāb ke pās lāyā gayā jahān kasbiyoñ kī nahāne kī jagah thī. Wahān use dhoyā gayā. Kutte bhī ā kar ḳhūn ko chāṭne lage. Yoñ Rab kā farmān pūrā huā.

<sup>39</sup> Bāqī jo kuchh Aḳhiyab kī hukūmat ke daurān huā wuh ‘Shāhān-e-Isrāīl kī Tārīḳh’ kī kitāb meñ darj hai. Us meñ bādshāh kā tāmirkardā hāthīdānt kā mahal aur wuh shahr bayān kie gae haiñ jin kī qilābandī us ne kī.

<sup>40</sup> Jab wuh mar kar apne bāpdādā se jā milā to us kā beṭā Aḳhaziyāh taḳhtnashīn huā.

### *Yahūdāh kā Bādshāh Yahūsafat*

<sup>41</sup> Āsā kā beṭā Yahūsafat Isrāīl ke bādshāh Aḳhiyab kī hukūmat ke chauthē sāl meñ Yahūdāh kā bādshāh banā.

<sup>42</sup> Us waqt us kī umr 35 sāl thī. Us kā dārul-hukūmat Yarūshalam rahā, aur us kī hukūmat kā daurāniyā 25 sāl thā. Māñ kā nām Azūbā bint Silhī thā.

<sup>43</sup> Wuh har kām meñ apne bāp Āsā ke namūne par chaltā aur wuh kuchh kartā rahā jo Rab ko pasand thā. Lekin us ne bhī ūnche maqāmoñ ke mandiroñ ko khatm na kiyā. Aisī jaghoñ par jānwaroñ ko qurbān karne aur baḳhūr jalāne kā intazām jāri rahā.

<sup>44</sup> Yahūsafat aur Isrāīl ke bādshāh ke darmiyān sulah qāym rahī.

<sup>45</sup> Bāqī jo kuchh Yahūsafat kī hukūmat ke daurān huā wuh ‘Shāhān-e-Yahūdāh kī Tārīkh’ kī kitāb meñ darj hai. Us kī kāmyābiyān aur jangeñ sab us meñ bayān kī gai haiñ.

<sup>46</sup> Jo jismfarosh mard aur aurateñ Āsā ke zamāne meñ bach gae the unheñ Yahūsafat ne mulk meñ se miṭā diyā.

<sup>47</sup> Us waqt Mulq-e-Adom kā bādshāh na thā balki Yahūdāh kā ek afsar us par hukmrānī kartā thā.

<sup>48</sup> Yahūsafat ne bahrī jahāzoñ kā beṛā banwāyā tāki wuh tijārat karke Ofīr se sonā lāeñ. Lekin wuh kabhī istemāl na hue balki apnī hī bandargāh Asyūn-jābar meñ tabāh ho gae.

<sup>49</sup> Tabāh hone se pahle Isrāīl ke bādshāh Aḳhaziyāh bin Aḳhiyab ne Yahūsafat se darḳhāst kī thī ki Isrāīl ke kuchh log jahāzoñ



par sāth chaleñ. Lekin Yahūsafat ne inkār kiyā thā.

<sup>50</sup> Jab Yahūsafat mar kar apne bāpdādā se jā milā to use Yarūshalam ke hisse meñ jo ‘Dāūd kā Shahr’ kahlātā hai ḳhāndānī qabr meñ dafnāyā gayā. Phir us kā beṭā Yahūrām taḳhtnashīn huā.

### *Isrāil kā Bādshāh Aḳhaziyāh*

<sup>51</sup> Aḳhiyab kā beṭā Aḳhaziyāh Yahūdāh ke bādshāh Yahūsafat kī hukūmat ke 17weñ sāl meñ Isrāil kā bādshāh banā. Wuh do sāl tak Isrāil par hukmrān rahā. Sāmariya us kā dārul-hukūmat thā.

<sup>52</sup> Jo kuchh us ne kiyā wuh Rab ko nāpasand thā, kyonki wuh apne māñ-bāp aur Yarubiyām bin Nabāt ke namūne par chaltā rahā, usī Yarubiyām ke namūne par jis ne Isrāil ko gunāh karne par uksāyā thā.

<sup>53</sup> Apne bāp kī tarah Bāl Dewatā kī ḳhidmat aur pūjā karne se us ne Rab, Isrāil ke Ḳhudā ko taish dilāyā.

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

---

PDF generated using Haiola and XeLaTeX on 1 Oct 2024 from source files dated 20 Sep 2024

123ff8cb-27b3-5817-a02a-22e67145fd30